

UPA SABAT SKUL ZIRLAI

BAWI KHRIH SUNGAH PUMKHATNAK

Angantu: Denis Fortin

**October, November, December
2018**

Sabbath School Lesson

ଓଲମ୍ବାଜୁନ୍ଦିରାବାବା

ପୂର୍ଣ୍ଣିର୍ବାହି

ଶିଖିତାକାଳ (୦୦୨୭୬)

ମନ୍ତ୍ରଫେର୍ଗା

ଗାନ୍ଧିରେଣ୍ଡିପୁର୍ଣ୍ଣିର୍ବାହିକ

ଜୀବ ଶୈଖିତାକାଳମାତ୍ରା: ରକ୍ଷଣାକାଳମାତ୍ରା
ରକ୍ଷଣାକାଳମାତ୍ରା.

ଧୂର୍ବଳିରେଣ୍ଡି

ଶିଖିତାକାଳ (୦୧୭୭୭)

କାର୍ଯ୍ୟ

ଭ୍ରମିତାପ୍ରକାଶକାଳମାତ୍ରାରେଣ୍ଡି

କ୍ରମିତାପ୍ରକାଶକାଳମାତ୍ରା:

ରକ୍ଷଣାକାଳମାତ୍ରା.

ଅପ୍ରିଲ - ୨୭୦

ବିଷୟ

ପଠନାମାଙ୍କିତ

A Sung Um Thupawl

1. Sersiamnak Le Tluknak (Sept 28- Oct. 5)	7
2. Remawklonaa Ih Thlenmi Siatnak (Oct. 6-12).....	18
3. An Zaten Pumkhat An Si Thei Ding (Oct. 13-19)	29
4. Tanrualnak Dingih A Hrampi (Oct. 20-26)	41
5. Kawhhran Hmaisa Ih Lungualnak Ton Nun (Oct. 27 – Nov. 2).....	52
6. Pumkhatnak Langdan (Nov. 3-9).....	64
7. Buainak A Um Tikah (Nov. 10-16)	76
8. Zumnakah Pumkhatnak (Nov. 17-23)	86
9. A Fiang Theibak Ih Langternak (Nov. 24-30)	97
10. Pumkhatnak Le Remawklonak (Dec. 1-7)	108
11. Pathian Biaknak Ah Pumkhatna (Dec. 8-14)	119
12. Kawhhran Hohanak Le Pumkhatnak (Dec. 15-21)	131
13. Netabik Remthatnak Le Pumkhatnak (Dec. 22-28)	142

BAWI KHRIH SUNGAH PUMKHATNAK

Kawhhran hi Pathian innsang, hnatuannak, thuzirhnak le biakkhawmnak neihnak hmun a si. Kawhhran hruaitu le rundamtu Jesuh kha zoh ringring in mi hmuahhmuah hnenah rundamnak thuthangtha sim dingih kawh mi a si.

Seventh-day Adventist thurin No. 14-nak ah Kawhhran in a langter mi cu : Kawhhran timi hi Jesuh kha rundamtu le Bawipa ah pomtu le zumtupawl umnak hmun a si. Thlung Hlun san ihsin thokin Pathian fatepawl cu hmunkhat ih Pathian be dingin le pawlkomaw dingah le Pathian thu zir tlang dingah Bawipai zanriah ei tlang dingah a si. Leitlun ah Pathian thuthangtha phuangtu ding mi hmuahhmuah riantu dingah leitlun ihsin kawh suak mi kan si. (Seventh-day Adventist Believe, Boise, Indho: Pacific Press @ Publishing Association, 2005). Pp. 163.

Kawhhran in ziangvek in saw in langter? Kawhhran ta cu zo saw a si? Kanmah ih kawhhran ih tican kan langter mi ah a phi a um.

Kawhhran ti mi cu tualsung ih Jesuh zumtupawl, Jesuh thu lungih riantu dingah biakkhawmnak nei dingin punghawmpawl an si. Biakkhawmnak ah bulpak in (or) mi tampi huap kau sawn khalin an tuah (Rom 16:10,11). Khrihfapawl umkhawmnak biakinn sak mi tla kan sawhter thei. Asinan, himi in a tican ngaingai a langter thei lo. Biakinn kha Khrihfa bu timi kawhhran a si lo, biakinn sungih minungpawl an si.

Thlung Thar in Kawhhran a langter mi kha peng pakhat huam sungih eria pakhat sungih zumtu um mipawl an si theu. Paul in Galati kawhhran a sim tikah Galati eria sung le khawtin kawhhran pawl a sim duh mi a si (Gal. 1:2 le Pet. 1:1 khalah kan hmu thei). Kawhhran in a langter

tiih kan theih mi cu a dangte ih kawhhran din mi, zumnak phun dang nei mi, pupa ih fehpi mi thluntu anmai duhzawng ih kawhhran hmin bun mipawl tla an langter.

Hivek langter mi hmuahhmuah in a sullam a langter thei lo. Kawhhran ti mi cu leitlun hmuntin ih um Pathian fatepawl an si. Kawhhran ih a langter mi cu Kawhhran din mi hmuahhmuah ih Pathian tefa a tangmi umsunpawl hnenah can neta ih doawknak ah a teltupawl an si. Cuihpawl cu hmuntin ih a um mi rinum zetih Jesuh thluntupawl kha an si (Thup. 18:1-4). Tui kuata ahcun kan kawhhran Seventh-day Adventist kha kan hmui bat mi a si ding. Khrih ah pumkhat kan sinak in kanmah ah ziangvek in so a langter timi thu a si ding.

Kan thurin No.14-nak ih a bangter mi cu Jesui taksa sungin ttemaw khawm dingah kawh kan sinak a langter. Kawhhran cu taksa pum pakhat sungah mi tampi thawn umkhawmnak a si ih, ram kip, miphun kip, tong phunkip le mikip an tel a si. Bawi Khrih ah sersiam than kan si ih, cithlah sinak thawn an danglamaw zet. Nunphung, zirsangnak, ram le miphun, bawi phun le sal phun, milian le farah, nunau mipa ti mi thubuaipawl a um thei ve lo. Khrih ah thleidannak a um lo. Thiang Thlarau pakhat in Khrih ah tongaw khawm dingah in funkhwam. Zohman thleidannak nei lo ih rianaw ding in Thlarau ih hruai mi kan si. Jesui phuan mi Bible thu ruangah zumnak le ruahsannak pakhat hnu pakhat kan simaw. Himi pumkhatnak hi thumkom Pathian pakhat sinak sirhsan mi a si ih cumi ah a fa si dingih lak mi kan si. Seventh-day Adventist Believes, pp. 201.

Himi Bible zirlai ih a tumtah mi cu Seventh-day Adventist Kawhhran pumkhat kan sinak ding zirhnak thu lu rem mi Bible zirnak a si. Can cem tiangih kan ton cio dingmi le kan ton rero mi kha pumkhat sinak ding

buaitertupawl an si. Bawi Khrih ah pumkhat sinak Pathian laksawng nunpi thei dingah Bible sungah zirhnak tampi kan hmu. Tu kuata ih hmuitin mipawl cu Bible ih in zirh mi kan kawhhran ih nunpi theinak dingah kawhhran pumkhatnak fehpi dingih a tumtah mi a si.

Denis Fortin hi Berrian Spring, Michigan ih Andrews University Seventh-day Adventist theological tlawngah theology zirhtu a si. Amah kha 1994 ihsin theological tlawngah zirhtu sunget a si. Fortin kha (1999-2001) tiang Master of Divinity Programme khalah director a tuan ih, cumi tuan phahin (2000-2004) tiang Associate hotubik le (2006) tiang theology le Christian Philosophy Department ah chairmen a tuan ih (2006-2013) tiang kha Associate hotubikah hman a si ih, tui nitiang in hman mi a si.

ZIRLAI 1**Sept. 29- Oct. 5****SERSIAMNAK LE TLUKNAK****SABAT TLAI LAM:****September 29**

Tuzarh siar ding: Sem. 1:26,27; I John 4:7,8,16; Sem. 3:16-19; Sem. 11:1-9; Gal. 3:29; Danp. 7:6-11.

BIBLE CANG KEN: “**Cun Pathian in Abraham cu lengah a hruai ih van khi zoh aw. Arsipawl khi na siar cawk a sile hun siar aw, a ti. Cun a hnenah khi vequin na cithlah cu an si ding tiah a ti. Cun, anih in Bawipa a zumih cucu a dingfelnak ah a pomsak**” (Sem. 15:5,6 NKJV).

PATHIAN fatepawl ih thuanthu kha minung sersiamnak le sualih tluknak thu thawn a hram a thok. Kawhhran sung pumkhat sinak ngaingai um thei dindgih zuamnak le sersiamnak ah Pathian khawkhannak le sualih tluk hnu dinthar sal a tulnak thupawl thawn a hram ihsin kar suak a tul.

Pathian in minung hrangah innsang pakhat ih um ding tumtahnak a neih mi kha Bible bung hmaisabik ah a lang. Sualnak a um hnu cun pumkhat sinak kha nasa zetin a siat theh. Cuih sualnak lawngin lungruallonak le thenawknak a suahter. Cucu thulun lonak man an si theh. Khap mi theirah an ei hnu Pathian in Adam le Eve a pan hmaisabik tum ah an karlak ah mawh siataw ih thenawknak a um lohli (Sem. 3:11). Cui ruangah ziang hmuahhmuah kha rundam khawkhannak in a famkimter ding, a hramthok ih pumkhat sinak kha dinthar salnak hi a thupibik tumtah mi pakhat a si.

Pathian fatepawl ih pa Abraham kha Pathian khawkhan mi rundamnak dilnak thupibik ah a cang. Abraham kha zumnak ruangah miding ih cohlannak a ropi zet mi Bible in a langter mi zohthim ding a si (Rom 4:1-5). Zumtupawl pumkhat kan si theinak ding le Pathian thawn kan pumkhat theinak dingah kha vek zumnak neih kan tul. Minung hmangin pumkhat sinak dinthar sal dingah le Pathian duh mi theithiam thei dingah Pathian in hloral fa minungpawl hnenah hna a tuan.

THAWHSAL NI **September 30**
LUNGRUALNAK HRAMPI DUHDAWTNAK

Semtirnak zarth a netnak Semtirnak 1 le 2 nakin sersiamnak hnatiuan thuhlapawl a hnu hmai rem zetin a tuah. Pathian in leilungpi sersiam a theh tikah minung in an duhih an ngainat theinak dingah ziangkim rualrem theh in a um. Sersiam theh hnu ah thil pakhat ih mawi le thatnak zianghman a sim lo ih thil hmuahhmuah a sersiam theh ah, “a tha ngaingai” tiah a ti (Sem. 1:31). Nunnak nei ih a tuah mi hmuahhmuah in pakhat le pakhat rinsanaw ih bawmaw cio dingah an rak um hlan ihsin rualrem zet ding ah tumtahnak nei in tuah mi an si. Minung innsang a ding suak mi hrangah duhnung le mawi zetih sersiam mi leilung a si. A sersiamtui hrangah sunglawi le man nei zet mi le famkim mi a si. Pathian in a hramthokten a tumtah ih a tuah mi cu leilungpi ah lungrualnak le duhdawtnak thawn pakhat ah funkhwam mi a si.

Semtirnak 1:26,27 siar aw. Semtirnak 1 le 2 nakih tarlanmi leitlun ih sersiam mi hmuahhmuah langdanpawl le cungcuang hleice ih milai sersiamnak thawn zohthim awla Bible cangin ziangsaw in sim?

Semtirnak ah Pathian in amai hmuuhmel kengin milai a sersiam. Semtirnak ih sersiamnak thu ah khavek ih a sim mi a um lo. "Pathian in kanmai hmuuhmel keng, kanmah vek milai tuah uhsii" a ti. Cule Pathian in amai hmuuhmel kengin minung a sersiam. Pathian hmuuhmel kengih sersiam mi a si ih, mipa le nunau a semsuah (Sem. 1:26,27 NKJV). Himi hmuuhmel kennak bang ti mi hi theologian, mifimpawl in kum tapi an elaw rero mi thu a si. Pathian hmel bang kan ti tikah Bible cang dangpawl in Pathian sinak ngaingai kha duhdawtnak a si tiah an ti.

1 John 4:7,8,16 siar aw. A hramthok in ziangvek ih sersiam kan si timi theithiam dingah ziangvek in saw in bawm? Sersiam kan si hramthok ihsin lungruaL ding kan sinak thu hi mi in a thathnemnak ziangsaw in hmuhter.

Pathian kha duhdawtnak a si ih, minungpawl hi duhdawt theitu kan si thei ve. Cui sinak cu sersiam mi thildangpawl in an nei ve lo. Duhdaw-aw thei ding ah amai hmel bangih sersiam mi kan si. Duhdawtnak lawngin midang thawn rualremten in pawlkomter. Curuangah Pathian in amai hmel bangtu ah in tuahnak a si. Duhdawtnak kan neih ringring theinak ding a tul ih, cumi in thinlung takte ih duhdawtnak a suahter.

TLAWNGKAI NIKHAT TLUKNAK IH THA MAN

Tluknak ih man a nasa tuk. Adam le Eve ih thulun lonak ruangah nunnak nei hmuahmuah rinsanawk le rualrem zetih umnak kha a botcat. Lungruallonak remawk lonak le thenawknak kha a se thei bik in minung karlak ah a um. Lung ruallonak kha Adam le Eve ah sual puuhawnak a um lohli (Sem. 3:12,13). Kha hnu ihsin mawh puuhawnak lawnglawng a suak vivo.

October 1

**Semtirnak 3:16-19 le Semtirnak 4:1-15 siar aw.
Sual man cu ziangtin saw a sim. Pathian in rualrem zetih
a sersiam mi ah thil thleng mi ziangso a um?**

Adam ih thulunlonak ruangah Pathian sersiam mi thil hmuahmuah parah siatnak tampil cat loin a thleng. Leilungpi khal sual man siatnak ton hram a thokih milai rualremnak khal a cat. Kaina le Abel tei unau karlak ah zawn ruataw le duhdaw aw zetih an um lai ah, Pathian biaknak dan pek mi hnakin mai thu duhnak in huatawnak a suahter. Kaina ih thil tuah mi kha Abel par hnakin Pathian parah a nasa sawnih remawk lonak in hmuhsuam ih thahawknak tiang a thleng. Pathian hnenah a thin a heng (Sem. 4:5). Cuih thinhengnak kha Abel parah a tlakter. Thulunlonak ruangah minung remawknak nasa zetin a siatsuah.

Leitlun ah minung sualnak a nasa tukih an thinlung ruahnak ih suangtuahnak pohpoh cat loin thil tha lo tuahnak hlir a si ti Pathian in a hmu (Sem. 6:5 NKJV). Hi hi thil tha loin a hram a thokih Pathian sersiam mi kutsuak hmuh ding um lo dingin tilik ih siatsuah ding tiang a thlenter. Asinan Pathian in minungpawl parah a beidawng loih cithlah tanglai dingah a retih Noah le a innsangpawl in hram an thoksal.

Tilik hnu ah Pathian in Noah le a innsang hnenah thukamnak a pek ta. A duhdawtnak le a zangfahnak ih kilvennak thukam langternak ah vanah vangro a retsak (Sem. 9:12-17; Isai. 54:7-10). Pathian in a thu sungah rinum mipawl thawn lungrualte ih um theinak dingah hlanlai ih khawkhannak a neih mi thukamnak thawn Noah hnenah a hramthok in a zirhsal.

**Sualnak ih a thlenpi mi lungruallonak thuhlapawl
kha ziangpawl saw an si. Lungrualte ih remawk sal**

**theinak ih thathnemnak um thei dingah ziangvek
duhhrilnak saw na tuah ding?**

Semtirnak 11:1-9 siar aw. Thil cang mi ziangsaw a um? Kha mi in remlonak le thenawknak thubuai ziang saw a suahter. Tilik hnu ih Babel innsang saknak kha Bible ah kan hmu. Cumi ihsin tong a hnok thehing tong phun a thenaw theh. Tong phun khat hmang ding cun a har sinsin. Euphratetis tiva le Tigrist tiva karlak hi leilung thatnak hmun ram tha le mit hlang zetin a mawi. Cutawk hmun Shinar phai rawn timi, tui sanih Irak nisuahnak thlanglam ramah khan Noah hrin thlakpawl in anmai hrang khawpi an sak (Sem. 11:2).

Thil hlun hawlsuaktupawl ih an hmuh mi cu Mesopotamia ram hi hlanlai thuanthu ngan laiah mi tampi umnak hmun a si tiah an hmu. Hipawl hi thal can lawngah an um. A phengte teih tuah mi tlak parah ca ngandan tuahsuaktu an si. Lung mankhung le hreihriam an tuah ih, cule innsang khawsaknak bungbel tuah thiam zet mi an si. An umnak dingah inn thatha saktu an si. Pathian dang tampi an biaknak biakinnpawl tla thil hlun lai suaktupawl in an hmu.

Noah ih tesinfapawl kha Shinar ah khua an sa ih, Pathian in tilik thlengter nawn lo dingih thu a kam mipawl an hngilh. Babel innsang kha thil an thiamnak le an fimmak thangsuanak dingah an sak. An saduhthah an sim mi cu "Kan hmin thangter uhsi" (Sem. 1:4) ti mi thinlung put thawn an sak. Van Pathian tumtah mi cu minungpawl hi sakhuanaak ah lungrualten funkhwam ding a duh. Milem biaknak le Pathian a phunphun biaknak in thlarau lam

lungualnak a hloter hleiah unau sinak thinlung an neih mi tiangin a hloter. Lungual zet le rem zetih an umnak in himi thil an tuah ih a suahter mi cu ziangtik hmanah lungualnak ngah nawn lo ding dinhmun an thlenpi (The SDA Bible Commentary Vol. 1, pp. 284,285).

Adam le Eve ih tluknak ruangah minung lungrualawknak le Pathian tumtah mi a siatsuah theh. Cumi ih a suahter mi cu a hnok zetmi Pathian biaknak thil tha lo le hurnakpawl a karhter. A tawpkhawk ah nunphung danglumnak, tong bangawklonak, miphun thleidannak, pakhat le pakhat mak zetih ruahawknak tiangin a suahter.

Phun le hnam thenawknak rehter dingah ziangti
ih tuah in saw kan bawm thei ding? Nunphung le
tongpawl bangaw loin kawhhran ah natnak a suahter.

TLAWNGKAI NITHUM **October 3**
PATHIAN MINUNG HMUAHHMUAH IH PA ABRAHAM

Pathian pakhat lawng a um ti a zumtu sakhua tum zetzet leitlun ah pathum a um ih, (1) Judaisim (Judah sakhua), (2) Khrihfah, (3) Islam pawl an si ih, Abraham hi kan pa an ti cio. Khrihfapawl cun thlarau lam thilah an tiawknak a si ih, cithlah lo a si lo. Mesopotamia ram suahsan dingah Abraham kawh a si laiah Pathian in a ti mi cu “Nangmah ah leitlun ih innsang hmuahhmuah malsawm an si ding” (Sem. 12:3 NKJV; Sem. 22:8 khalah a um). Thlawsuah hi Jesuh hnen ihsin a ra mi an si theh.

Hebru 11:8-19; Rom 4:1-3 le Galati 3:29 siar aw.
Abraham ih zumnak a langmi ziangso a um? Khrihfa
lungrualnak thawn pehawknak ziangso a um? Tui ni ah
Khrihfa lungrualnak theithiam dingah hipawl in ziangtin
so in bawm?

Abraham kha zumtu hmuahmuah ih Pa a si vekin Khrihfapawl ih lungruualnak ding a hrampi kan zoh ding tampi in pek. (1) Zawnlung ih nunnak “Rinnak in Abraham cun lehhnu ih a ro co ding mi hmunah feh dingih kawh a si tikah thu a awih, a fehnak ding hmun thei loin a pok” (Heb. 11:8 NKJV). (2) Pathian thukam ah beiseinak a nei. “Rinnak in ramtiam ah ram dang mi vekin a caam. Amah thawn bangaw in thutiam ro co tlangtu Isaak le Jakob thawn puanthlam ah an um. Ziangahtile Pathian sak mi lungphun nei khawpi kha an hawl” (Heb. 11:9,10 NKJV). (3) Pathian in fa I pek rori dingih nikhat ni ah a cithlahpawl kha siar cawk lo arsi zat an si ding ti mi a zum. Hivek ih a pom theinak ruangah zumnak ruangah thiam conak ngaantu a si (Rom 4:1-3). (4) Pathian ih rundam khawkhannak a rinsan ngam. Pathian in Moriah tlangah Isaak raithawinak ih pek dingah a dilnak kha nasa zetih Abraham zumnak hneksaknak a si (Sem. 22:1-19; Heb. 11:17-19).

Abraham kha Pathian ih rualtha tiah thlung hlun sungah a ngan (2 San. 20:7; Isai. 41:8). Thukthun loih zawnlungnak zumnak nun a neih mi Pathian thukam a rinsannakpawl kha tui san Khrihfapawl ih kan zohthim ding mi a si.

A liam zo mi ni malte sungih na tong mi le na tuah mipawl ruat aw. Zumnak nun lang rori theinak dingah na tuah mi le na tong mipawl zoh fiangsal aw.

**TLAWNGKAI NILI
PATHIAN HRIL MI MIPHUN**

Pathian in a palai si dingah a sal Abraham a hril. Himi hi Pathian duhdawtnak le zangfahnak ih thil tuah mi a si. Tluknak ruangih a um mi thenawknak le

lungruallonakpawl rem tha saltu dingah a poimawh zet mi Pathian khawkhannak hrangah Israel-pawl kha kawh a si. Remthat salnak ih Pathian hnatuannak thu kha Bible kan zir tikah kan hmu. Israel-pawl kha himi tumtah mi hnatuantu dingah thukam pek ih hril mi an si.

Danp. 7:6-11. Israel-pawl kha Pathian in ziangah saw a miphun si dingah a kawh. Abraham cithlahpawl hi ziangah saw Pathian in a minungah a hril.

Pathian in Israel-pawl a hrilnak san hi leitlun minungpawl a duhdawt ruangah a si. Pathian in Abraham cithlahpawl kha amah theitu an si ruangah milaipawl hrangih rundamnak thuthangtha phurtu dingah a hril (Saam 67:2). Cungnungbik Pathian ih duhdawtnak in Israel-pawl kha thukamnak tuah in a hril. Abraham cithlahpawl kha porh tlak ziaza tha an neih ruangah Pathian ih hril mi an si lo. “Miphun dang hnakih nan tam sawn ruangah Bawipa in a lo duhdawt a si lo ih, a lo hril khal a si lo, nannih cu miphun hmuahmuah lakah a mal bik nan si” (Danp. 7:7 NKJV).

Pathian in mi a hril tikah san tlae lo kha santlai ah a tuah. Minungpawl in upa kan hril tikah mifim, thunei thei le rinsan ngam aw mipawl kha hruaitu ah kan hril. Pathian in amah riantu dingah micak thiltithei a hril lo. Thathnemnak nei lo tawntai ka si ti a theiawtu, fimmak nei lopawl, Pathian ih a hrilnak kha porhawknak an neih lonak dingah a si (I Kor. 1:26-31).

Israel-pawl kha Pathian in sunlawih thangthat a duh ih an hnenah thlarau lam hlawknak hmuahmuah a pek. Himi hi co tha an ngah mi a si. Pathian in amah aiawhtu dingah Israel-pawl kha khaipa bikih a tuah tikah thatnak lamah suan ding tlak an nei lo. Leitlun miphun hmuahmuah hmaiah mangbangza milian neinung ah a

October 4

tuah. Kutthiam thil neihnak le thiltithei mifim ah Pathian in a tuah ih, zawnlung in thukhaampawl an thlunnak ruangah cawisan tlak mipawl um ringring dingah thatho zetih zirhtu an si ding. Zawnlung ih an umnak ruangah miphun dangpawl ih an tuar mi natnak tha lo lak ihsin kilhimawknak an ngah. Thluak tha le mi hleice ah Pathian thlawsuah pek mi an si. Pathian lal ram ih lal sungkua le puithiam an si ih, a ra thleng ding mi canah leitlun ah mi hminthang si dingin Pathian in thiannak thawi thom mi an si. An neih mi thil le thil titheinak huham kha Pathian sunloihnak dingah a si. E.G. White, Christ Object Lesson. Pp. 288.

Seventh-day Adventist ah in ko ih kan hrang a rak tuah mipawl le hlanlai Israel-pawl a kawhnak le an hrangih a tuahsak mi ah a bangaw mi ziang saw kan hmu thei? Zirlai nan zirnak Sabat ni ah a phi na ngah mi rel tlang uh.

TLAWNGKAI NINGA

October 5

RUAH BET DING: Minung sersiamnak ah Pathian in a hramthok ih a tumtahnak kha innsang thu zirhawknak le sabat thu ah a lang (Sem. 2:21-24). Sabat hi minung hmuahmuah hrangih tuah mi a si tiah Jesuh in fiangten a sim (Mark 2:27,28). Sual a um hlan lei le van kokek thil umdan kha Semtirnak sungih kan hmuh mi ahcun ni sarah ni kha Pathian in a thianghlimter ih a dangten a ret. Israel-pawl kawh an si hlanah a um zo mi a si. Hihi minung hmuahmuah in ni zarh ni ah lungualte ih hmang dingah thuneihnak ih fial mi a si. Adam cithlah hmuahmuah in Pathian thawn tluangtlam zetih pehtlaihawknak le pakhat le pakhat pawlkomawknak nei theinak dingah le Pathian ih a colhnak hngilhonak dingah a si. Sabat thu le innsang thu hi Eden ihsin thuzirhnak a thok. Pathian tumtah dan

ahcun tla tlum zetih um tlang dingah a si. Himi ni ah nidang hmuahmuah hnakin Eden nun kan tepnak a si. Innsang sunget mikip in hmun khatah Pathian thu zirtlangnak le Pathian biakkhawmnak can a si. Innsang pabik ih hohanak in nu le fanaupawl komawknak tuah in dintharsalnak kha puithiam a si mi pabik ih hruainak in tuah dingah Pathian tumtah mi a si. E.G. White Child Guidance, pp. 535.

RELTLANG DING:

- (1) **Nupa karlak ih thil umdan ah Adam hnak ruh ihsin Eve a tuah ti a langter mi in ziangtluk ih nai in saw an pehtlaihawk ti in sim. Pathian in amah le a minungpawl naihniham zetih pehawknak mitthlam ih hmu thei dingin nupa nun zothim ding in pek mi ziangvek saw a si? Ziangruangah saw a si.**
- (2) **Babel innsang thuanthu ah milai covo le tong a phunphun a suahnak kan hmu. Himi hi a hramthok in minung hrangah Pathian khawkhan mi a si lo. Khami hnakih nasa in tuisan ah ziangvek in saw kan thenawk? Miphun tampi tong phun dangdang pawl hi ziangvek in saw kawhhran in lungualten pumkhat si dingah a tuah ding?**
- (3) **Hlanlai Israel-pawl kawh an sinak le Seventh-day Adventist-pawl kawh an sinak an bangawknak na hmu maw? Khrih sung ihsin Pathian kawhnak ah rinum thei dingin an hnen ihsin ziang saw kan zir thei ding?**

THUTLANGKAWM: Pathian in mi hmuahmuah kha innsang khat vekein lungualten khawsa tlang dingah a

hramthok in a remruat mi a si. Kan nu le kan pa hmaisapawl ih thulunlonak ruangah Pathian khawkhannak a siat theh. Jesuh hnen lawngih ngah thei mi dintharsalnak thukam nunpi dingah Pathian in Abraham a kawhnak a si.

ZIRLAI 2**Octobet 6-12****REMAWKLONAK IH THLENG MI SIATNAK****SABAT TLAI LAM:****October 6**

TUZARH SIAR DING: Danp. 28:1-14; Jer. 3:14-18; Thut. 17:6; I Siang. 12:1-16; I Kor. 1:10-17; Tirh. 20:25-31.

BIBLE CANG KEN: “Bawipa tih cu fimnak hrampi a si. A thiaghlim mi pa theih cu theihthiamnak **fimnak a si**” (Thuf. 9:10 NKJV).

THLUNGHLUN profet-pawl in Israel-pawl kha Pathian thu lung dingih kawh mi an si ti ah an sim theu. Thu lunlonak le daithlannak in remlonak le lungruallonak a suahter. Pathian thukhaam zawnlung ih thlun hi sualih siatsuahnak ihsin kilhimawknak a si. Cule an kiangih miphun dangpawl lakah thiaghlimter mi an sinak langtertu a si. Pathian duhmi nun neih hi midang thawn remawknak a suahter. Cuitlun ah mizuk biaknak a phunphun ih an thil tuahdanpawl lakah thazang khoh zetih dingin lungruallnak ding tuar theinak a suahpi. Pathian in a minungpawl kha an kiangkap miphun dangpawl hnenah a theihpitu si dingah thiaghlimte ih umter a duh.

Izipt ram ihsin Hebru miphunpawl runsuah an si hnu ah Bawipa in an hnenih a simmi cu “Nan co dingmi ram ih nan thlun dingah Bawipa kan Pathian thupek vekin dan le thuthennak pawl ka lo zirh zo. Cupawl cu thlun uhla tuah uh, miphun dangpawl ih mithmuh ah mi fim le mithiam nan si ding. Annih in hi danpawl an theih tikah miphun ropi, mifim le theihthiamnak a nei mi tiah an lo ti ding” (Danp. 4:5,6 NKJV).

A minungpawl an rinum ahcun thlawsuahnak nasa zet pek an si ding. Midang hrangah thlawsuah phurtu khal an si ding. Remawk lonak tampi a suahtertu cu thil pakhatte cu rin um lo nak a si ih buainak phunkim a suah ter.

THAWHSAL NI

October 7

“MAW DUNG TOLH HMANG FALEPAWL RA KIRSAL UH!”

Israel-pawl kha zawnlung in Pathian thu an thlun lo ruangah dik lo zetih thuthennak thuanthupawl lawnglawng kan thei. Thu an lun lo ruangah ralawknak le doawknak in a hun thlun. Hivek thupawl simsal rero in a um. Pathian minungpawl in an can neih mi hmuahmuah ah zawn rak lung hai sehla daihnak le thlawsuahnak thawn an nun a hnianghnar zet ding. An can hmanmi hmuahmuah anmai thuthu in an nung ih, Pathian thu an thlun lo. An nunah zonzaih retheihnak le doawknak in a khat. Ramtiam an thlen hlan khalah Israel-pawl hnenah an nundan ding Pathian ih ralrinnak pek zo mi an si.

Danp. 28:1-14 siar aw. Israel-pawl in Pathian duhdan in nung hai sehla an hnenah ziangvek thlawsuahnak a thleng ding.

Jeremiah 3:14-18 siar aw. Israel-pawl in sual sirnak thawn ra kirsal dingah Pathian kawhnak ihsin ziangsaw kan zir thei mi a um? A minungpawl parah Pathian zawi theinak le duhdawtnak ziangsaw a sim?

A mak zet mi Jeremiah cabu sungah kan hmuh mi cu thu lunglo le mi zuk biakin Israel-pawl in Pathian an dodal nan, an parah Pathian in zawn ruahnak zangfahnak le duhdawtnak a langter kan hmu. Pathian in a minungpawl kha sualnak an tuah mi lamzin ihsin siraw in

a hnen kirsal dingah a sawm rero. Pathian in an hmailam ih ruahsannak hrangah dintharaw sal dingin tu le tu thu a kam theu.

“Dung tolh Israel-pawl ra kirsal uh” tiah Bawipa in a ti. “Ka thinhengnak nan parah ka thlengter lo ding”. Ziangatile lainatnak neitu Pathian ka si. Bawipa in a ti. “Ka thinheng kumkhua lo ding”. Bawipa na Pathian dan na buar ih, thingniim hnuai kipah ramdang Pathian nan ngainak kha felte phuang uh. Ka thu nan ngai duh lo mi na dik lonak lawng kha phuangaw, Bawipa in a ti (Jer. 3:12,13 NKJV).

Jeremiah in Pathian thu ngaihsak loih an um can kha a tlangpi in a sim. Siangpahrang Josiah san ah remthatnak tuah hram an thok ko nan, mi tampipawl in zawnlung in Pathian thu ah rinum zet dingin thlarau lam thu ah ruahnak thinlung an nei lo. Milem biaknak le mai tanghma sialnak in an nun a luah khatih an thlarau nun le an uknak a siatnak a si. Hmailam canih an hlawhtlinnak dingah Pathian lamah kirsal in a duh mi an tuah a tul. Ziangatile an hmai ih an ton ding hi a rapthlak zet. Curuangah Pathian in Jeremiah hnen ihsin sawmnak a tuah, Pathian in an hmailam ah mi neinung, lungrua zet mi le harhdam mi sinak thlengsal ding a duh. Hivek dinhmun thleng ding cun zumnak dik nei ih nunpi a tul.

Na nunah zawnlung ih na nun le nun lonak ah danglamnak na thei maw?

TLAWNGKAI NIKHAT

October 8

A MITHMUH IH DIKNAK

Thuthentu cabu sungah Israel-pawl in Pathian duhnak an thlun lo ruangah an parah thil tha lo a thleng mi tampi a lang. Israel-pawl kha Kanaan an thlen hnu rei

lote ah an hnenih thusim mipawl kha an tuah lo ih, an kiangih um Kanaan pawlih sakhua dik lo nun cawngin an um. Cuih can thok in buainak a phunphun an tong.

**Thuthentu 17:6 le Thuthentu 21:25 siar aw.
Pathian minungpawl hnena a thleng mi buainak tampi
ih a suahnak thuhla ziangsaw a si.**

Pathian milaipawl lakah thenawknak le lunguallonak um dingih tuah a sinak thu rel tlang uh. A miphunpawl ih lunguallonak kha Bawipai pek mi thukam ah rinumnak le zawnlungte ih Pathian thawn an umtlang lawngah hmuh theih ding a si. Anmai mithmuh ih a dik an ti mi le an kiangkap miphunpawl thu an cawng ruangah harnak le siatnak an tong. Misual kan si theh ih, kanmai ngaihdan kan kol ringring ih, kan thinlung duhmi kan thlun ahcun Pathian ih in hruainak lamzin ihsin kan pial hlo tinak a si.

**Thuthentu sanah Israel-pawl ih thlarau dinhmun
le zatlang nun umdan a hnuai lamih Bible cangin ziangtin
saw in sim.**

Thut. 2:11-13

Thut. 3:5-7

Pathian in a minungpawl ih an rinum lo nakih thaman kha Mosi hmangin a sim. Pathian thukam an thlun duh lo ruangah Pathian hnen ihsin an thenaw ih thlawsuahnak an ngah lo. Miphun dangpawl hnakin Judah-pawl kha thlawsuahnak sunglawi co dingin kha mi canih ralrinnak pek mi kha an ngaihven dingmi a si. Asinan an Pathian an hngilh ih cotha an ngah mi le Pathian aiawhtu an sinak kha an hngilh. Pathian ih fial mipawl an tuah

duh lo, an milaipipawl nun thianghlimnak ding zirhtu an sinak kha porhawknak ah an hmang. Pathian rian dingih kawh an sinak kha an tlansan. Pathian nung nei ah an salaw nan thianghlim nun nei dingih zirhnakpawl an thlun lo. Cucingin Pathian neih mi kiltu rinum ah an sal aw. An duhhamnak le tirhfaknak ruangah sakhua nei lopawl ih hmuhsuamnak an tong. Cuti ih an nun ruangah Zentail-pawl in Pathian ziaza a si mi thukhaam theih sualnak ah a cang. (E.G. White Prophets and Kings. Pp. 20,21).

**Kawhhran sungih kan ziaza in a lenglam tiang
ah ziangsaw a thlenpi. Seventh-day Adventist-pawl ih
nun ziaza a tha lamih an hmuh mi ziang tal a um thei?**

**TLAWNGKAI NIHNIH
HEBRU MIPHUN AN THENAWKNNAK**

October 9

Phatsannak ih tihnung mi kha an parah zankhat thil thu in a thleng. An duhhrilnak ih thutluknak an tuah sual mipawl kha kum za tampi a rei hnu ih Pathian minungpawl hrangah thil tihnung bik thlentertu a si.

**2 Siang. 12:1-16 ih siangpahrang Rehoboam
thuanthu kha siar aw. Pathian minungpawl an
thenawknak tihnung za thu ziangsaw in sim.**

Rehoboam ruahnak petupawl in Israel-pawl hrangih Pathian duhmi an thei ko. An ukawknak rem tha seh tiih an au aw ngaisak ding an duh. Shekhem ih an tonkhawmawk lai ah thuruah an palhnak ruangah mipy tam sawn parah thu an nei thei nawn lo ih, an cak thei nawn lo. Solomon sanah cun Israel miphun hrangah Pathian khawkhannak thawn an uk aw ih, cuih thuneihnak hmun ringring seh tiah tumruh zetin an fehpi. A hleifuan ih tuanvo pek mi ruangah rinumnak thinlung an neih mi

kha rin hmainak a um. Zawnruahnak nei lo aatthlak zetih thuneihnak hman tumnak ah siangpahrang ruahnak petu dingih hril mipawl in an thuneihnak kha hngal zetin an phuang suak (E.G. White, Prophets and Kings, pp. 90).

A hnuai ih Bible cangpawl in thuthen catnak ah fim a tulnak ziang saw a sim? A dik mi fimnak hrampi khui ah a um.

Thufim 4:1-9

Thufim 9:10

James 1:5

Rehoboam in fimkhur lo aatthlak zetih a thu then catnak in mipipawl kha thuneihnak thawn hnatuan hneknak thu a sim ih, Israel ram uknak riahsiatza in thil a thleng. Siangpahrang in ruahnak petu ding mi bu pahnih a nei ih, thuthen catnak a tuah mi ah hmuhton nei tam lo amai thirualpawl ih ruahnak a thlun ruangah a pa Solomon le a pu David in kum 80 sung khoh zetih uknak an din zo mi ram uknak kha a siat theh. Siangpahrang ruahnak petupawl in mipipawl hnenah apai san hnakin khoh sawnih uk dingah hronak thawn aatthlak zetih ruahnak pek mi kha a phuang. Ruahnak petu nonawnpawl in mipipawl ih dil mi hnatuan olhter ding mi thlun kha uktu siangpahrang ih hman ding thuneihnak a si lo ti ah an ti. Kha mi hnakin khung ih tuanter dingah an simter. A netnak ahcun mipipawl rinum dingih an thukamnak cotlak lo ah a tuah. Pathian miphunpawl hi vekih thenawknak hi Pathian duhmi le tumtah mi a si lo.

TLAWNGKAI NITHUM

**KORIN KHUA IH KHRIHFA BU THENTHEKAWNAK
(Schism in Corinth)**

October 10

Lungrial lonak Pathian minungpawl lakih a ummi kha cem thei loin thlung thar san tiang a um mi hi a poi nasa.

Paul cakuat ngan mi hmaisa palipawl ah Korin khua ah lungrualnak um theinak ding ih sawmnak kha Korin cakuat pakhatnak ah kan hmu. Paul kha Efesa khua ih a um lai ah Korin khua ih an lungruallonak le an thenawknak thupawl a thei. Cule Kawhhran lungrial zetih um dingah le thenaw loih um dingah cakuat saupi a ngan. Duhum lo zet thenawknak hlo rori dingah ruahnak tha pe thei dingin lamzin a hawlih remnak karh sinsin dingah a zuam rero.

1 Korin 1:10-17 ih thu veikin an remawk lo ih an thenawknak thuziang saw a um?

Paul in Korin khua ih unaupawl remaw lo ih an thenawnak thu mi ih simnak in a theih tikah donhar zetin a um. A thu hramthoknak ah a thinlung ih an cam ringringnak thu a sim. “U le naupawl a tuah nan zaten thu hmunkhat sim in nan lakah famkim zetin pehzomaw sown uh. Thenaw lo dingin kan Bawipa Jesuh hminin ka lo dil” (I Kor. 1:10 NKJV). Remawknak le thenawknak ziangbang tuk hman um sehla Paul in rehter a duh.

Paul in Korin Khrihfa Jesuh thluntupawl kha Khrihfa an si ti ah a sim. Talent le laksawng ngah mi tampi thawn kawh mi khal milai sinak men a si lo tiah a ti. Anmah cu thenaw veikin lang hmansehla Khrih kha a thenaw mi a si lo tiah a sim. Khrihfapawl lungrualnak kha Khrih le Cross parih raithawinak a tuah mi hmuitin mi a si tiah raltha in a sim (1 Kor. 1:13).

Khrihfa tanrualnak kha Khrih le Cross parih a thihnak thutak sirhsan mi a si. Mi pakhat cu fim zetih ruahnak pe theitu (or) thuthangtha simthiamnak (or) mihruai a thiamnak ruangah mitling sinak a um lo. Cross hramah kan bangaw theh. Jesuh ah tihnimnak pakhat ah kan hnime phumaw ih amah lawng kan sual thianghlimter theitu a si. Zokhal Khrih ah pumkhat sinak ding lamzin panin kan tuan ding a si.

Seventh-day Adventist pawlin zumnak le rawngbawlnak ah tanrualnak a um theu ti ih ruat men lo dingah himi in ziangso in sim? Jesui uknak, hruainak le a duhdawtnak ih temawk lo ahcun thenawknak le remawklonak in tuisan kawhhran lungrualnak a siat thei.

Hivek tihnung mi hrial thei dingah Paul in ziangtin saw a cing fel. Midang hnakin Khrih kha pakhatnak ah ret dingin fimkhur in ziangtin saw kan um ding?

**TLAWNGKAI NILI
CINGHNIA RUAL AN RA DING**

October 11

Tirhthlah 20:25-31 siar aw. Efesa kawhhran upapawl ih thu ah Paul in ralrinnak ziangha a sim? Ziangpawl saw an tuah. Hivek thil thleng lo dingah ziangvek in kilhimawknak kan tuah ding?

Paul in rawng a bawl laiah dodalnak a tong theu. Jesui thuthangtha thianghlim zetih kilhim a har zet ti a thei. An thenawk zik zawngah Efesa kawhhran upapawl kha Ezek. 33:1-6 sungih ral kiltu thuthawn an umdan an bangawknak le a rualpi kawhhran hruitupawl kha thuthangtha kilhimnak tuanvo an neih thu a sim. Rinsantlak tuukhal tha vekin an mipipawl kilhim a tulnak thu a sim.

Paul in zirhnak sual zirhtupawl kha "Cinghnia he" thawn a tahthim (Tirh. 20:29 NKJV). Kha mi vek zirhnak sual a zirhtu sayapawl kha Jesuh in cinghnia he tuu vunsin ih umpawl kha ralring uh tiah a sim mi thei sal dingah a simsai (Matt. 7:15). Paul ih a rak din mi Asia ram kawhhran ih zumtupawl an rak siatsuah ngaingai. Efesa 5:6-14 le Col. 2:8 sungah Asia minor ih a um mi kawhhranpawl hnenah Paul ih ralrin peknak tampi kan hmu.

Timote cakuat pahnihnak a nganmi ah Paul in Efesa kawhhran ah tuanvo neitu Timote hnenah ralrin peknak a nganih kawhhran dodaltu zirhnak sual le Pathian tihzahlonak ni netalam ah an suak ding tiah ralrinnak thu a sim.

2 Timote 2:14-19 le I Tim. 3:12-17 siar aw. Kawhhran lungrualnak kilhimnak le zirhnak sual zirhtu kha ziangvek ih dodal ding tiah Paul in Timote hnen a sim.

Timote in a hmaisabik ah "Bible thutak thudik zetih thenfel theitu" a si ding (2 Tim. 2:15 NKJV). Santlailo thu elawknak le anmai ruahnak men thusimtupawl do theinak dingah Pathian zirhmi Bible thupawl dik zetih thenfel a tul. Bible hi an kalhaw loih a sungih a ummi thutak hi a sullam dik zetih simfiang ding a si. Bible cabu hmuahmuah ah Jesuh zumnak hlo thei dingih sim fiah sualnak kha kilhim ding a si. Pathian thu ah koppi nei lo mi le santlai lo deuh mi le hnon deuh ding timi a um loih zumtupawl kha Khrih sungih nunnak ah nehnak nun nei dingih thathnemnak petu an si theh. Timote bulpak hrangah Paul ih a sim bet mi cu, "Atthlak thu elawknak kha hrial aw" (2 Tim. 2:16). Timote ih hnatuannak le thuzirhnak ah ruahnak thuk nei lo ih thusim lo dingah le rinsan tlak rawngbawltu sinak thawn kaihaw ih khua ruat dingah a duh. Hivek thu elawknak hi zumnak langtertu

ziazza ah thathnemnak a um lo ih Pathian tihzah lo nak a suah ter (2 Tim. 2:16). Thutak lawng hi Pathian tihzahnak le zumtupawl lakah remnak a thlenter. Natnak vekin mi a cornater theitu palhnak kha Timote le a minungpawl in an hrial ding mi a si (2 Tim. 2:17). Pathian thu zawn lungte ih thlun hi zirhnak dik lo dodalnak a si (2 Tim. 3:14-17). Zirhnak sual hi kawhhran thlaphannak thlentertu a si.

Kan lakah thenawknak a suahteru zirhnak tha lo kha kawhhran kan si vekin ziangvek in saw kan kilhimawk thei ding?

TLAWNGKAI NINGA

October 12

RUAH BET DING: Bawipa in a hril mi a siahhlawhpawl hrangah zir dingih a tumtah mi cu tuan thawhnak ah a phunkim in rualrem zetih lungrual ding a duh. Hnatuannak ah a phunkim in lungrual theinak dingah mi hrekkhaptawl in an talent le midang talent an tahthim. An ngah mi laksawng hi kanmah thawn hnatuan tlang dingah an sinak a sang tuk an ti mai thei. An theih dingmi cu thutak hnongtu pakhat kha rawngbawltu pakhat in thutak theithiam dingah a zirh thei lo mi kha midang pakhat ih zirhnak in thutak theihthiamnak a nei thei.

An zaten taima zet le lungrual teih hnatuan dingah beisei mi an si. An talentpawl danglam zet hman sehla, an zaten thiang thlarau pakhat ih uk mi an si. An tongmi le an cangvaihnak tinkim ah duhdawtnak le lainatnak an langter ding. Rawngbawltu hmuahhmuah in an umnak hmunah rinsantlak zetin an um ding. Cule Khrih in a dungthluntupawl lungrual zet le pumkhat ih an um theinak ding thla a cam mi hlawhtlintertu tirhthlahpawl kan si dingih mi hmuahhmuah in Jesuh dungthluntu ti ah in thei ding. E.G. Whtie, Gospel Worker. Pp. 483.

REL TLANG DING:

- (1) **A dik mi ziang saw a si timi thusuhnak hi thil thar a si lo, mi pakhat in amai hmuhmi a si. Sanman mi hi a huam kau zet mi an thluak fimmak le an thinlung thuneihnak kha ruahmi thil pakhat nei dingah sawm mi a si. Mi kuthnuai ih um duhlo thinlung put kha Bible in ralrinnak a pek mi a si. Khrihfa kan si vekin kawhhran mipi zaten hivek ih kawhnak ziangvekin kan tong theu.**
- (2) **Siangpahrang Rehoboam ih thanantu ah Israel ram an thenawknak a lang (I Siang. 12). Tuini kan hrangah zirlai himi thu ah ziangpawl a um.**
- (3) **Kawhhran hruaitupawl le memberpawl in mahte ih kawhhran din tum le a pakih um duhnak a um tikah ziangtin kan venghim thei ding. Kha vek ruahdan a karh sinsin lo dingih tuah hi ziang ruangah a poimawh. Korin khua mi hrekkhaptawl vekin bumnak sungah kan luh lonak dingah memberpawl in ziangvek in ralrin kan tul.**
- (4) **Thufim 6:16-19 sungih ruahdan bangawklonak thu kha zir nasa aw. Tualsung kawhhran lungruallonak kilhimdan ding himi ihsin ziangsaw na zir thei?**

THUTLANG KAWM: Bible sungah lungruallonak umdan le fehpidan kan hmu. Pathian zumtupawl in rinumnak le zawnlungnak kan neih ahcun tihnung zetmi lungruallonak a hloter thei. Thuthentu san Rehoboam sanlai ah lungruallonak lamzin an sial zo. Thlung Thar san khalah lungruallonak a um thei dingmi kha a theihter sal. Pathian thu theihfelnak le zawnlungnak ah thianhlimter mi sinak thei felaw in kan lakin a um mi lungruallonak kha a doneh thei ding.

29

30

ZIRLAI 3

October 13-19

AN ZATEN PUMKHAT AN SI THEI DING

SABAT TLAI LAM:

October 13

TUZARH SIAR DING: John 17:1-26; I John 5:19; John 13:18-30; John 5:20-23; Mark 9:38-41; Thup. 18:4; I John 2:3-6.

BIBLE CANG KEN: “**Anmah hrang lawngah thla ka cam lo, an thusim mi ruangih keimah I zumtu ding mipawl hrang khalah a si. Cuti cun an zaten pumkhat an si theinak dingah, Ka pa, nang cu keimah ah na um ih, keikhah nangmah ih ka um bangin, annih khal kanmah ah pumkhat an si ve theinak dingah le nangin I thlah ti leitlun in an zum theinak dingah thla ka cam**” (John 17:20,21 NKJV).

Thuthangtha John in Jesui tuar ding tihnung zet mi le huphurh um ih a theih rori mi le an phiarnak ding thuhlapawl thei thei dingin a ngan. Thuthangtha John bung pangapawl a si mi bung 13-17 sungah Jesui thu zirhmi neta bikih thuhlapawl a ngan ih bung 17 sungah cun puithiam sang a sinak ih thlacannak a vawrtawp a tuah mi a si tiah an ti theu.

Kan Bawipa in hi thlacannak hi raithawinak hrangah khan thawi ding mi rannung vekin le puithiam vekin a pahnih voikhat ih tuah dingmi hrangah tlakaw zetin ti thienglimnak ding thla a cam a si. Cui can ih raithawinak a tuahtupawl aiawh in thla a cam ih, inn tlunta khan ah a

dunghluntupawl thawn hmunkhat ih an um lai ah tetti an khannak a zumtu hmuahmuah hrang khalah thla a cam. F.F. Bruce, The Gospel of John (Grand Rapids: Eerdmans. 1983), pp. 328.

A thlacannak ih a tumtah bik mi cu tirhthlahpawlle an thusim mi ihsin amah zumtupawl pumkhat an si theinak ding hrangah a si. “Anmai hrangah thla ka cam, leilung hrangah thla ka cam lo, nangmah ih I pek mipawl hrangah a si. Ziangahtile annih cu nangmai ta an si. Ka ta hmuahmuah cu na ta an si ih, na ta cu ka ta an si. Anmah ah kei cu sunloih in ka um ding” (John 17:9,10 NKJV).

A thlacannaknak kha fimkhurten thinlung ah kai hnget ringring lo ahcun Khrih ah pumkhat kan si theinak dingah kawhhran ih lungrualnak thuhlapawl reltlangnak in san a nei thei lo ding. Ziang hrangah Jesuh thla a cam? Zawi hrangah thla a cam? Tui ni kan hrangah teh a thlacannak in sullam ziangsaw a neih?

THAWHSAL NI

October 14

JESUH IN AMAI HRANGAH THLA A CAM

Puithiam sangih thlacannak kha then thum in then theih a si. (1) Jesuh Amai hrang (John 17:1-5). (2) A dunghluntupawl hrang (John 17:6-19). (3) Amah zumtu dingpawl hrang (John 17:20-26) ti vek a si.

John 17:1-5 siar aw. A thlacannak ih a thupibik mi ziangha a si. Kan hrang sullam ziang saw a neih?

Jesuh in amai hrangah remnak a tuah hmaisa. Thuthangtha John ih a hmaisa lamah “Jesuh in amai tikcu a kim hrih lo mi a langter (John 2:4; John 7:30; John 8:20).

A tu ahcun thawiawknak ih pekawk can a nai ti a thei. Lei hring nun hmannak can netalam kha hma khatte ah a tleng ih, a mawhphurh mi ah khoh zet ih a um a tul. Curuangah kha mi can kha thlacamnak in can a hmang.

Jesuh in Pathian duhmi tuahnak in Pathian a sunloih ih Cross parih thihnak a tuar suak theinak tla a si. Cross parih a thihnak ding a pom theinak kha khaukhih sinak in a pom mi a si lo. Curuangah Pa Pathian in thuneihnak a hnenah a pek. Martar ih a thi mi a si lo, Pathian hringnun a hmannak thu famkimter dingah amai lung thote in Pathian a sunloih a si. Leitlun sualnak ruangah Cross ah raithawinak ah a pek aw.

John 17:3 thu ih a sim mi vekin kumkhaw nunnak ti mi ziang saw a si? Pathian theih ti mi ih a san ziang saw a si?

Jesuh in a hmaisabik ih a sim mi cu Pathian theihnak ah kumkhaw nunnak a um tiah a ti. Cross parah Jesuh in kan hrang in tuahsak mi ruangah Bawipa kan theihnak tonnun kan neih mi ruangah zangfahnak ih rundamnak kan ngah. Himi theihnak ti mi hi Pa Pathian kha thinlung ih cinken ringringnak ih pehzomnak ihsin a ra. Tawp cin nei minung ih kan theihnak hmang in, thuhla zaten kanmai duhnak lamah kan pial. Asinan, Jesuh tumtahmi kha a famkim sawn mi le a thuk sawn mi a si ih, bulpak in Pathian thawn pehzomawknak a si. A hmaisa Jesuh a rat laiah tangdornak le ngilneihnak ih hruai dingah a si. Cumi in nun ngaitlaihnak a hawl ih, rundamnak thlen theitu Pathian theihnak le lungreal theinak ah in hruai.

Bulpak Pathian theihnak tonnun le Pathian theih ti mi an danawknak ziangso a si? Ziangvek tonnun na neih mi in saw Pathian theihnak nun a lo neither.

TLAWNGKAI NIKHAT

A TIRHTHLAHPAWL HRANGAH JESUH THLA A CAM

October 15

John 17:9-19 siar aw. Jesuh in a dungthluntupawl kha duhsaknak hleice ziangvek a neih ruangah thla a camsak?

Jesuh in a dungthluntupawl hnenah lei taksa thawn reilote lawng a um thlang ding a si ruangah tihnungza an ton tikah an zumnak thlaulonak ding thla a camsak. Cule Pathian kilhimnak tangih um dingah thlacam aapnak a tuah.

Leilung ihsin humhim an sinak dingah Jesuh in thla a cam. Curuangah Jesuh in leilung hrangah thla a cam lo. Ziangatile an thinlung duhdan kha Pa Pathian duhdan thawn an kalhaw (I John 5:19). Leitlun hi tirhthlahpawl ih rawngbawlnak hmun a si ruangah leitlun sualnak le thil tha lo lak ihsin venhim an si theinak dingah Jesuh in thla a cam. Jesuh kha leitlun rundamtu a si ruangah leitlun hrangah helhkamnak a nei ringring. Thuthangtha simtupawl ih tetti khan fehsuaknak ruangah thuthangtha a karhzai. Anmah kha khawsia in pakhatte hman a neh pang lonak dingah Jesuh in an hrang a dilsak a tul mi a si (Matt. 6:13).

A hlankhan ihsin Jesuh in anmai lakah pakhat in I hek ding tiah a ti (John 13:18-30). A ti vekin tirhthlah pakhat cu siatsuahnak a tongih hektu ah a cang. Saam 41:9 ah Judah ih hek dingah simsung cia zo mi thu kha Jesuh in a phuan tikah kha mi thil hrangah Judah kha khaukhihmi a si cuang lo. A netabik zanriah an hil lai ah Jesuh in duhdawtnak thinlung thawn a sawm rero (John 13:26-30). Lantak zanriah an hil laiah Jesuh in a hektu ding kha Pathian a sinak in a phuang suak. Tirhthlahpawl rawngbawlnak ah tel ve dingin a lem rero. Asinan, a netabik

duhdawtnak ih sawmnak kha a ngaihsak nawn lo. E.G. White, The Desire of Ages. Pp. 720.

Sumpai ngainatnak in tirhthlahpawl a thenter ding ti a thei zo. Cuih thil a cangsuak hlanah Jesuh in pumkhatte ih an um theinak dingah thla a cam sak. "A thiaghlim ka pa kanmah bangin annih khal pumkhat an si theinak dingah I pek mipawl hi na hminin kilkhawi hram aw" (John 17:11 NKJV). Pumkhatnak kha milai ih tuah thei mi a si lo, Pathian zangfahnak ih cangvaihnak a si. Pa Pathian le Fapa Jesuh pumkhat an sinak sungah tirhthlahpawl ih pumkhat an sinak hrampi a um. An hmailam hnatauan an hlawhtlinnak dingah pumkhat sinak hi a tulbik mi pakhatnak a si.

Thutak sungih aapawknak le thiaghlimternak a tuah mi kha rawngbawlnak ah a tul zet mi a si. Pathian zangfahnak ih cangvaihnak in tirhthlahpawl thinlung tlengnak an ngah. Pathian thutak theihpitu an si ruangah an nun kha thutak ih danglamnak tuahsak mi a si.

"Leitlun ta an si lo" ti mi ih a sullam ziangha a si? Kanmai duhdan ih kan nun tikah "Leitlun ta an si lo" timi in ziangvek in saw in tuah?

TLAWNGKAI NIHNIH ANMAI RUANGAH I ZUMTU DINGPAWL

October 16

Jesuh in tirhthlahpawl hrang thla a cam theh ah, "Anmai thuthangtha simnak ruangah keimah I zumtu dingpawl hrang khalah thla ka cam" tiah huap kau zet in a tuah (John 17:20 NKJV).

John 17:20-26 siar aw. Thuthangtha ruangih zumtupawl hrangah saduhthahnak tumpi ziangvek a nei? Himi thlacannak famkim ding ziangah a poimawh.
F-3

Pa le Fapa pumkhat an si veikin a ra um lai dingmi zumtupawl pumkhat an si theinak ding khalah thla a cam. Thuthangtha John sungah Pa le fapa pumkhat an sinak ah pakhat le pakhat an rinsanaw ih an tuah mi hmuahhmuah ah an lungreal (John 5:20-23). Pathian in leitlun hrangah fapa siang zetih a pek veikin Fapa khalin hloral ding leitlun hmuahhmuah hrangah duhdawtnak thawn a nun siang zetin a pek ve (John 3:16; John 10:15).

Jesui thlacannak ih a tumta a langter mi pumkhat sinak hi Pa le Fapa karlak ih an neih mi duhdawtnak a si. Pakhat le pakhat nan duhdawtawk a si ahcun mi hmuahhmuah in ka dunghluntu nan si an lo thei ding (John 13:35 NKJV). Duhdawtnak sungah pumkhat an sinak an langter ahcun Jesuh thawn pehzomawknak mipi hmai ah an langternak a si. "A taktak in lungrealnak an nunpi mi in thuthangtha kha sim lo thei loin a tuah". Andreas. J. Kostenberges, John, Baker, Exegetical Commentary, On the New Testament (Grand Rapids: Baker Academic, 2004). Pp. 498. Himi ruangah leitlun mipawl in Jesuh kha runtu le Bawipa tiah an thei. Pumkhat sinak le lungrealnak kha a um rori mi a si. Pathian zumtupawl karlakah duhdawtnak le lungrealnak nei lo sehla leitlun mipawl in thuthangtha ih thutak ziangtin saw an pom thei ding.

Lungrealnak famkim suahpi dingah kumkhaw hmun mi thutak kengtu zumtupawl kha a hruai khawm. Zumtupawl thinlung sungah pumkhat an si theinak dingah Pathian a cangvai. Jesuh kha Pathian thawn pumkhat an si veikin Cross parih a thih hlanah tirhthlahpawl pumkhat si dingah thla a camsak. Ziangatile Fapa kha Pa Pathian thlah mi a si ti an zum theinak dingah a si. Himi hi sankhat hnu sankhat a lang vivo ih, a tu kan san khalah a thleng ve. A tongsuak mi cu, "Hitawk ih a umpipawl hrang lawng

a si lo, thu an simmi ruangah keimah in zumtu hmuah-hmuah hrang khalah thla ka cam a si” a ti.

Jesuh ka thlun a tiawtu ngaingaipawl in an nunah himi thlacamnak famkim dingin taimak an suah ding. E.G. White, Testimonies for the Church, Vol. 4. Pp. 17.

A tui kan dinhmun ihsin kawhhran nun le bulpak nundan ah lungrualnak um dingin ziangvek in saw tan kan lak ding? Kawhhran in pumkhat sinak a neih ngaingai theinak dingah mai tanghma sialnak ziangtluk in kan hlon a tul?

**TLAWNGKAI NITHUM
KHRIHFAPAWL LAKAH LUNGRUALNAK**

October 17

Mark 9:38-41 le John 10:16 siar aw.Jesu thluntu pawl ih umdan ding ah zamrang tukih thuthen catnak le ruahnak pakhat lawng neih nak thu ah Jesuh in ziangtin a sim?

Seventh-day Adventist-pawl in John 17 sungih Jesui thlacamnak kha an theihthiam ih an kilhim theinak dingah kawhhran hminah an hmang. Vancungmi pathum thucah leitlun ah phuan ding kan mawhphurh a si ih, kan hlensiak theinak dingah lungrualten kawhhran um a tul. Himi zawnah engtai awknak a um thei theu.

Khrihfa kawhhran dangpawl thawn lungrualnak neih hi ziangbang saw a si? Jesui thlacamnak fehdan ihsin anmah thawn ziangtin pawlkomawknak kan tuah ding?

Kan kawhhran sung si lo mi kawhhran dang khalah Pathian in a hrang rinum zet mi pawl a nei ti hi mangbang ding a um lo. Bible ih a simmi cu Babulon khalah a hrang rinum zet mipawl a ret ti fiangten a lang. “Ka minungpawl kha an hnen ihsin ra suak uh, a sualnak sungah tel ve

hlah uh, hremnak a tuarnak sung khalah tel hlah uh” (Thup. 18:4 NKJV).

Thuphuan bu sungih kan theihmi thuhla vekin Jesui hmin saltu mi tampi lak ihsin phatsannak nasa zet a um. Ni neta ah Khrihfa fehsualpawl lungrual zetin pakhat le pakhat an komaw (Thup. 13:1-17) sungih thu vekin ram uktui thusuah mi an fehpi dingih hremnak an suahter ding. Curuangah Adventist-pawl cun kawhhran dangpawl thawn lungrual ih umtlang ding sawmnak parah fimkhurten kan um a tul. Hivek phun hi saklaw cangvaihnak ihsin a lang ding.

Khrihfa tiawtu kawhhran dangpawl thawn ziangvek in kan pawlkomaw hai ding. E.G. White ngandan ahcun: “Hivek thu lawngah Seventh-day Adventist-pawl in Khrihfa kawhhran dangpawl thawn hnatiuan tlang theih a si”. Milai aiawh ih hnatiuan fial mi vekin a thinlung duhnak kha Pathian duhnak ih pe thehtu, Thiang Thlarau forhfialnak in thinlung sung ihsin tuan lo thei loih a ummi lawngah tuan a si ding. Pakhat in langter sehla, W.C.T.U ti mi Khrihfa nunau suupawknak pawlkom vek hi kan hrial ding a si lo. Hipawl thawn kan pawlkomawk ahcun ei in suupawknak lamah danglamnak a um lo, ni sarah ni ulhnak dinhmun thawn tla a kaihaw. Suupawknak thupawl tla an duh theinak dingin kan sim thei ding. Hipawl hi kanmah thawn pawlkomaw dingah kan sawm ding. Suupawknak thusuhnak ah hnangamte ih sawn thei dingin an bomnak kan tul. Anmah thawn kan komawk ahcun thiang thlarau in an thinlung sungah thutak thunluh a duh mi kha an thei ngah ding (Welfare Ministry, pp. 163).

Khrihfa dangpawl thawn pawlkomawkdan in theihter dingih, can dangte a nei mi thuhla ih thusuhnapkawl ti phisiin dan in bawm ding.

(1) Tluangtlam zet, phur zet le nelum zetin an hnenah hna kan tuan ding, (2) anmah thawn kan pawlawk lo ahcun kan tuah theu mi le kan zumnak an thei lo ding ruangah anmah kan komngaih ding. (3) Thutak sunglawi thlawsuah pek mi kan si ih, midang hnenah pesuak sal dingah anmah thawn kan pawlaw ding.

**TLAWNGKAI NILI
DUHDAWTKAUNG SUNGIN ZUMNAK PAKHAT ZEMSUAK-NAK**

John 17:3 sungah Pathian theih hi kumkhaw nunnak a si tiah a ti. I John 2:3-6 siar aw. Pathian theih ti mi ih a sullam ziang a si? Nitin kan nunah Pathian thei ti mi ziangtin kan nunpi ding.

Tui san pawlkomawknak sungih umpawl in vancung ram mi sinak kan nei an tiaw theu. Hipawl in Pathian thukhaam ah daithlang in an um. Pathian thukhaam (10) kha zangfahnak ruangah hnon a si zo tiah an ti. Thukhaam thlunnak hi Pathian thei tinak a si lo. Bible zirhdan khal a si lo. Pathian thu tlun timi hi Pathian le Jesuh theihnak le anmah kan duhdawtnak hminsinnak a si. Cuiruangah Pathian thei timi hi zumnak thu zirhnak ih theihnak men a si lo, nun ziaza tiang a thunun mi a si. "Ekkehardt Mueller, The Letters of John (Nampa, Idaho: Pacific Press, 2009). Pp. 39. Jesui simdan ahcun, "I duhdawttu cun ka thukhaam an tlun ding" (John 14:15,21 NKJV). Himi ihsin Pathian fatepawl kan duhdawt ti kan thei. Pathian kan duhdawt ih a thupekawl kan tlun. Ziangatile Pathian duhdawt timi cu a thupekawl kan tlun hi a si. A thupekawl cu an khirkhan lo (I John 5:2,3 NKJV).

John 13:34,35 siar aw. Jesuh in dungthluntupawl hnenah thukhaam thar a pekmi ziang a si? Jesuh dungthluntupawl karlak ah lungualnak thawn ziangtin saw an pehawk?

Venghen duhdawt ding timi kha thupek thar a si lo. Pathian in Mosi hnenah a pek zo mi a si (Pui. 19:18). Himi thu ah Jesuh in anmah a duhdawt vekin dungthluntupawl an duhdawtaw dingih a zirhnak kha a tharin mi zirhnak a si. Nun phatsan in raithawinak a tuahtu Jesui duhdawtnak zohthimnak in Khrihfa pawlkomnak ah ziaza thar nun phatsannak zirhnak a si.

Jesuh in duhdawtnak kha a nunin a langter, himi hi a mak zet mi ke kardan thar in zirhnak a si. Duhdawtnak tuahdan hi a pumhlum ih zangfahnak a si. Cumi ah nun phatsanaw ih pumpekkawknak a tel. Duhdawtnak thawn mi hrang thiltha tuahnak ah pumpekkawknak kha Jesuh in a langter ringring timi vun mitthlam hnik. Khrih umdan vekin amah zumtupawl pakhat le pakhat hnenah Khrih in cangvai dingin a tuah. Cumi ihsin hmual nei zetih tettikhannak ah duhdawtnak in hna a tuan. Kanmai lakah lungual dingin duhdawtnak in hmual nei zetin a cangvai.

Mah phatsanawknak nun midang hrangah Jesui duhdawtnak a langter mi vek kha langter dingah ziangvek in saw kan zir ding?

TLAWNGKAI NINGA

RUAH BET DING: Seventh-day Adventist kawhhran hi tualsung kawhhran tampi komkhawm in leitlun pumhuap kawhhran a si. Asinan, Adventist-pawl hi Khrih ahcun huam kau kawhhran (Mitha thawn, tha lo thawn zapi um theinak) an ti dah lo.

Huam kau kawhhran hi sakhuank kawhhran hnakin a huam kau sawn. Cumi ah Jesuh thluntu tiih sal

awtu hmuh thei ih um mi le hmuh theih lo ih um mi tiangin a huam theh. Himi zirhawknak danglam zet uartupawl kha Khrihfa karlakah phatsantu tiah ruah mi an si. Thuphuan 12 ih kawhhran thianghlim kha Thuphuan 17 hlawhlang thaw cun a kalhaw tuk. Babulon khaw ropi kha mipa timi tuufa thawn a kalhaw ih khawpi thianghlim timi Jerusalem thar thawn khal a kalhaw. Kum zabi pakhat laiah a lamdang zetmi kawhhran timi kha mithmuh in a rak um lo. Kawhhran hramthoknak kha kum zabi a laifang hrawngah a siih hmuh dingah a ol lo mi a si.

Curuangah Adventist-pawl in Pathian kawhhran dik kha ammai kawhhran lawng ah rithen neiin an pom lo. Khrihfa kawhhran dangpawl khal Pathian kawhhran dik a si tiah huam kau in an ti fawn lo. Pathian kawhhran dik sungih a umtupawl in bulpak in Jesuh kha an zum rori ding, annih cu Pathian ih theih mi an si. Adventist-pawl hi Thuphuan 12:17 sungih a tang sun timi can netnak ih Pathian zumtu, hmuh thei mipawl an si (Thup. 12-14). A tang sun timi hi tualsung kawhhran a si ih, phundang zetih ziazza neitupawl an si (Thuphuan 2:24 le 12:17). Ekkehardt Mueller, The Universality of the church in the New Testament, in Angel Manuel Rodriguez, ed, and Message, Mission and Unity of the Church (Silver Spring, Md: Biblical Research Institute, General Conference of Seventh-day Adventist, 2013) pp. 37.

REL TLANG DING:

- (1) **John 17 sungih Jesui thlacamnak famkimnak dingah kan kawhhran hi zianga a pawimawh? Kum zabi pakhat laiil kawhhran umdan ah zianga Jesuh in lungrual ding a duhsak. Tuini kan kawhhran sungah teh duhsaknak a nei maw?**

- (2) **Khrihfa dangpawl thawn tualsung na kawhhran-pawl hi hna an tuan tlang maw? Khami ih a thatnak ziangsaw a si? Anmah thawn ziangtin kan tuantlang ding. Thutak thei dahlotupawl hnenah thutak kan phuansuah theinak dingah ziangtluk ih can tha sunglawi saw a si?**
- (3) **Himi thu hi doawknak mak cabu sungah phundang zetin ziangtin ha a sim? Himi hi kan karlak ah ziangtin si kan tuahsak ding? Pathian zumtu ka si tiah a sal ngamawtu cun Pathian thu ihsin tleunak an ngah mi a teuter ding. Lungrual dingin Jesui thlacamnak hlawhtling dingah remnak hri in tangrual ringring dingin thlarau ih temkhawm mi kan si tiah tirhthlah in a ngan. Cumi cu taksa pum pakhat, thlarau pakhat, ruahsannak pakhat, Bawi pakhat, Baptisma pakhat lawng a um mi sungah kawhmi kan si (Efe. 4:3-5). E.G. White, The Great Controversy, pp. 379.**

TLANGKAWMNAK: John 17 sungih Puithiam sang sinak ihsin Jesui thlacamnak kha tuisan kawhhran tanrualnak thu ah Jesuh in a helhkam ti in theihter. Jesui thlacamnak kha kan thlacamnak sisehla, a nungmi Pathian thu sungah kan zumnak funkhwam thei dingah kan zum ding. Mikip thawn pawlkomnak ah pakhat le pakhat kan duhdawtaw ding. Cule Khrihfa kawhhran dangpawl in a danglamaw mi kan thurinpawl an thei thei ding.

ZIRLAI 4**October 20-26****TANRUALNAK DINGIH A HRAMPI****SABAT TLAILAM****October 20**

TUZARH SIAR DING: Efe. 1:3-14; Gal. 4:7; Efe. 2:11-22; Efe. 4:1-6; Matt. 20:25-28; Efe. 5:15-6:9.

BIBLE CANG KEN: “**Amah ih tumtah mi a lungawi zawng vekin a lungduh thuthup cu kan hnенah in theihter. Can bikhiah a kim tikah thil ziangkim van ih um siseh, leilung ih um siseh, Khrih amah rori ah a finkhawm thluh theinak dingah a si**” (Efe. 1:9,10 NKJV).

Efesa khua hi Asia nitlak thlanglam ramah (Asia minor) ah sumdawnnak hmunpi thu nei thei zet mi khua a si. Efesa kawhhran hi hnatiuan a phunphun tuan mi Judah miphun le Zentail-pawl ih din mi a si. Khrih taksa pum a si mi member-pawl kha lungruaing ding an si nan, leitlun ih um an si vekin zumtupawl an nundan a bangaw lo, lamdang zetih ei hawl hnatiuan an si ruangah dodalawknak an tong. Curuangah Khrih dungthluntupawl lakah lungruaing kha a pawimawh bikah a ruatih cumi ruahsan in Efesa cakuat a ngan.

Paul in lungruaing ding tafung pahnih a nei. (1) Judah le Zentail komkhawm in Khrih taksa pum a si mi kawhhran ah lung rual ding. (2) Lei le van thil ziangkim hi lungruaing zetin Khrih ah pakhat si theh ding.

Lungruaing hrampi cu Khrih a si. Paul ih fehpidan ahcun Khrih sungah (or) Khrih thawn ti mi hi mi

cakuat sungah tampi in a hmang. Khrih nunnak, thihsnak a thawsalnak thawngin kan hrangah Pathian ih in tuahsak zo mi thawn a remaw zet. Pathian ih a tumtah mi vawrtawp rundamnak hi Khrih thawngin thil hmuahhmuah lungruaing ih um salnak ding a si. Himi lungruaing hi lei can cem tik lawngah tuah famkim ding mi a si.

THAWHSAL NI**October 21****KHRIH SUNGIH THLAWSUAHPAWL**

Efesa 1:3-14 siar aw. Paul ih a simmi vekin Khrih sungah ziangsaw pek mi kan si.

Jesui dungthluntupawl hi Pathian thangthat rero ding a si. Ziangatile leitlun ah amah ai-awhtu ding le a duhdawt mi a fanu le a fapa ah hril kan si zo. Paul in Khrih ruangah Pathian thawn pehzomnak a tharih kan neih mi mitthlam ih hmuthiam dingin tampi a ngan. Himi zirlai in hril kan sinak ruangah pumkhat sinak ding thupi ah a hmang. Khrih ruangah hril mi kan si ih, Pathian sungkua ih tel kan si. Pathian sungkua ih tel timi in Israel-pawl thawn thukam roco mi kan sinak a langter. Jesuh kha Messiah ih pomtu Zentail-pawl tla Pathian fa an si ti Paul in a cakuat ah a ngan duhmi a si. Israel-pawl thawn thukam ro cotu kan si (Rom 8:17; Gal. 4:7). Khrih thawn pehzomnak ih a thathnemnak kha Khrih hram bunin Khrihfapawl lungruaing ding a si. Khrih sungah mi hmuahhmuah komaw ding hi hlanlai ihsin Pathian lunghlitum a si. Jesuh kan theihnak ruangah Pathian sungkua kan si ih, dinhmun hleice ruat sak bik mi a um lo. Kan zaten Pathian fa kan si theh ih a duhdawt mi le a ngaihsak mi kan si theh.

Efesa 1:5,11 ah Pathian in ziangkim a ruat lawk theh (Khaukhih) ti mi thu ah mi hrekkhat cu an buai theu.

Rundamnak thukam tuahmi ah Pathian in rundam ding mi le hloralnak hell feh dingih ruat lawk mi a um tiah an simfiang. Bible in hivel in a zirh lo. Pathian in leilung sem hlan ihsin mi hmuahhmuah rundamnak ngah dingih ruat cia mi a si. "Pathian in leilung tlun a duhdawt tuk ruangah a Fapa neih sun a pek. Zokhal amah zumtu pohpoh cu hloral loin kumkhaw nunnak an neih theinak dingah a si" (John 3:16 NKJV le I Tim. 2:6; 2 Pet. 3:9 tla zoh aw). Pathian cun a pek mi rundamnak zo in cohlang in a pom ding timi lawng hlanpi in a theih cia mi sawn a si. Pathian in mi pakhat ih thuthen catnak uk ta hrat in a khawkhannak ah feh dingin a hnek lo. Khrih ih in tuahsak mi rundamnak laksawng kha mi hmuahhmuah hrangah a si. Thusuh theinak cu, "Rundamnak laksawng ziangvek in so kan cohlang ding?" Pathian in a rundamnak ngah dingah hnek mi a nei lo.

Van ih khawkhangtu in minung hrangah ziangkim lai a relsak theh. Thu lunglo in sual an tuah nan, an thi cuang lo. Jesuh kha anmah aiawhtu le aamah khangtu ah an pom ahcun Pathian fa ah ruatsak zo mi an si. Amai lungkim in amai hrangah a tuah. Pathian saduhthah cu mi hmuahhmuah rundam ngah dingah a si. Minung tlannak dingah Pathian in a fapa neihsun a peknak hi a tul mi hnakin a luangliam mi a si. Jesuh thawngin Pathian fa sinak pek mi cohlang duh lo ah cun an hloral ding timi vekin an hloral ngaingai ding. (E.G. White, Comment, The SDA Bible Commentary Vol. 6. Pp. 1114).

**TLAWNGKAI NIKHAT
PHAR DAWL A CIM**

October 22

Miphun le sakhanak in milai karlak ah thenawknak nasa zet a thlenter. Pawlkomawknak ah phun

le hnam hminsinnak siseh, sakhanak sungtel hminsinnak a um theu. Hivek minungpawl in an nitin eihawlnak sirhsan in khamawknak (or) co tha ngahnak thawn an zomaw ringring. Ral donak thubuai a um tikah hi vek lamdangzet hminsinnak neitupawl mi thinlung thotertu an si ih, hrem le thah an tong hleice.

Efesa 2:11-22 sungah a tha mi Khrihfa pawlkomawknak pawlin a langter. Kan danglamnak hin Khrih sungih kan lungualnak ziangvek in a siatter. Jesuh thihnak in a thiatbal mi ziangsaw a si?

Efesa khaw mipawl kha Paul in Jesui zarah Pathian zangfahnak an ngah hlanih an nundan ruat kirsal dingah a sim. Phun le hnam sakhu le nunphung danglamnak in huatawknak le ralawknak mipyi lakah a suahter. Asinan, thuthangtha cu Khrih hnen ihsin a raih, mi hmuahhmuah rundamtu le Bawi pakhat ah danglamnak um loin miphun khat kan si. Pathian fatepawl kan si: "A tu ah hla zetih um nannih cu Khrih Jesuh ah Khrih thisen in naite ah a lo umter" (Efe. 2:13 NKJV).

Hlanlai Jerusalem biakinnpi ah theidannak phardawl a um ih, Judah miphun lawng luh theinak khuan a dangten an nei. Cuih pharah hminsing ding ca ngan mi cu ramdang mikhualpawl sungsintual ah luh thei a si lo timi a si. A luh pang a si le thih tiang tuahmawhnak a um thei timi a si. Paul kha ramdang ah Missionary in khual a tlawng hnu ah biakinn sungah a lutih himi danpawl in sual puh a tong. Paul kaib a tonnak kha Efesa khua mi Trophimus kha (Tirh. 21:29) Judah-pawl hrang lawngih tuah mi sungsintual ah a hruai ruangah a si. Himi cakuat sungah Paul in thu a suahpi mi cu "Khrih ah miphun pahnih kha pakhat ah a kom zo ih, kan remnak Khrih a si ruangah a lai ih phar dawl mi a cim theh zo" tiah a ti (Efe. 2:14 NKJV).

Zumtupawl kha Khrih sungah cun Abraham tesina
kan si theh ih, thinlung serh tan mipawl kan si tiah a ti.
Khrih zumtupawl ih thlarau lam vunzim tannak
khiihmuhnak ah Pathian in Abraham hnenah taksa ih
vunzim tan ding thu a pe (Danp. 10:16). Amah thotho ah
nannih cu Khrih serhtannak zarah tisa sualnak taksa cu
ret hlo in kut tel loih tuahmi serhtannak thawn serh tan
sak mi nan si (Kol. 2:11 NKJV).

Efesa 2:11-22 siar aw. Hitawk ih Paul cangan mi ah a taktak in kan kawhhran ih kan ton mi ziangsi a um? In theihter mi sawmnak kha ziangsaw a si?

Paul cun Efesa cakuat sungih a simmi vekin a nun in a tuah. Judah le Zentail karlak ih phunhnam le nunphung thleidannak pumkhat ih komnak a si. Hi thil ummi hi phuahcop thuanthu le ruahnak men a si lo in norsuak ngaingai tu a si. "Kawh nan sinak thawn milaw in nung dingah ka lo sawm" tiah a ti (Efe. 4:1 NKJV).

Efesa 4:1-3 ih thu um mi vekein Kawhhran sinak thawn milaw in Khrihfapawl in ziangvek in saw an nun ding?

Pathian zangfahnak ruangah lenglam ih nunze mawi le tha a lang theinak dingah Khrihfapawl ih sunglam nunah bawmtu a um. "Remnak hri ih temtawnnak ahcun thlarau ah tanrualnak nei ringring uh" (Efe. 4:3 NKJV). Himi hi duhdawtnak ih a hram a sih ruangah thil cang suak mi a si (1 Kor. 13:1-7). Duhdawtnak ih cangvaihnak ruangah unau za pehzomawknak a kilhim ih Khrihfapawlkomnak ah lungrualnak a um sinsin ih kawhhran lenglam tiang a thleng. Kawhhran sung lungrualnak in Pathian duhdawtnak a

langter ih, danglam zetin midang hnenah theihpitu an si theinak a si. Hivek ih theihpitu si dingah kawhhran hi kawhsuak mi a si. Lungrualnak hi raldo ih buainak siat ton can le thentheknak a um canah a tul hleice.

Efesa 4:4-6 siar aw. Himi cang pathum ah a thupibik cang thlan ziang a si?

Kawhhran sung lungruualnak kha himi bungih cang hmaisabik ah Paul in uar zetin a fehpi. Lungruual dingin a hram a thok ih (Efesa 4:1-3), zumtupawl lung rualih an um cun an cangvaihnak ah a lang ding (Efe. 4:4-6) ih rinumnak ih hnatuannak kha an kilhim ringring ding (Efe. 4:1-3). Cumi cu ngah kan tum ih, kan zuam rero mi kan tumtah a si (Efe. 4:13).

Tirhthlah in thutak an hnenih a simmi kha hmual nei zetih nunpi dingah a forh. Rundamnak lungawinak le Khrih nunzia langternak ah thin nemnak, zawnruahnak, zawi theinak le duhdawtnak an langter ding. Zumtu member hmuahmuah kha Khrih ruangpum an si vekin zumtupawl cu ruahsannak pakhat le thlarau pakhat ih lung thoter mi an si. Thenawknak hi Khrih sakhuhanak upat lonak a si ih, ralpa ih ziaza anmahte ih thiam an coawknak thu kha leilung mi hmai ah a langter mi a si. Paul in anmai sanih kawhhran hrang lawngah cakuat a ngan lo. Pathian in amai duhzawng in kan hnenah a run thlah mi a si. Remnak ih temkhawm mi sungah lungrualnak tunghmun ringring dingin ziangpawl saw kan tuah a tul? E.G. White, Testimonies for the Church Vol. 5. Pp. 235.

“Kawh nan sinak thawn milaw in nung dingah”.
A dik ciahin ka nung timi thei fiang dingin a tu ah
duuhhrlnak ziangvek saw na tuah ding?

TLAWNGKAI NITHUM
October 24
KAWHHRAN HRUAITUPAWL LE LUNGRUALNAK

“Khrih ih thil pek tahnak vekin ngilneihnak cu kanmah bulpak cio ah pekin a um” (Efe. 4:7 NKJV). Rundamnak laksawng hi a latupawl lawngin an congah. Cule thlarau laksawng pawl kha tumtah mi neiih pek mi an um.

Efesa 4:11 siar aw. Kawhhran hruaitupawl kha Pathian in ziangvek laksawng a pek?

Efesa 4:12 ah Kawhhran hruaitupawl hnenah a hlei in ziang laksawng saw a pek. Himi laksawng pumpak cio ah ziangtin saw an pehawk.

Khrihfa hmuahhmuah in thuthangtha phuannak ah Pathian riantu kan si ti an thei. Matthai 28:19,20 ah fehsuak dingih fialnak kha Khrihfa zate ih fehsuak ding mi a si. Mipun hmuahhmuah kha Pathian tirhthlah siter dingah zirhih tihnimnak pek dingah fial mi kan si. Rawngbawl dingih kawhnak hi co tha ngahnak le Pastor le evangelist-pawl lawngin Khrih hmin cawitu dingih kawhmi an si lo.

Thuthangtha karhzaiter hnatuannak ah olh mi a um lo, kawhhran hruaitu khal in kan hnatauan a si lo an ti lo ding. Hruaitupawl ih thlarau laksawng an don mi kha an nunah a lang ding a si. Hruaitupawl cu thangso ding le lung rual dingah mi forhiah tha petu an si.

Kawhhran hruaitupawl ih laksawng an ngah mi fehdan atlangpi in a ngan ih, Pathian minungpawl in hloral fapawl hnenah an thlen theinak dingah khawkhannak neihaktu an si. Midangpawl ih rawngbawlnak hlawhtling dingah tuanvo pek ih kawhmi kawhhran sungah a um. Rinnak le Pathian fapa theihnak ah kan zaten lungrual in kan um ih, Khrih famkimnak tahnak ah mipitling kan si

theinak dingah (Efe. 4:13 NKJV) Khrih ruangpum langtertu a si. Hruaitu umdan zohthim ding Jesui in pek mi in ziangti ih rawngbawl ding a si ti in zohter. Jesuh cu mi riantu dingah a ra ih, renmi si dingah a ra lo (Matt. 20:25-28). Amah vekin kan um ding a si.

Midang hrangah mawhphur duh loin mahte ih um duh le midang rinsan duh lo thinlung nei mi an um. A hleice in nitlaknak ram lamah khin lungrual lonak natnak hri a leng. Paul in Khrihfapawl hi leitlun ah mahte lawngih um kan um lo ti in theihter. Zumnak ah pawlkomnak kan nei thei, thlarau lamih hruaitupawl thawn pakhat le pakhat forhawknak nein kan um thei. Kan zaten Khrih ih taksa pakhat sungah remkhawm mi kan si.

**Thlarau laksawng na ngah mi ziangso a si?
 Tualsung ih na kawhhran lungrualnak dingah ziangtin na hmang.**

TLAWNGKAI NILI
October 25
KHRIH SUNGAH MINUNG KAN LAI CINAWKNAK

Khrihfa sakhua hi laicinawknak a si. Pathian thawn siseh, minung pakhat le pakhat pawlkomnak a si. Pathian thawn pawlkomnak hnakih thuk sawnin midang thawn pehzomnak an nei thei lo. Khrihfapawl hi hmun pilril ah mah lawngih um mi a si dah lo. Paul in Efesa cakuat sungah lungrualten ziangtiin kan pawlkomaw ding timi rel tlang ding thu a suahpi.

Efesa 5:15-20 siar aw. Cang 21 ah Paul in kan hnenah ziang saw in sim? Phah niamawknak le lungrualnak an pehcihdan ziangvek ha a si?

Paul in tangdor ih um cio dingah a forh theu. Efesa 5:18 ih “Thlarau thawn khat sawn uh” timi thawn a peh cihaw. Thlarau thawn khah liamnak nunin tangdornak nun

a neither. Nun ngaitlaihnak nun a si ih, midang zawn ruatih midang hrangih khawruahnak neihnak a si. Himi hi milai (suahkeh) nak ihsin a ra loih thiang thlarau in thinlung sungih cencilhnak ih suak mi a si. Khrih sungah pumkhat ih a umtupawl in thlarau thilpek laksawng an ngah. Tangdornak hi sunglam nun lenglam ah mithmuh ih a langmi a si. Cumi cu Khrih le amah in kan hrangah nun a peknak tihzah upatnak a si.

Efesa 5:22-6:9 siar aw. Himi nun ngaitlaihnak ih pawlkomawknak ah kan milaipi, kan innsang, kan hnatuannak hmunah Khrih sungah zumtu kan sinak ih a thatnak a langmi ziangsaw um?

Kawhhran sungih lungrualnak kha mai innsang ciarih lungrualnak ah a thumaw. Khrih in kawhhran a duhdawt in a nun a pek bang tukin, pasal in a nupi parah duhdawtnak a langter ding. Nu le pa duhdawtaw ih tihzahawknak hi Paul ih a sim mi pumkhat sinak a si. Jesui neihmi tihzah upatnak nun zia kha mai innsang le kawhhran ah kan neih a tul. Tihzahawknak hi mai nupa karlak ah a tul vekin kawhhran par khalah a tul ve. Khrih vek nun ziaza hi nupa karlak ah fatepawl hnenah siseh, hlawhfa le a fialtu karlak khal ah siseh a lang dingih a si. Hnen-um le inntek lak khalah a um ding. Hivek remnak le daihnak ih a ciahneh mi innsang ihsin kawhhran nun a ciahneh ve.

Tuni kan Bible cang ihsin na innsang le na hnatauanipawl hnenah le member-pawl hnenah ziangvek nun zia nei ding na si ti theithiam dingah a lo bawm.

TLAWNGKAI NINGA

October 26

RUAH BET DING: Khrih in miphun upa le dinhmun sang timi thleidannak a nei lo. Cazi-pawl le Farasi-pawl in van laksawng hmuahhmuah le leitlun ih Pathian fapawl an zate F-4

komih hlawknak zaten tualsung le miphun hlawknak ah tuah an duh. Cuih thleidannak phar dawl kha Khrih a ra ih, a thiat bal theh. A zangfahnak laksawng le duhdawtnak a langter mi cu rikham nei lo in a ro mi leitlun hningter sal tu ruah le daidaw vekin a um a si.

Bawi Khrih nunih a din mi sakhu kha phun le hnam, Judah sakhanak le Zentail miphun, Bawi phun le sal phun, um lo kan zaten unau za kan si theh ih, Pathian hmai ah danglumnak kan nei lo. A fehpi danih hruainak ah buainak a um lo. Mikhual le rualpi le ralpa karlak ah thleidanawknak a tuah ve lo. An thinlung sung ihsin nunnak ti nungin duhpawl kha a ko sawn a si. E.G. White, Testimonies for the Church Vol. 9. Pp. 190,191).

REL TLANG DING:

- (1) **Efesa 4 sungah tluangtlam zet le fiang zetin Pathian khawkhannak a langmi kha Pathian fate hmuahhmuah in thutak ih an din hnget theinak dingah a si. A sim duhmi cu kawhhran sungah lungrualnak a um ringring theinak dingah a si. Cu cu memberpawl in leitlun ah a harhdam mi sakhu nundan an langter theinak dingah a si. E.G. White Comment. The SDA Bible Commentary Vol. 6. Pp. 1117. Kawhhran lungrual theinak dingah Efesa 4 ah a langter mi ziang nahmu thei? Kawhhran lungrualnak dingah ziangtin kan bawm thei ding?**
- (2) **Lungrualnak dingin a tulbik mi cu tangdornak le nunnemnak a thupi bik. Cui ziaza um lo cun kawhhran sungah lungrualnak ziangtin saw a um thei ding? Kan porhawk ahcun midang thu kan ngai pah lo dingih lungrualnak a um thei lo ding.**

**Himi tangdornak le nunnem thinsaunak hi ziangtin
kan zir thei ding?**

- (3) **An parah ziangkim ah lungkimnak kan nei thei lo
hmanah lungruanak ziangtin kan hawsuak thei
ding?**

TLANGKAWMNAK: Efesa cakuat sungah Khrih sungah Khrihfawl in sinak ziangvek nei dingin forhnak a um. Jesuh ah runnak kan ngah mi in kan nun a danglamter ih ziazza a thleng theh. Midang thawn tlanlennak ah danglamnak a um vekin kawhhran sungh unaupawl hnen khalah a lang. Cumi cu Khrih thiltitheinak in nun a thleng mi a si. Cuih nun thlengnak cu lungreal thei dingah a thupi bik a si.

ZIRLAI 5

October 27- November 2

KAWHHRAN HMAISA AH LUNGRUALNAK TONNUN

SABAT TLAI LAM:

October 27

TUZARH SIAR DING: Tirh. 1:12-14; Tirh. 2:5-13; Thup. 14:12; Tirh. 2:42-47; Tirh. 4:32-37; Tirh. 5:1-11; 2 Kor. 9:8-15.

BIBLE CANG KEN: “Tirhthlahpawl ih zirhnak ah le pawlkomawknak ah sang an phelaw ih thlacamnak thawn hnget zetin an um vivo” (Tirh. 2:42 NKJV).

THUTAK a si mi Jesuh sung ihsin thlarau lam hmuhton an neih mi simawknak ihsinkawhhran ah lungrealnak a um. “Keimah hi lamzin, thutak le nunnak ka si. Keimah ihsin lo cun zohman pai hnen an thleng loding” (John 14:6). Thlarau lam nun ramah tonnun bangaw nei mipawl kha hmun khatah a feh tlangih hnget zetin an um. Miller ih thuzirhnak a thluntu Adventist hmaisapawl khalin kha vek hmuhton an nei ve. A rapthlak zetmi beidonnak hmuhton an neih mi ih a phi an hawl hmuh mi cu 1844 ah a bangaw mi hmuhton an neih mi ihsin thinlung hmunkhat ah an temaw khawmmi ruangah a si. Himi tonnun in Seventh-day Adventist kawhhran a semsuah ih Jesuh ratsal hlanih thu then lawknak le kha mi hrangih a tul mi thutak pawl kha an hmu suak.

Jesuh van kai hnu ah a dungthluntupawl in hmuhton an neih mi tettikhan nak hmual neighteru kha thlacamnak rualrem zetin Pathian thu ah pawlkomawknak

ihsin lungruualnak ruang ah a si. Cutin nun danglam zet a nei. Zumtupawl kha hmun khatah lungruualten an um. Cuih hmuhton cu tuini tiangah a um ringring.

Lamdang zetih an pawlkomawknak thu kan sim ahcun Pathian biakkhawmnak ihsin a suak ... zumtupawl thlarau lam nunram ih an funkhwawknak le Jesuh sungah an luang lut theh theinak hmuh ding Khrihfa hrangah a dang a um lo ... Jesuh in a hnenah a hruaikhawm hmaisa ih amai taksa ruangpum ah zumtupawl a funkhwawm mi kha kawhhran a si. (Robert. G. Rayburn, Ocome, Let us worship, Grand Rapids: Baker Book House, 1980). Pp. 91.

**THAWHSAL NI
TIMTUAHAWKNAK NI AH**

October 28

Jesuh in a thih hlanih a can netabik kha a dungthluntupawl thawn a hmang ih, nanmah lawngin ka lo tanta lo ding tiah thu a kam. Hna nan tuannak hmunah lo telpi ih lo bawmtu dingah Thlarau Thianghlim ka lo pe ding tiah a ti. Cui Thiang Thlarau in Jesui a rak simmi thupawl le a tuah mipawl theithiam sal dingah a bawm (John 14:26). Thutak tampi theisuak sinsin dingah a zirh (John 16:13). Jesuh van a kai ni khalah cui thu a simsal. "Tui hnu ni reilo te ah Thiang Thlarau baptisma pek nan si ding. Thiang Thlarau nan parih a thlen cun huham nan ngah ding" (Tirh. 1:5,8 NKJV). Tirhthlahpawl in Jerusalem ihsin Judia ram, Samaria ram le leitlun hmuahhmuah ah thuthangtha sim theinak dingah thiang thlarau pek an si (Tirh. 1:8).

**Tirhthlah 1:12-14 siar aw. Himi ni hra sungah
Tirhthlahpawl in ziang saw an tuah?**

Himi nihra sung hi thlarau lam timtuahnak a si ti kan theithiam ko ding. Jesuh thihnak, a thuzirh mi le

mangbangza a tuah mipawl kha theisuak salih an sim theinak dingah zirhsal an si. "An zaten thinlung hmunkhat puin thlacannak le dilnak an nei" (Tirh. 1:14).

Thu a kam mi famkim ih a thlen an hngak laiah, an rak zumlonakpawl an phuangaw ih tangdor zetih thinlung sung ngaingai ih sual sirnak an nei. Jesui thih hlanah thu a rak sim mipawl theisuak sal dingah an duh mi kha an ngah. Amah an rak theihsual ruangih an mawh siatnakpawl tla an thei aw. Mangbangza a nunnakpawl kha an mitthlam ah a hung lang rero. Jesui nun thianghlimnak, soisel kai loih a umnakpawl an ruat ih, an mitthlam in an hmuh rero tikah an ton mi harsatnakpawl kha harsa tiih aiham tlak mi thilah an ruat lo ih, an nun a hrangih an hlanawknak kha a tenau tukah an thei aw. An nun ih tetti an khannakpawl kha Jesuh in an parih a neih mi duhdawtnakpawl an ruatsal tikah hite lawng kan tuah thei maw! Tiah an ruataw. A liam zo mi kum thum sung an nun kha kawh kirsal theih sehla ruahdan danglam zet le phun dang zetih um sal an duh. An Bawipa hmusul thei sehla tiah amah ngai in an um. Kan duhdawtnak a parah langter kan va duh em, an ti ih, amah ngaihsak zetih nun duhnak an nei. A thusim mi an lunlonak le mawi lo zetih an nundanpawl an thei kirsal ih mitthli thawn an siraw. An hnemawknak cu kan sual in ngaidam ti mi lawng a si. Cui an theihawk salnak in sual sirnak an nei ih, leilungpi hmaiah ral tha zetih Jesui hrang pumpekawknak a neither sinsin ... Keimah tiih dinhmun sang cuhawknak kha an hlon hlo ih, Khrihfa pawlkomawknak ah ngaina aw zetin an ngaihsak aw ih, duhdawtnak in hmunkhat ah a funkhwawm. E.G. White, Acts of Apostles. Pp. 36,37.

**Zumnak Jesui parah na neih mi hlei ah a hrang
tuahsak duh mi ziangsaw na neih lai? Na nun hlun**

zohsal aw, poi na ti mi ziang a um? Cumi ihsin na hmailam canah nuncan tha ih nung thei dingah zir thei mi ziang saw na neih?

**TLAWNGKAI NIKHAT
BABEL IHSIN PENTECOST AH**

Thlarau lam nunram timtuahnak ni kha Jesuh van a kai ni ihsin a thokih Pentecost ni ah a tawp a thleng. Khai ni thu kha Tirhthlah 2:1 nakah kan hmu ih, Tirhthlahpawl parah thlarau burh a si hlanah an zaten hmunkhat ah lungualten an um tlang.

Thlung Hlun sungih Pentecost ni cu Judah-pawl in puai pathum an neih mi lakih a pahnihnak kha a si. Cui puaipawl ah Israel mipa hmuahmuah kimten an um a tul. Lantak puai ihsin ni sawmnga-nak ni ah an tuah ih (Grik tongin pentekoste, an ti ih fifteth day) ni sawmnganak tinak a si. Himi puai ah Hebru miphunpawl in Pathian hnenah lungawi aipuang zetih an thlai thar an thawh ni a si.

Jesui sanah Pentecost ni hi Sinai tlangih dan thukham pek mipawl thawn pek cih mi a si (Suah. 19:1). Pathian dan buarih an sual a sirtupawl, Jesui thiinhnak ruangah pek mi ngaidamnak thuthawn hi dan hi an tulnak le a pawimawhnak an bangaw ih, Jesui pekmi thuthangtha thucah thawn an pehcih aw. Daan pawl thawn le nineta ih thuthangtha pawl thawn an tuldan a bangaw. Pathian thupek thlunih Jesui hnenah rinum zettu mi thianghlimpawl in thin sau ih an tuar theinak an langter a tul (Thup. 14:12 NKJV).

Sinai tlangah Mosi in thukhaam pahra a lak laiilh thil umdan thawn an bangaw (Suah. 19:16-25; Heb. 12:18). Pentecost ni ah thil umdan kelhnak ih lamdang zetin a um. "Hmakhatte ah van ihsin thlipi thawmvang vek a rung

thlengih an umnak inn a khat thluh. Cun, meisa vekih a thek darh mi leipawl cu an parah a rung langih pakhat cio parah a um. Cule an zaten thiang thlarau in an khat ih, thlarau in tong ding pek mi vekin lei phundang in a tong" (Tirh. 2:2-4 NKJV).

Tirhthlah 2:5-13 siar aw. Mangbangza thil cang mi ih langter duhmi ziang saw a si?

Pentecost ni hi Pathian in lennak thlawsuah a pek mi sungin Bawipai hnenah lungawi thu sim raithawinak ni a si ih, lungawinak sangbik puai a si. Anmah mitkemtupawl in zu an ri tiah an ti (Tirh. 2:13-15). Pathian thilitheinak in thusimtu kha a thuam khatih thusim mi kha anmai tong ciarin an thei. Rome ram hmuntin ih a um mi Judah-pawl kha Jerusalem ah puai hmang dingin an ra ih, Jesui thuthangtha le Messiah thu kha anmai tongten an rak thei.

Babel insang ihsin thokin minung cithlah thenthekaw mi thuanthu danglam zetpawl tla Pentecost in hmunkhat ah a kom theh. Cui thilmak thleng mi in mi hmuahmuah hi mi pakhat sungsuak thenaw theh mi komsalnak dingah Pathian zangfahnak ih finkhawm hramthoknak a si. Babel sanih a hlo zo mi innsang khat sinak kha Pathian uknak sungah leitlun huamih innsang khat sinak langter dingah Pathian kawhhran ah pumkhat ih lungualnak in a sinak ngaingai a langter.

**TLAWNGKAI NIHNIH
PAWLKOMAWKNAK AH LUNGRUALNAK**

October 30

Peter ih sermon-nak ihsin lung thleng dingih a sawmnak kha minung thawng thumin sual sirnak nei in rundamnak an pom. Jesuh kha thlung hlun sung ih simcia thu Israel-pawl hnenih thukamnak famkimtertu Messiah

a si tiah an pom. An thinlung sungah Pathian a cangvai ih mi tampi cu Jesuh hmuh duhah le a thusim mi theih duh ah lam hlapi ihsin Jerusalem ah an tlawng. Mi hrekkhatpawl cun Jesuh kha an hmu ih Pathian rundamnak thucah an thei ko nan, Jesuh dungtlun dingah an pe aw thei lo. Pentecost ni ah tirhthlahpawl nunah Pathian a cangvai ih Jesui thawhsalnak thu simtu ah Pathian in a hmang. A tu ahcun mipipawl in Jesui thu an thei ih sual thlahnak an ngah.

Tirhthlah 2:42-47 siar aw. Zumtu pawlkomnak ah Jesuh thluntu hmaisapawl in ziangvek in cangvaihnak an nei. Lungrial zetih pawlkomaw mipawl in ziang saw an suahpi.

Zumtu thar an pawlkomawknak ah hminsintlak ih an cangvaihnak pakhat cu tirhthlahpawl ih thuzirh mi zirin an um. An thlarau nun pitling theinak dingah Bible thu an zirhawknak hi a thupi zet. Jesuh in a dungtluntupawl kha midang va zirh dingah a fialih thu ka lo pekmi hmuahhmuah in va zirh uh tiah a ti (Matt. 28:20 NKJV). Himi ringtharpawl in an can zaten Jesui thuzirh mipawl zirnak ah an hmang. Jesui rawngbawlnak le a nundan theih sinsin kha an duh. Thuzirhnak, a sermon thilmak a tuah mipawl kha Hebru profet pawlih an ngan mi Bible thuzirhnak famkimtertu a si tiah an simfiang.

Can an neih mi hmuahhmuah kha thlacamnak le sangphel tlangnakah an hmang. Tirhthlah 2:46 ih sangphelawk hi Bawipa Zanriah a si le si lo a fiang lo. Himi ih a langter mi cu ringtu tharpawl hi hmunkhat ah an um tlangih Jerusalem biakinnpi ah siseh, bulpak inn ah siseh khawmnak an tuah ih ei in tlangin an um theu. Pakhat le pakhat an ngaina aw zetih thlacam tlangnak an nei ih ei le in tlangin an um theu. Thlacamnak hi zumtu pawlkomawknak ih thupibik a si ih thlarau nun pitling

neihnak pawimawh zet mi a si. Ringtu tharpawl cun Pathian biakin can an hmang tlang theu ih, hivek ih an cangvaihnak ruangah “an hnget khoh”.

Hivek ih pawlkomnak din mi in Jerusalem ih midangpawl thawn pawlkomnak an ngah. Ringtu tharpawl kha mi hmuahhmuah ih upat an hlawh tiah a ngan (Tirh. 2:47 NKJV). An nunah thiang thlarau luahkhat dingah an peaw ih Jesuh kha Messiah a si ti mi thutak midang ih an theihnak dingah thusim theinak nun thawkhumnak an co ngah.

Lungrial zetih pawlkomak ih an hlawkpinak ihsin tualsung na kawhhran in zir dingih zohthim ding ziang saw na neih?

**TLAWNGKAI NITHUM
NUN SIANGNAK LE DUHHAMNAK**

October 31

Luke in thlarau nun pitling neihnak ngaingai cu Jesuh thawngin midang thawn pawlkomawknak a nei ding tiah a ti. Pentecost hnu ahcun pakhat le pakhat an harsatnak ah thinlung takten an bawmaw ngaingai. Cun, zumtu hmuahhmuah an pawlkomaw ih ziangkim an tawmaw. An neih mi thilripawl an zuarih a tuldan in an zemaw (Tirh. 2:44,45 NKJV).

Zapi hrangih peknak hi pek lo theih loih pawlkom ihsin dil ruangah pek mi a si lo. An umkhawmnak ah pakhat le pakhat an duhdawtnak hmuhton ihsin thinlung ih pek siannak nun an neih mi a si. Cumi cu an lungrialnak hngetkhohtertu a si. Himi hi can reipi a taktak in an tuah mi a si ih, Tirhthlah 4:5 ah tampi in theihter. Cumi cu an tumtah mi bik a si ih, cui hnuah Thlung Thar hmun tampi ah kan hmuh rero mi a si.

Barnabas hi a pkhatnak a si tiah himi in a sim. Amah hi milian neinung a si ih, hmunram tampi le leilung kaupi neitu a si. Cuih thilpawl a zuarih zumtu pawlkom thathnemnak dingah Tirhthlahpawl hnenah a pek (Tirh. 4:36,37). A hnuailam ih thu vek a si ahcun Barnabas hi phatsantu a si.

**Tirhthlah 4:32-37 le Tirhthlah 5:1-11 siar aw.
Barnabas ih ziaza le Ananias le Sapphira ih ziaza
zohthim aw. Hite nupa ih an palhnak ziangso a si?**

Thiang Thlarau kha a langhngan in an bum lawng si loin mipipawl parah duhhamnak le tirhfaknak an langter. Unau za karlak ah duhdawtawknak a siattertu bik sualnak kha duhhamnak le tirh faknak a si. Barnabas in kawhhran hmaisa pawlkomnak ah thinlung tha zohthim tlak nei sehla, Ananias le Sapphira in cu mi kalhin an tuah kem? Luke in himi pawlkomnak sungih a ummi dingfel lonak thuanthu kha tluangtlam zetin a phuang.

Suahlannak 20:1-17 ih thukham pahra a netabik ah nahsiknak ih mi thil dawt thu a sim. A dangpawl thawng an bangaw lo zet. Thukham dangpawl cu Pathian in minung hrangah a duhmi tuahnak ih bawhsiat a si. Hi mi a netabik thu kha thinlung sung thuthup a si ih, mi nahsiknak le a lengih tuahnak olten a lang mai dah lo. Thinlung sung ihsin ruah rero theu mi a si. Lenglam ih hmuhi thei a si lo ih, cithlah in misual kan umdan a si. Himi duhhamnak hi tuahsuak lawngah a langih, cumi cu Annanias le Sapphira in an tuah mi a si. Thukham sungih a netabik ngan mi hi sua hramthoknak a si ih, a dangpawl parah tuahnak in a langtertu a si. Hivek mi thil daw ih nahsiknak hi Setan in kan parah thu a neih theinak dingah sangka kan rak onnak a si. Cumi ihsin Annanias le Sapphira in Pathian an bum. Judah sualnak tuahteru duhhamnak tla hi mi a si.

**Midang thil dawtnak duhhamnak thinlung
ziangtin kan hlon hlo thei ding? Kan co tawkah lungawi
ih Pathian thangthat ih lungawi thusimnak in midang
thil daw ih nahsiknak thil tha lo um lo dingih khamtu
ah a can theinak hi ziangah ha a si?**

**TLAWNGKAI NILI
MI FARAHPAWL HNGILH HLAH UH**

November 1

Kawhhran hmaisa ah an pekawknak hi hmuhi thei in a lang. Nun siang zetih peksuahnak kha tirhthlah cabu ih cang hmaisa lamah a langter. Paul in Macedonia le Akhaia khuapawl kha Jerusalem ih um mi farahpawl bomnak pe dingin a forh ih, kawhhran sungah pek tul ih a um mi pek siangnak nun an neih mi nunter ringringnak a si (Tirh. 11:27-30; Gal. 2:10; Rom 15:26; I Kor. 16:1-4). Cui laksawng pekmi cu kawhhran ah hmuhi thei in a um. Himi ah zumtu Zentail-pawl kha thupibik in an telih Jerusalem ih um zumtu Judah unaupawl duhdawt ih tuamhlawmnak a si. A danglam mi an nunphungpawl an ruat loih bangrep ih thuthangtha an ngah mi ah nuam zetin Khrih sungah pumkhatnak an tuah. Bomnak peknak hi kawhhran lungualnak lawng si loin thazang caktertu a si.

**2 Korin 9:8-15 siar aw. Nun siang zetin Korin
khuapawl ih peknak khan thathnemnak neih mi Paul
in ziang saw a sim?**

Khrihfa hmaisapawl ih lungualnak hmuhton kha tui kan san khalah kan tuah ding mi a si. Himi lungualnak hi thupek ih fial ruangah a si lo. Zumtupawl in mai tuanvo mawhphurh laknak ah pumpeknak a si. Pawlkomnak hmaisa hruaitupawl in Khrih sungih pumkhatnak kha tuahnak in an cawm nung ti kan hmu. Zumtu karlak ah

pumkhatnak le lungualnak kha nu le pa karlak siseh, fate hnenah siseh nitinten duhdawtnak nei dingin thinlung sung ihsin nortu a um ruangah a cangvai mi a si. KHrih sungah hmunkip in lungualnak mithmuh ih lang dingah tha thotertu a si.

Kawhhran hmaisa ah lungualnak an thansopi tu hmuh thei mipawl cu : (1) Thlacam tlangnak, (2) hmunkhat ih Pathian biakkhawnak, (3) pawlkomnak, (4) ruahnak hmunkhat, (5) Pathian thu zirtlangnakpawl an si. Miphun hmuahmuah hnenih thuthangtha sim ding lawng hi an theih mi a si lo. Pakhat le pakhat duhdawtnak thawn fingkhawiawknak tla a takin an nunah a lang. Tualsung pawlkomnak kha nun siangih bomawknak in an langter ruangah an lungualnak nun a lang. Cule hmun hlapi ih a um mi Kawhhranpawl bomnak khal kau sinsin in an tuah.

“Pathian zangfahnak an ngah mi kha a lakih luangliamter an siang loih midang bomnak in a langter”. Zumtu le zumlotui hmuhan khalah hi hi zangfahnak ih tuahmi thilmak a si. E.G. White, The Acts of The Apostles, pp. 344.

Midang hnenah siang zetih nan peknak ruangah kawhhran ah le nangmai pumpak ah ziangvek hlawknak hmuhton saw na neih? Siang zetih mi a petupawl hnenah ziangvek thlawsuahnak a tleng.

TLAWNGKAI NINGA

November 2

RUAH BET DING: Zumtupawl in siang zetih thilpeknak kha (Tirh. 2:44,45; Tirh. 4:32-35) ah kan hmu ih thiang thlarau kha lang hngan ih burhnak ruangah a si. Thuthangtha ah piantharnak a ngahtupawl cu “Lungkhat thinkhat in an um”. Thinlung ih seherhawknak nun ih uk mi an si ih rawngbawlnak ah hlawhtlinnak ngah dingih

rinngamnak a pekih nahsiknak a nei lo. Anmai neih nunnak ding sumpai le thilri an duhmi hnakin zumnak ih an unaupawl tulsamnak bom duhnak an neih mi duhdawtnak sang zet an nei. Minung pakhat ih rundamnak kha leitlun neih le siah hnakin a sunglawi sAWN ti mi an tuahnak in an langter.

Khavek in nun an hman ruangah Pathian thlarau in an nun a luahkhat. An thinlung kha Khrih duhdawtnak in a thunun ih, kanmah ruangih farah zonzaihnak a tuartu, Khrih tuahmi zohthim in thlun an tum. Amai neih nunnak in kan nun milian nei nungah in tuah. Sum le pai tikcu le can, thuneih theinak a zaten Pathian kut ihsin kan ngah mi laksawng an si. Thuthangtha hnatuannak ih hmai nor ding lawng hi thil man nei le sunglawi ah an ruat. Kawhhran hmaisa ih umdan vekin tuisan thar kawhhran tiang thiang thlarau bomnak thawngin an milaipipawl ih thuthangtha an theih theinak dingah sumpai kha siang zet le thatho zetin an pe a si. Cutikah thutak phuanmi a theitui’ nunah thiang thlarau in a thawkhum ding a si (E.G. White, The Acts of Apostles. Pp. 70,71).

REL TLANG DING:

- (1) **Kawhhran hmaisapawl ih an lungualnak hmuhton a semsuahdan tui zarth zirlai ihsin kan hmu thei. Anmah vek si dingah tuini kan kawhhran in ziangtin kan tuah ding? Zumtu hmaisapawl ih an tuah mi zohthim in kan famkimlonak a um mi kan hmu thei maw?**
- (2) **Thlung Thar sanih kawhhran-pawl in Jerusalem ih mifarahpawl bomnak siang zetih an pek mi zohthim in tuisan ah anmah vekin ziang saw kan**

tuah ding? Midangpawl ih an zatlang nun ziangvek in an langter? Tualsung kawhhran in khawtlang nun harsatnak le tulsamnak demter dingah an neih mi sumpai thawn ziangtin an tel ve thei ding?

- (3) **Ananias le Sapphira ih thuanthu rapthlak zet mi hrial thei dingah zirlai ziangso kan lak thei mi a um? Tirhthlah 5:5 le Tirhthlah 5:11 ah, “Nasa zetih thinphannak” kawhhran sungih mi pahnih thihnak ih a thupitnak ziang a si?**

THUTLANG KAWM: Jesui dungthluntupawl in thukam mi thiang thlarau ngah dingah anmahten timtuahnak ruangah kawhhran an thangcak. An zaten zumnak ah pakhat ih an um theinak kha Pentecost thlarau thianghlim ih tuah tharnak ruangah a si. Pentecost hnu khalah anmah lakah thiang thlarau in an nun a thlengsal vivo. Siang zetih peknak le an bomawknak in kawhhran zamrangten a thang.

ZIRLAI 6

NOVEMBER 3-9

PUMKHAT SINAK LANGTERDANPAWL Images of Unity

SABAT TLAI LAM:

November 3

Tuzarh siar ding: 1 Pet. 2:9; Suah. 19:5,6; Efe. 2:19-22; 1 Kor. 3:16,17; 1 Kor. 12:12-26; John 10:1-11; Saam 23.

BIBLE CANG KEN: “Ziangahtile taksa ruangpi cu pakhat a si ih, taksa in then tampi a nei, taksa then hmuah-hmuah ruangpum pakhat a si thotho. Khrih khal cu tivek a si ve (1 Kor. 12:12 NKJV). Khrih cu taksa ruang-pum bang tuk a si, taksa rung pum cu pakhat a si nain taksa then tampi an nei” (1 Kor. 12:12, Hre Kio).

BIBLE zirsangpawl in a sunglawi ih a ropi sawn mi thil theithiamnak le mitthlam ih hmuh thiam dingin Bible ah tampi a um tiah an hmu. Tahthimnak ah Bible hi a zaten raithawinak ih khiihmuh theh mi a si ih, a taktak cu khiihmuhnak hnakin a let tampi sunglawi mi le ropi zet mi a si. Cumi ih a langter mi cu Jesuh le rundam khawkhannak pawl a si.

Bible sungah langterdan a phunphun a um ih, a cancan ah thil um rori mi, ti le mei le thlipawl a hmang. Hipawl hi Thiang Thlarau le Pa thuthu ih thutak zirhnak langtertu an si. Jesuh in thli cu a duhduhnak ah a hrangih a awn thawm na thei, asinan khuitawk in a ra ih khuilam ah a feh ti na rel theih lo. Thlarau ih hrin mi pohpoh khal

cuti vek cu an si (John 3:8 NIV). Hitawk ah thli kha Thiang Thlarau langternak ah a hmang.

Bible ah kawhhran lungruaunak phun tampi in a langter. Lung rual dingah Pathian ih kawhmi sinak kha leilungpi hmai ah langter a tul. Pumpak in kha mi kha famkimten a langter thei lo. Kawhhran lungruaunak kha an zaten phun tampi in an langter ih, cumi cu Pathian le kawhhran pehzomawknak langtertu an si. Member pakhat le pakhat pehtlaihawknak kha kawhhran a si ih, cuih kawhhran pakhat le pakhat pehtlaihawknak kha zatlang pawlkom pi a si.

Khrin ah pumkhat kan sinak a langtertupawl tui zarh zirlai ihsin kan zoh tlang ding.

**THAWHSAL NI
PATHIAN IH MINUNGPAWL**

November 4

1 Peter 2:9; Suah. 19:5,6; Danp. 4:20 le Danp. 7:6 siar aw. Pathian minungpawl kha midang hnakin cungcuang hleice an sinak ziangtin an sim?

Kawhhran timi hi mipi pungkhawm mi a si ih, ziangvek minung ti a um lo. Kawhhran hi Pathian covo mipipawl an si ih, Pathian kha rundamtu le Pa ah a pomtupawl an si. Khrin rundamnak ruangah zawnlungten a hnenah a umtupawl an si. Pathian ih kawhhran hi rundam khawkhannak langtertu mi poimawh zet an si. Cumi cu thlung hlun Israel-pawl ihsin thlung thar Israel tiang a pehzom vivo. Adam ihsin tilik a ra thlen hlan pupa san le Abraham hnenah Pathian zangfahnak le dingfelnak le a duhdawtnak langtertu dingah a minungpawl hnenah thukamnak kha a pek.

Pathian minungpawl cu “hril mi miphun, siang-pahrang ih puithiam le miphun thianghlim” timi an si. Himi F-5

thu ahcun tumtahnak tum ce hrangah a dangte ih retmi an si. Thim sung ihsin mangbangza tleunak sungah a lo kotu Pathian cawimawinak langsukter theinak dingah a si (1 Pet. 2:9,10 NKJV). Himi hi Suah. 34:6,7 ih thu rak sim zo mi Pathian zangfah lainatnak ziaza ih auaw thang khawk a si. Pathian kawhhran hi mi hmuahmuah hnenah a sunglawi mi ziaza le thatnak le zangfahnak pumpak nun ah langter in phuangsuaktu dingah amai bul ta ih neih a duh (The SDA Bible Commentary Vol. 7, pp. 562).

Danpeksalnak 7:6-8 siar aw. Pathian in Abraham cithlah kha a miphun si dingah a hril ih, a tumtah mi ziang a si ding. Cumi cu tui ni ah ziangtin so kan langter thei ding?

Kanmah ten kan suhawk ding mi cu khui tawk ram ihsin miphun thiang tacik khen kan si (phundang ih sim cun kawhhran ih langterdan a si). Khui ram hmanih tacik khen mi kan si lo. Khui tawk ram le ziang miphun ih nunphung le sinak khalin Pathian duhdawtnak le a zangfahnak langtertu an um lo. Asinan Bible ih langdan ahcun kanmah hi miphun thianghlim si dingah kawh mi kan si. Bible ih in zirhdan ahcun Pathian in a duhdawtnak ruangah milai sinak ih co ban lo mi dinhmun dingter dingah Israel-pawl a hril ih a hnenah a ratpi tiah a ti. Pathian in a minungpawl a dinsuahnak kha an ziaza ah duhdawtnak langter dingah siamthar mi an si. Asinan cui an dinhmun in sual an tuah ih dodal hmang miphun ah an cang. Pathian in Abraham cithlah Jesui a rat ni tiang a minungpawl run dingih thu a tiamkam mi a hngilh dah lo. Pathian in a miphunpawl kha zangfahnak a neih mi langtertu dingah a rundam ih a hrilnak san a si. Kan zaten phu lo zangfahnak kan ngahnak thu theihternak dingah hril kan si.

**Pathian minung kan si ko nan kan tuah mi tel lo
Bawi Khrih ih tuahsak mi ah thumaw in kan rundamnak
thutak kilhim ringring ziang ruangah a tul?**

**TLAWNGKAI NIKHAT
PATHIAN INNSANG SUNGTEL**

Thlung thar in Pathian minungpawl kha Pathian innsang suntel tiah a ti. Kawhhran sungah hnok zetin pakhat le pakhat pehtlaihawknak kha inn saknak ih hman mi lung thawn tahthim mi a si. Peter in Khrihfapawl kha “a nungmi lung” thawn a tahthim (1 Pet. 2:5). Himi tahthimnak hi a fekmi le a hmun ringring mi an sinak a um.

**Efesa 2:19-22 siar aw. Paul in a tumtah mi
ziangsaw a langter. Kawhhran lungruanak langternak
ah ziang a sim?**

Himi ah Paul in kawhhran a langdan phun hnih in a ngan (1) nunnak nei lo mi biakinn sak mi le (2) nunnak nei milai innsangpawl an si.

Lungto hi amah ah man a nei lo. A dangpawl thawn bilatmi (cement) thawn an erhawk tikah thli le ruah ihsin beunak ih sak mi innah a cang. Khrihfa timi hi mitampi umkhawmnak Pathian innsang a si ih, a ril mi lungto pakhat vek men a si lo. Khrihfa hi inn hram khoh zetih dinmi innumpi a si. Cuih Pathian innsang ding hngetttertu inn kil lung kha Jesuh a si (1Kor. 3:11). Kawhhran cangvaihnak hrampi a hnguahsan kha Jesuh si hlah sehla zianghman lo ah a cang ding. Jesui nunnak, thihnak, thawhsalnak le a ratsalnak kha kawhhran nunnak hrampi a si. Leitlun ah Jesui thuthangtha phuangdarhtu dingah zumtupawl komaw khawmih kawhhran din mi a si. Kawhhran ah a thupibik mi cu Jesuh a si ih, a cangvaihnak

in kan nun a luahkhatnak, kan hrangah in tuahsak zo mipawl tla amah kha rundamtu le Bawipa ah a pomtu hmuahmuah hnenah pek mi a si.

Innsang thu hi kawhhran langternak ah a fuhbik. Kawhhran sung pakhat le pakhat pehzomawknak kha innsang ih pumpak cio pehzomawknak ah a thumaw. Kha mi kha inntekpa bik le nubik an pehtlaihawknak, unau za karlak ih pehzomawknak thawn a langdan a bangaw. Innsang ah duhdawtnak thawn khoh zetih sihhngetawknak kha midang thawi pawlkomnak khalah a rinumnak a lang. Lungruanak hrangah rinumnak hi a thupi zet. Rinumnak um hlah sehla lungruanak a um thei kem?

Himi in kawhhran sung pehtlaihawknak ziangvek in a langter. Kawhhran hi innsang tumpi ih suntel an si theh. Adam hmaisa cithlah innsungsang lawng si loin Adam pahnihnak Jesuh thawn pehzomawknak ah hrintharnak hmuhton kan nei ih, innsungsang pakhat ah kan pehzomaw cio. Kan thurin thutak kan kaih mi ruangah pehtlaihawknak men si loin Jesuh ah nunthar kan neih mi ruangah pakhat le pakhat finaw in kan pawlkomaw a si.

**Zokhal mai innsang ciarah duhdawtnak thawn
ngaihsakaw zetin sunloihawknak hmuhton neih lo cun
riahsiatza a si. Innsang ih a langter duh mi kha a lang
thei lo ding. Himi dinhmun kawhhran in a thlenpi thei
lo cingin ziangtin saw kawhhran hi innsungsang pakhat
ah a cang thei ding.**

**TLAWNGKAI NIHNIH
THIANG THLARAU IH BIAKINN**

November 6

Paul in Thiang Thlarau biakinn kha phundang ten a langter. Cui inn cu a sunglawi zetih a man a khung. 1 Kor. 6:19 ih thu umdan ahcun Thiang Thlarau biakinn

kha bulpak ruangpum taksa a langter. Paul in 1 Korin 3:16,17 ih a tarlan duh mi cu hlanlai Asia nitlak thlanglam ram a tlangpi thu in Izipt ramih biakinn thianghlim zet sak mi mitthlam ih langter dingah a khiihmuh mi a si.

1 Korin 3:16,17 siar aw. Kawhhran hi Thiang Thlarau biakinn tiah a ti ih, a duh san ziangsaw a si?
1 Korin 3:17 ih nun simnak kha ziang thu saw a si?

Paul in biakinn sak mi kha a sim duh mi a si lo ih, kan taksa ruangpum Pathian ih cencilhmi kha thinlung ih cin ding a duh. Grik thlung thar ah ‘nan’ (you) ti mi kha bulpak sawh duhnak khalah a hmang ih, mi tampi sawh duhnak khalah a hmang thotho. Hihi calai fehdan a si ko. Hihi a um ngaingai mi thil tahthimnak a si ih, Thiang Thlarau biakinn kha Korin khua ih Khrihfapawl le Pathian cencilhnak kha thlarau lam thilin a langter.

Paul ih hmuhsan ahcun Khrihfapawl komnak ah Pathian kha sungtel in a um ringring tinak a si. Kha mi pawlkomnak siatsuah tumtu cu Pathian ih thuthensaknak a tong ding tiah nun a simnak a si. Lungual ten zumtupawl an pawlkomnak hi Pathian umnak biakinn pi a si timi tumtah in a sim. Himi hi pumpak kan taksa ih kan tuahnak khalah a hmang thotho. Hihi Paulin a sim duh san mi a si lo. Kawhhran lungualnak siatsuah tumtupawl ralrin peknak thu a si.

Himi bung ih a hramthoknak ah Paul in lungual ih um theinak ding a zuam rero ih, a seherh bik mi a sinak a langter. Ziangahtile nan lakah iksiknak, tawhawknak le thenawknak a um tiah a ti (1 Kor. 3:3 NKJV). Hivek thinlung put hi Khrihfapawl lungualnak siattertu a si ih, biakinn thianghlim ah Pathian umpinak hnukdawknak ah a cang. Phun dang ih sim ahcun Kawhhran sung remawklonak cu

Pathian biakinn siatsuahnak a si. Lungualnak siattertu thinlung put le umdan kha pumpak ciarin hlon hlo seh ti a duh.

Korin khua ah Paul in ralrinnak a pekmi kawhhran sung rem lonak a suak mi kha tuini khalah a um. “U le nau tla, nan zaten thuhmun khat simin um uh, thenawknak nan lakah um hlah she, ruahnak hmun khat, thuthen catnak hmun khatah famkim zetin nan pehzomawk theinak dingah a tu ah kan Bawipa Jesuh hminin ka lo dil” (1 Korin 1:10 NKJV).

Remlonak, iksiknak le thenawknak kha Paul sanlai kawhhranpawl lawngin an tong lo. Tuisan khalah kan tonmi thubuai a si. Himi buainak karlakah lungualnak siatsuah lo dingin ziang vekih umdan saw pumpak cio in kan hawl ding.

**TLAWNGKAI NITHUM
BAWI KHRIH IH PUM**

November 7

Lung rual zetih kawhhran kan umnak kha Khrih ih ruangpum taksa then tampi thawn a langter. Ziangahtile ruangpi cu pakhat a si ih, taksa then tampi a nei, taksa then hmuahmuah ruangpum pakhat a si thotho. Khrih khal cuvek cu a si. Atu ah nannih hi Khrih ih taksa nan si ih, a taksa then cu pumpak cio kha nan si (1 Kor. 12:12,27 NKJV).

Taksa ah ruangpi pakhat si hman sehla then tampi in a um, tuanvo an lakdan tla phun dangdang a si. Khrih ih ruangpi Kawhhran tla cuvek a si.

1 Korin 12:12-26 siar aw. Himi ruangpum pakhat in tualsung kawhhran mipi ziangvek in so a langter? Leitlun pumhuap pehawk khawm mi Seventh-day Adventist kawhhran ziangvek in a langter.

Khrihfa lungruanak 1 Korin 12 sungih thu Paul in a zirhmi kha phun dangdang ih thenaw mi si hman sehla fumfe zetih lungruanak a um mi a langter. Himi hnatiannak hrampi hi thlarau in a si ih, mak kan ti dingmi a si lo. Milai kan taksa tla mak zet le zum har zetih thenaw mi a si. Hivek ih tampi in hnatiandan thenaw mi kha Khrih taksa a famkimnak le a pitlinnak a si.

Himi khiihmuhnak in kawhhran thu kan hnenah a langter mi a si. Seventh-day Adventist kawhhran hi a liam zo mi kum hra bi sungah an thansodan hi a khir mi vek a bang. Seventh-day Adventist kawhhran hi ruahdan a phunphun ihsin le nunphung danglam zetzet le kiangkap thil in thunun theitu tampi lak ihsin a rak ding suak mi a si. Kan phunhnam, ci le kuang, nunphung, fimzirnak in Khrih sungih kan pumkhatnak kha in then ding a si lo. Thiang Thlarau in lungruan theinak dingah thleidannak hmuahmuah a rualremter theh zo. Thleidannak poisaknak um loin Khrih sungih kan zaten pumkhat kan sinak in thutak a langter.

Cross hnuai ahcun kan zaten kan danglam lo timi a theitu hmuahmuah in hmuntin ihsin kan ra finaw cio. Leilungpi sinak in kan zaten rem ding tha lo khopin in dengkuai hman sehla kawhhran in thendarhnak lak ihsin lungruanak kha hlawtling zetin a langter.

Himi pomdan hi Paul in mak zet le thiam zetin a langter. Kawhhran lu cu Khrih a si, cule amah in taksa kawhhran kha a rundam (Efe. 5:23 NKJV). Amai taksa a simi kawhhran ih lu a si (Kolo. 1:18 NKJV). Zumtu pumpak ciar hi thlarau lam ihsin Jesuh ah peh cih theh mi kan si. Taksa hi a zaten rawl phun khat lawngih cawm mi a si. A hleice in Pathian ih zirhmi kan um lo. Hmunkhat ah Pathian

kan biaknak le thlacam tlangnak kha Khrih sungah pumkhat kan si theinak dingah kan zirmi Pathian thu hmuahmuah zawnlung in kan thlun ding a si.

**TLAWNGKAI NILI
TUU LE TUUKHALTU**

November 8

John 10:1-11 siar aw. Lungrual zetih umnak kawhhran kha tuu hruang thawn a tahthimnak ziangvek in saw a langter.

Khawpi sungah tilva zuat le lo thlawhdan hmuah ding a um nawn lo. Mi tampipawl cun tuu le tuukhaltui naihawk zia an thei lo. Jesuh in himi thu a sim laiah mipipawl in felten an rak thei. "Keimah hi tuukhal tha ka si" tiih a sim tikah Saam 23:1 sungih, "Bawipa cu tuukhal tha vekih I kiltu a si" timi kha hmakhatte ah an theisuak ih an thinlung sungin an hmu fiang rori. Hlanlai Asia nitlak thlanglam ram Cancient near eastern ah an tuupawl kha hnangamten tuukhalpawl in an retdan an thei. Tuisan thar nitlak thlanglam ih a umpawl khalin an thei. Pathian le a minungpawl an pehtliahawknak felte ih langternakah Bible in tuukhal thu a simmi thawn a remaw zet.

Pathian zumtupawl kha tuu thawn tahthim mi ah nasa zetih ruah ding a um. Tuu-pawl in anmahten ralvenawknak a um lo nan hnangamte ih an um mi kha kan hmuah theinak dingah a si. Tuupawl in tuukhal ih lamhruainak le kilhimnak an rinsan. Zep lote ih sim ahcun tuupawl kha an aa tuk. An hnu hmai an thei loih an hlo theu. Tuu khalpawl in an hawsal theu ih tuu hruang sungah an luhpi theu. Tuufa a suak pekpawl kha an tangah cawi in a hleice in a fingkhawi theu. Tuu fingkhawi dingah cun thinsau, thin nem le zawn ruahnak ngah zet a tul. Hihi kawhhran fingkhawinak thawn a remaw zet. Tuu

khaalpawl hnen ihsin an pehtlaihawknak ziangkim an thei zo ruangah kawhhran mipipawl kha hnangamten an um.

Jesuh in a poimawh zetih a simmi cu tuu khaaltui aw kha tuupawl in an thei timi a si. Tuupawl kha himnak hmunih a um theinak dingah tuu hruang sungih khum tul can a um theu. An thenawk sal tikah ziangvek saw an si theu? Tuu khaalin tuu hruang sung lut dingah sangka in a ko tikah tuupawl in a aw an thei ih, hruang sungah an lut theu. “Cule tuupawl an suah tik khalah an hmaiin a hruai ih tuupawl in a aw an thei ih an thlun” (John 10:4 NKJV). Tuu khaal aw thei timi hi kawhhran hrangah a thupi zet. Pathian kawhhranpawl an him ih lungualten an um theinak dingah tuukhaal Jesui aw thei in a thu ngai dingih pumpekawknak in nai zetih an pawhawk theinak a si.

A tlangpi in milai cun tuu thawn tahthimnak hi mi tampi in an duh lo. Kha mi kha ret tha men sehla. Himi tahthimnak hi ziangah kanmah thawn a remaw zet? Tuukhaaltui aw ngai kan tulnak himi in a langter duhmi ziang ha a si?

TLAWNGKAI NINGA

November 9

RUAH BET DING: Grik mi zia nei in Rome ih uknak sanlai ah (Graco-Rome) Jerusalem biakinn pi hi leitlun ah hminthang bik a si. Thlung thar ngantu in zumtupawl ih mitthlam ah biakinnpi thianghlimnak langter dingah a lakmi thuthimnak a si. Kawhhran cak zetin a thangso ruangah Pathian in an hnenah hna a tuan ti a lang. Khrih le Thiang Thlarau hnatuannak kha biakinn sungih zumtupawl lungual ih an umnak ihsin langter dingah a tahthim mi a si. Kutthiampawl ih sakmi inn vekin rem zetin a langter. Himi tahthimnak ih a langter duhmi cu minung mithmuh ah an sakmi innpi uar deuhin a sim mi a si.

Sakmi innpi hnakin a thlengaw dah lo mi sinak langter dingah hnek mi kan si sawn. Pathian nungih biakinn kha lamdang zetin hnuai phah nun langter dingih ruahsan mi a si (2 Kor. 6:16). “John Mc. Vay, Biblical Metaphors for the Church: Building Blocks for Ecclesiology” in Angel Manual Rodriguez, ed. Messate, mission an Unity of the Church. (Hagers town, Md: Review and Herald: 2013). Pp. 52.

REL TLANG DING:

- (1) **Bible ih kawhhran umdan langtertupawl lakah na uar mibik ziangha a si? Ziangah cumi cu na uar? Himi cangpawl ah kawhhran umdan tahthimnak ih a langter mi kan hmu thei (1 Tim. 3:15; 2 Tim. 2:3-5; 1 Pet. 2:9). Himi tahthimnakpawl in ziangsaw in zirh?**
- (2) **Khrihfa pawlkomawknak ah nelaw zet dingah Pathian in a duh. Kawhhran ih a poimawh mi cu kan unaupawl parah rinsannak neih ding a si. Sakhua thu a buai tikah kawhhran in thinlung hmunkhat nei ih tan lakanak a thupi zet. Rapthlak zetih nun le fimkhur loih hnatuannak in kawhhran sungah remnak kum reipi a um zo mi kha buainak le harsatnak a thlenpi. E.G. White, Testimonies for the Church Vol. 3. Pp. 446. Himi in kawhhran lungualnak kilhim dingah ziangso ralrinnak thu in sim? A thianghlim mi mawhpfurhnak la dingin bulpak cio hnenah ziangtin in sim?**
- (3) **Thawhsal ni zirlai ih a fehpi mi kha “Pathian minungpawl ih rundamnak kha an tuahthatnak ruangah si loin Pathian zangfahnak rinsannak in a**

si tiah kan zir. Rundamnak hrangah Pathian thatnak rinsan loih kanmai thatnak in Pathian fa ah in thlenpi thei lonak ziangruangah saw a si? Himi thu hi zumtlak mi a si maw?

THU TLANGKAWM: Thlung Thar in kawhhran rawng-bawlnak le thleidanawknak thil umdan kha thuthimnak pakhat hmgan a simfiang. A tum bikmi cu Pathian in a minungpawl a kilveng ih a thinlung takten a zoh ringring tinak tahthim thu a si. Pathian minungpawl hi pakhat le pakhat hnatuannak ah pehtlaihaw tlang dingah a hnok zetmi a si ih, cuih sinak in tuantlang kan tulnak thu himi in a langter ti ah in sim.

ZIRLAI 7

November 10-16

BUAINAK A SUAH TIKAH

SABAT TLAI LAM:

November 10

TUZARH SIAR DING: Tirh. 6:1-6; Tirh. 10:1-23; Matt. 5:17-20; Tirh. 11:3-24; Tirh. 15:1-22; Amos 9:11,12.

BIBLE CANG KEN: “Nan lakah mi tampipawl cu Khrih sungih baptisma cotu an si ih, Khrih thawn nan thuamaw. Judah mi le Grik mi ti a um lo. Sal le miluat ti khal a um loih mipa le nunau ti a um fawn lo. Ziangahtile nan zaten Khrih sungah pumkhat nan si” (Gal. 3:27,28 NKJV).

KAWHHRAN sinak thawn pehaw ih hnatuannak ah Khrihfa zatlang nun hmuhdan bangawk lonak a um tikah lungrial dingih tuah hi a har bikmi pakhat a si. Ruahnak bangaw lo hi siatsuahnak lam hruaitu a si.

Tui san Khrihfa zatlang nun hi thlung thar sungih kan hmuhmi thawn an danglamaw lo. Milai le milai kan bangaw ko nan kan thupitter mi le kan ngaihsak mi a dang cio. Zatlang nunah thleidannak le thlung hlun sungih thil tuahdan sunsak zetih hrilhfiah an tuahnak ah hruaitu upapawl in buainak an tong. Ruahnak pitling a nei mi tirhthlah pawl lehruai tu pawl kha Thiang thlarau le Bible lam hruai nak in hi mi thu buai cingfel lo seh la dingpek kawhhran kha siatsuahnak a tong thei mi a si.

Kan dung zarh reilo teah kawhhran hmaisapawl ih lungrialnak hmuhton an neih mi kan zir. Tui zarh ahcun kawhhran hmaisapawl ih an ton mi lungrialnak a thupte

ih hram rak pelh tumnak lak ihsin an kilhim ringringnak kan zoh ding. An buainak ziangpawl an si? Ziangtin an rem fel? Hmuhton an neih mi ihsin tui san kannihpawl in ziang saw kan zir thei ding?

**THAWSAL NI
SUAHKEHNAK MIPHUN THLEIDANAWKNAK**

Tirhthlah 6:1 siar aw. Kawhhran hmaisapawl ah nuhmeipawl ei in an zemdan ah phunzainak ziangvek in an nei?

Kawhhran hmaisapawl karlakah Grik tong hmang nuhmeipawl le Hebru tong hmang nuhmeipawl ei in zemnak ah thleidannak a um. Zumtu hmaisapawl zatlang nunah duhsak bik an neih mi in thenawknak a suahter. Hivek ih hleih neiih an umnak Bible cangah a lang lo. Mi hrekkhatpawl ih an zummi simnak lawng a si. Kawhhran hmaisapawl lungualnak kha himi in a hnaihnokter lohli. Mi ih an ngaihsak zet mi phun le hnam thennak in kawhhran sungah zamrangten an thenawknak kan hmu.

Tirhthlah 6:2-6 siar aw. Kawhhran hmaisa ah theihsualnak a um mi kha ziangtin saw an rel fel?

Kawhhran hmaisapawl kha zamrangten an karh ih tirhthlahpawl parah phurrit nasa zetin a thleng. Upa pasarih an hril mi kha a dan vekih kawh ahcun ‘deacon’ (thlung thar cun hivek in a ko dah lo) ti a si. Jerusalem kawhhran ah himi ruahnak demter deuh dingah kawhhran sung hnatuannak dingah mi tampi retih tuan ve dingah an tuah.

Tirhthlah-pawlin Grik tong hmang zumtupawl ih an phunzainak kha thaten an ngai ih, an thuhla rem fel thei dingah felten thu an sut. Tirhthlah-pawl in an hril mi upa pasarih pawl kha mipipawl thawn umtlang dingah an tanta

ih an zaten Grik tong hmang mi an si. Upa pasarihpawl hi miih upat tihzah mi le thiang thlarau thawn khat mi le fimnak nei mi an si (Tirh. 6:3 NKJV). Dungthluntupawl ih rawngbawlnak ah bu hnihil a thenaw mi nuhmeipawl ei in zemnak ah le Pathian thu zirhnak tuah dingah rualranten ngaihsak an si theinak dingah a si. Luke in Pathian hrang rawngbawl (Ministry) le midang hrang thatnak tuah (service) timi a hmandan a bangaw (diakonia) a pahnih in Pathian thuthangtha simih tirhthlah hnatuannak kha a langter (Tirh. 6:4). Deacon timi upa pasarihpawl ih an tuah dingmi cu ei in zem ding a si (Tirh. 6:1).

Zumtu mi tampi um tlangnak ah an hnatuannak le buainak rem fel dingah hruaitupawl kawh mi an si ih an langdan ziangvek in nahmu thei?

**TLAWNGKAI NIKHAT
ZENTAIL-PAWL PIANTHARNAK**

Jesui thuthangtha ruangah Zentail-pawl piantharnak kha tirhthlah cabu sungah a lang. Kawhhran hmaisapawl nasa zetih an buainak thu tla a ngan. An nun khawsaknak le rawngbawlnak tiang tihnungza in a um.

Tirhthlah 10:1-23 siar aw. Zentail-pawl in thuthangtha an pom theinak dingah Thiang Thlarau in an thinlung sungah timtuahawknak hnatuannak ah ziang a hmang?

Peter hrangah langnak kha a danglam ih a poimawh zetmi a si. Judah sakhuah ah pumpek mi hrang ahcun malmaknak a si ih, tih a nung tuk (Ezek. 4:41; Dan. 1:8). Dan ih a fehpi mi vekin ei thiang lo sapawl thawn an hnawihnihaw duh lo. Langnak ih a duhmi cu ei le in lam a

si lo ih, daidannak kha thuthangtha karhzainak ah phentu a si. Daidanawknak kha hlanlai vekin tuisan khalah hmuntinah a um mi a si.

Kum hra bi hmaisa lamah Messiah a ra ding tiah tlung hlun ih simcia thukam mi kha Jesuh a si tiah a pomtu Khrihfapawl in Judah sakhanak sirhsan in an fehpi. Zumtu hmaisapawl kha Judah dan zirhmi an si ih, cuih daan ah rinum le zawnlung zetpawl an si. Thlung hlun sungih tuah ding thupekawl kha Khrih ih thuthangtha in a thiatbal ding ti an ruat dah lo (Matt. 5:17-20).

Tirhthlah 10:28,29,34,35 siar aw. Peter in Joppa khua ih langnak a hmuhami ziangvek in a sullam a thei? Himi thu simfiahnak khuilam ah saw a fehpi.

Tirhthlah sungih kan hmuhami Zentail-pawl kha Khrihfapawl hnenah tel thei ve dingin Thiang Thlarau ih khawkhan mi a si. Serh tanih Judah miphun sung telah luh a tul nawn lo. Pentecost ni ah Jesui dungthluntupawl ih hmuhton an neih mi vek kha Kornelias le a sungkhatpawl khalin an nei ve ih, Pathian in thiang thlarau kha langhngan in a pek. Himi thil thleng mi in Peter le a rualpipawl ih thinlung a luah khat (Tirh. 10:44-47). Judah-pawl hnenah thiang thlarau pek a si vekin Zentail-pawl hnenah pek a si ve. Jesuh kha Messiah a si tiah zumtu si thei dingah vunzim tan hmaisa a tul nawn lo. Himi thu hi Khrihfa hmaisapawl lakah a tambik ih an doawknak thu zirhnak a si.

TLAWNGKAI NIHNIH THIANG THLARAU IH LAMHRUAINAK

November 13

Ceasarea khua ih Kornelias te hnenah thil thleng mi thu kha Jerusalem ih Khrihfa hrwuitupawl hnenah a thleng lohli. Peter hnenah ziangtin saw thil thleng mipawl

umdan a si tiah an sut. Judah sakua ah rinum zettupawl in Zentail-pawl thawn ei le in tlangih umdan a si lo. Mosi ih thupek mi vek a si ahcun Judah-pawl hrangah Peter ih thil tuah mipawl kha thinlung buaitertu a si (Tirh. 11:3).

Tirhthlah 11:4-18 siar aw. Himi thil thleng mi hi Thiang Thlarau lamhruainak le hnatuannak a si tiah Peter in ziang vekin a sim fiang. Thil thleng mi a simslnak ah a thupibik ih a tuah mi ziangsaw a si?

Dan ih a fehpi dan vek a si ahcun Peter in Zentail tihnimnak a tuahsak mi kha thusuhnak tampi a suak thei. A hmai ah Pentecost ni ih thil thleng vekin Thiang Thlarau ih nemhngtnak a hmuhami kha a hrangah a tawk ko (Tirh. 11:12). Himi thu ah thiang thlarau kilven lamhruainak thawngin thlarau laksawng an don mi in soisel ding um loin theihthiam theih a si. "Hi thupawl an theih tikah daiten an um ih, Pathian in Zantail-pawl hnen khalah nunnak a thlen theitu sual sir theinak a pe ve tiin Pathian an sunloih" (Tirh. 11:8 NKJV).

Tirhthlah 11:9-24 siar aw. Kawhhran hmaisapawl ih an can neta lamah ziang thil a thleng?

Jerusalem ih mi tampipawl in an ruahdan ahcun Kornelias le a sungkhatpawl parih thil thleng mi kha zapi umdan thawn a kalhaw ih kha vek hmuhton mi thil thleng um lo sehla ti an duh. Asinan kha mi thil kha thiang thlarau in tuah rori dingih a tumtah mi a si. Seteven thah a ton hnu cun Jesui dungthluntupawl cu Jerusalem le Judah ramah an um ngam loih an tlan hlo theh (Tirh. 8:1). Cun, Samaria, Fonisia, Cypress le Antioch le hmundang tampi ah an fehiih Zentail minung tampipawl in Jesuh kha runtu Bawi ah an pom. Himi thu hi Jesuh in a rak simcia zo mi a si (Tirh. 1:8). Zumtu Judah miphunpawl ih dinhmun ah

kanmah ding ve sehla Zentail-pawl an luh venak kha daite in an um vekin kan um ve ding.

Hmuhnak bituk kan neih mi kan kaih ringring ahcun kan kawhhran le thucah phuan mi ah dawnkhamtu ziang vekin a cang thei?

**TLAWNGKAI NITHUM
JERUSALEM IH KHAWKHANGTUPAWL**

November 14

**Tirhthlah 15:1,2 le Galati 2:11-14 siar aw.
Kawhhran hmaisapawl in buaipi mi thu pahnih an nei,
ziangpawl an si?**

Kawhhran hmaisapawl in harsat an ton mi kha kawhhran lungrualnak ding hrangih tihnung zetmi a si. Judah miphun Khrihfa tampipawl in rundamnak hi Pathian thukamnak a neitupawl lawngih seng mi a si ruangah vunzim tannak kha an tuah tul rori ah an ruat. Judah sakhuhanak ah pum peaw mi hrangah cun Zentail-pawl thawn um tlang hi kan rundamnak hrang hnaihnoknak a thleng thei tiah an zum ih, thenaw dingah a tha tiah zumtu Judah Khrihfapawl in an ruat.

Zentail miphunpawl thawn tlanlennak thu ah Judah-pawl in nunphung dan khoh zet an nei. Tirhthlah-pawl in Zentail-pawl kha Jesuh tluntupawl siter ding duhsaknak an nei ih, an hnenih thuthangtha an thlenpi tikah himi nunphung hi zumtu tharpawl hrangah cun dawnkhamtu ah a cang lohli. Ziangahtile Messiah kha Pathian pek mi thukam cotu miphun hrangah runtu Bawi a si. Thlung hlun sung ih sim cia mi cu Zentail-pawl rundam an ngah theinak dingah Judah miphun ah lut hmaisa in thukam vekih tlun ding a tul nawn lonak phuan a si zo.

Tirhthlah 15:3-22 siar aw. Jerusalem ih rorelnak ah an suahpi mi ziang thupawl so a si?

Thlung hlun ih simsung thu a ummi Zentail-pawl thawn pehzomawknak le vunzim tannak thuhla thawn pehaw in buainak reh rori dingah NASA zetin an rel. Tirhthlah-pawl, Upapawl le Antioch ih a ra mi palaipawl thawn reipi an rel rero nan a phi an ngah thei lo.

Asinan, Peter, Barnabas le Paul kha thusimnak can an pek. Peter in langnak a hmuhami kha Pathian ih pekmi thlarau laksawng Zentail-pawl hnenah thuthangtha sim dingih lamsialnak a si tiah a thu simmi ah a langter. Cui tlunah Paul le Barnabas khal Zentail-pawl hnenah Pathian ih hnatuannak an hmuhton mipawl an sim ve. Cutikah thutak tharhlam an hmuhami lamah an mit an meng. Cule Peter in, "Anmah vekin kanmah khal Jesui ngil neihnak ruangah rundam kan si ding ti kan zum" tiah a ti (Tirh. 15:11 NKJV). Kum za tampi an rak tlun mi nunphung kha Zentail-pawl lam hoiin thuthangtha simmi tleunak hnaihnoktertu ah an duh nawn lo.

Na thinlung ih na urhsun zet mi kha thinlung thlengnak na neih hnuah na theihthiamdan ziang vekin a um? Zumnak na theih tikah hmuhton na neih mi ihsin nangmah lo bawm theitu dingah zir thei mi ziang na nei?

**TLAWNGKAI NILI
CINGFEL DING A HAR ZET MI**

November 15

Antioch ih kawhhran thubuaipawl a thabik ih cingfeltu dingah an rinsan mi palaipawl kha Jerusalem ah an thlah. Upapawl le tirhthlahpawl in reipi an rel hnuah an khawmpa hruaitu bikih a langmi Jesui upa Jame kha a dingah an tuah dingmi ziang a si timi kha thuthen catnak a

tuah (Tirh. 15:13-20). An thu rel cat mi cu Zentail-pawl kha Judah sakhuhanak ih luhpi tul lo dingah felten thuthen catnak an nei ih, Khrihfa ih an luhnak dingah raithawinak danpawl le vunzim tannak danpawl thlun tul nawn lo dingah an rel cat.

Amos 9:1-12 le Jer. 12:14-16 siar aw. Thlung hlun Profet-pawl in Israel ram kiangkap ih miphun dangpawl ih thusim sungnak ziangvek an tuah?

Thlung hlun Profet-pawl in miphun dangpawl ih rundamnak thu an rak simsung mi kha Jame in Amos 9 sungih thu a lakih a sim. Can reipi ihsin Pathian in Israel-pawl ih tetti khannak le nitin an tonnun ihsin leitlun pumhuap rundamnak ding a ruat zo. Hiruangah Pathian in Abraham a ko tikah amah le a cithlahpawl ruangah miphun hmuahhmuah ih thlawsuah co dingmi tiangin a tel (Sem. 12:1-3). Thiang Thlarau hruainak ruangah Peter, Barnabas le Paul tepawl in Zentail-pawl hnenah rawng an bawlih, hnon mi an si lo ruangah Zentail-pawl mi tampi piantharnak an ngah. Hivek ih tetti an khannak thawngin Jerusalem ih Khrihfa hruaitupawl in thlung hlun simlawk thu hi a rak thleng famkim ngai a si ti an theisuak. Himi ruangah Pathian in Zentail-pawl hmaiah hruaiawknak daanpawl a pekih cuih danpawl cu Zentail-pawl hrangah dawnkhamtu ah an cangter (Pui. 17,18). An thu rel mipawl thuthen cat dingin Jame in himi daanpawl a lakih a simsal (Tirh. 15:29). Jesuh sung ihsin rundamnak kha Judah-pawl vekin Zentail-pawl khalin ngah ve dingah Pathian in a ko ti kha theih olte a si. Thiang Thlarau ih lamhruainak in hlanih an theih dah lo mi Bible thutak poimawhpawl kha thuk sawnnin theihnak pek an si.

Tirhthlah 15:30-35 ih Jerusalem ih thurel cat mi in Antioch ih zumtupawl ih mawhphurh kha a sim. Mipipawl tha peknak ca a si ruangah an lungawi ngaingai.

Kawhhran hmaisa ah zohthim ding hmual nei zetmi cu tirhthlah cabu sungah kan hmu. Pathian thu ih a langter mi cu an thinlung kha duhdawtnak, lungruualnak, rinsanawknak kan neih cun Thiang thlarau hruainak tangah lungruualnak a siattertu kha kan hrial thei ding.

Anmai ruahnak ahcun a dik tiih an hmuhami a dik lem lo mi an sim mipawl kha theih kan duh lem loih himi thil thleng mi in a thupi zetmi ziangvek in zirh?

TLAWNGKAI NINGA

November 16

RUAH BET DING: Hmuntin ih a ummi Khrihfa kawhhran-pawl in palai an hril ih, Judah siseh, Zentail siseh, mi langsarpawl an tongaw khawmih tirhthlahpawl le zirhtupawl thawn thu an rel catmi cu an ngan. Jerusalem ih upapawl le Antioch ih palaipawl tla an um ve ih kawhhran ih thunei thei deuhpawl kha himi canah an tel ve. Kawhhran kha pitlinnak famkim thawn Pathian duhdan ih dinmi a si ih, a fehpidan thawn remaw in khawkhangtupawl in an fehpi. Thinlung takin an ruatih an tuah mi a phi kha Zentail-pawl khal Pathian pekmi thiang thlarau hruainak thlun theitu an si ve timi kha fiangten an thei.

Himi thubuai relnak ding le thuthen catnak ah Khrihfa bupawl an zaten kawh an si lo. Tirhthlahpawl le upapawl thuthennak ah ruahnak nei thiltitheipawl in daan vekih thuthen catnak tuah dingah khua an khang. Cumi cu Khrihfa bu zate ih pom thei theh mi a si. Hivek ih thuthen catnak hi an zaten an lungkim theh cuang lo. Tumtahnak sang nei ih rem lonak le thenawknak suahtertupawl le thuneih duhtupawl cun an thu relcat mi ah an lungkim lo. Hi minungpawl hi mawhphurhnak lak mi ah tuanvo latu dingih an lakmipawl an si tiah an ruataw. Annih cu duhpoh ih um mi sualnak hawltupawl, khawkhannak thar suah

vekih umpawl le Pathian hriak thihpawl ih an zirhmi thuthangtha thucah hnatauan khaw tlaitertupawl an si. Kawhhran din hmaisatupawl in himi harsatnak an ton vekin can netanak khalah a um ringring ding. E.G. White, The Acts of Apostles. Pp. 196,197.

REL TLANG DING:

- (1) **JNa kawhhran ah lungkimlonak suak bang sehra tui zarhiah kan zirmi thubuai remdan khui mi saw nahman ding?** Kawhhran ih thuhla cingfel mi kha thurin zirhnak pakhat a si ih, kawhhran sungh nunphung, ukawknak, phun le hnam thuhlapawl in lungrualnak a siatsuah dingih a um tikah hitawk ih thil thleng kan zir mi ihsin thuhla cingfel dan lo bawm thei mi ziangsaw na zir? Kanmah ih kan sunsak mi thu le thilpawl ziangtin so kan hlon thei ding?
- (2) **A tlunih E.G. White cangan mi zohsal aw. Thu tha zetih rel cat mi thusuak a si ko nan, mi hrekkhat in an lung a kim lo. Hivek riahsiatza thil a cang mi ihsin zirlai ziangvek kan lak thei ding?**

THUTLANG KAWM: Kawhhran hmaisapawl in anmai sungah remawklonak a um ih, thuhla tampi ah nasa zetih siatsuah theitu thinphan dai lo in a um. Kawhhran hi thiang thlarau hruainak tangah a um ih, Pathian thu ah an pum pekawkdan kan hmu. Curuangah buainak le thendarhnak a um mi kha an kham thei.

ZIRLAI 8

November 17-23

ZUMNAKAH PUMKHAT SINAK

SABAT TLAI LAM

November 19

TUZARH SIAR DING: Tirhthlah 4:8-12; Tirh. 1:11; Matt. 25:1-13; Heb. 9:11,12; Suah. 20:8-11; 1 Kor. 15:51-54.

BIBLE CANG KEN: “Rundamnak cu zodang hnen hmanah a um lo; ziangahtile rundam kan sinak dingah van hnuaiih minungpawl lakah hmin sakmi pakhat hman an um lo a si” (Tirh. 4:12 NKJV).

1888 KUMAH Seventh-day Adventist lakah Bible simfiahdan thubuai relnak (debate) nasa zetin an nei ta. Pastor-pawl le kawhhran hrugitupawl in Dan. 7 sungh simsung thu, ki pahra ih tican tivek le Gal. 3:24 sungh thupawl an si. Cui an thuhla cuhawknak ih an engtaiawknak in an pawlkom ih mi hrekkhat hrangah siatsuahnak a um ih, lungrualten kawhhran rawng an bawlnak hmel an siatter.

Himi thu an elawknak kha E.G. White cun poi a ti lutuk ih an thuhlapawl fimkhur zetih ruatin le pawl ngaihawknak siatsuahter lo dingin a forh. Pakhat le pakhat hmuhdan bangaw lo ruangah lungkimlonak a um mi ah Jesuh thawn kan pehtlaihnak le a parah duhdawtnak kan langter dingmi a tul zet. Bible cang tin ih simfiahdan ah kawhhran sungah kan bangaw theh ding tiah beisei ding a si lo.

Amah in a sim bet mi cu a thupi bikah Adventist thurin kan theihdan ah pumkhat ih funawknak ding kha

kan hawl a tul tiah a ti (E.G. White, Counsel to writers and Editors, pp. 28-32). Tui zarth ahcun Adventist ah in umtertu Bible cang poimawh deuhpawl le zumnak ah pumkhat ih in tuahtupawl kha kan zoh ding.

**THAWHSAL NI
JESUI SUNGAH RUNDAMNAK**

Khrihfa kawhhran dangpawl hnakin Seventh-day Adventist pawl hi zumnak thurin Bible thutak phuandan ah a tlangpi in kan bangaw. Himi thutak in caan netnak ih Pathian fa a tangmi umsun a langter.

Tirhthlah 4:8-12; Tirh. 10:43 siar aw. Rundam khawkhannak ah Jesuh kha a thupi bik tiah Peter in a theihdan ziangsaw a sim?

Tirhthlah-pawl in Korin khua ah thuthangtha a simmi cu, "Pathian in KHrih ah khawvel hi amah thawn a remawkter (2 Kor. 5:19 NKJV). Sualnak le thihnak ruangah Pathian thawn pehzomaw thei loih kan thenawknak kha Jesuh Khrih thihnak in remnak in tuahsak. Khrihfapawl in Jesui thihnak le thawhsalnak in remnak in tuahsak zo mi thu kha kum za tampi thaten kan rak ruat lo. Himi remnak tuahnak hi tuah sualmi rem salnak a si ih, hlanlai miring cangandan ahcun at-one-ment, tiin a ngan. Himi ih a langter duhmi cu 'atone' tinak (or) in agreement 'lungkimnak' tuahnak a si. Remawknak timi hi pehtlaihawknak thawn a sengaw ih, ruahnak bangaw loih thenawknak thu cingfelnak ah hman mi a si. Kawhhran lungrualnak hi remawk salnak ih rahsuah a si.

A tanglam ih Bible cangpawl in Jesui thihnak le thawhsalnak thu ih a sullam ziangtin in zirh.

Rome 3:24,25 _____
1 John 2:2 _____
1 John 4:9,10 _____
1 Peter 2:21-24 _____

Thurin ah Jesui thihnak le thawhsalnak kan kaihdan hi Khrihfa kawhhran dangpawl thawn kan bangaw. Cumi cu kannih in a tlaitluan thuthangtha tiah kan ti (Thup. 14:6). Vancung mi pathum thuah (Thup. 14:6-12) sungh a tel mi a si. Seventh-day Adventist pawlin himi thuah hi kan thupitter tuk nan, Khrihfa kawhhran dangpawl cun an ngaihsak lem lo.

Khrih thihnak, thawhsalnak le in pek mi ruahsannak hi na thinlung ah cat loih um ringring dingah ziangvek in na zir ding?

**TLAWNGKAI NIKHAT
JESUH VEI HNIHNAK A RATSLNAK**

Tirhthlahpawl le Khrihfa hmaisapawl in Jesui ratsalnak hi 'ruahsannak sunglawi' tiah an ruat (Tita. 2:12 NKJV). Bible sung hi simsung thu le thukampawl kha Jesuh vei hnihnak a ratsal tikah a tleng famkim theh ding tiah an ruat. Seventh-day Adventist-pawl khalin an kaihhnget mi an thurin a si. Cui ruangah Adventist tiah langsar zetin kan ko aw. Khrih kha an duhdawt ih an beisei mi cu hmaiton in amah thawn thu retlannak can a ra tleng leh ding timi a si. Pathian minung kan si vekin a vei hnih ratsalnak ding thukam a thlen famkim ni tiang lungrual dingah nun lamhruaitu ah kan hmang a si.

A tangih Bible cangpawl in Jesui ratsalnak thu ziangtin saw in zirh? Jesui ratsalnak hi mi hrekkhat in

a tlangpi ih an theihdan thawn ziangvek in saw a danglam (Tirh. 1:11; Matt. 29:26,27; Thup. 1:7; 1 Thess. 4:13-18; Thup. 19:11-16).

A pekmi rundamnak ngahtupawl in Jesuh a rasal ding timi fiang zetih an sim theinak dingah Bible in a sim non rero. Cui can ziangtikah a thleng ding tiah kan ruat ko ding. Ziangatile Jesuh in, “Cui ni le can cu zohman in an thei lo, van ih vancungmipawl khalin an thei lo, ka pa lawngina thei” (Matt. 24:36 NKJV) tiah a ti. A ratsalnak ding ni le can kan thei lo ti men ding kan si lo, a can kan theih lo dingmi felten in sim zo.

Jesui rawngbawlnak can netnak lamah fala him (10) ih thuthimnak kha a sim (Matt. 25:1-13). Kawhhran in a ratsalnak an hngahdan ding a simfiangnak a si. Cui fala him pahrapawl cun phun hniih ah thenaw in a langter. Himi in a ratsalnak zumih hngaktu lakah mi bur pahnih an umnak ding kha a sim. Jesuh kha zamrang teih a rat lo ruangah himi bur pahnih an danglamnak felten a lang. Bur khat cun a rat tlai khalle poisaknak um loin thlarau lamah timtuahnak nasa zetin an nei ih, ralringten an um. Himi tahthimnak thu ah Jesui a beisei mi cu thinlung ih phurnak le vei khat thathonak parah zumtui nun thumaw lo dingah a duh. Pathian thukam mi a thlen famkim ngaingai lo khalle Pathian zangfahnak rinsan ringring ih zumnak kil him ding a duh. A ratsalnak ding timcia teih thlir ringring dingah Jesui sawmmi kan si.

Kan hminah Seventh-day Adventist kan tiaw ih Jesui ratsalnak ziangvek in kan ngaihsakdan kan langter. Jesuh kha a ra rori dingih kan umdan ziangvek in saw kan kilhim awk? Fala him pahra thuthimnak Jesui ralrinnak in peknak hi kum ziang zat khal rei sehra theih sualnak um loin ziangtin saw kan um ding.

**TLAWNGKAI NIHNIH
VANHMUN THIANGHLIM AH JESUI RAWNGBAWLNAK**

**November 20
2023**

Thlung hlun sungah Pathian in leitlun ih a um theinak dingah le amah an rian theinak dingah hmun thianghlim sak dingah Mosi kha a fial (Suah. 25:8). Cui hmun thianghlim rawngbawlnak ihsin Israel-pawl kha rundam khawkhannak thu a zirh. Solomon siangpahrang san a thleng ih thawn ih fehpi rero thei mi puan biakinn kha biakinn pi mawi zet le tha zetah a thleng (1 Siang. 5-8). Puan biakinn le Solomon biakinn sakmi kha vanih hmun thianghlim zohthim ih sak mi a si (Jesuh kha minung ih sakmi si lo Bawipai sakmi ah rawngbawltu a si. Heb. 8:1 NKJV, Suah. 25:9,40).

Pathian umnak van hmun thianghlim ih rawngbawlnak kha a hram thokten a um timi Bible sungah a sim. Lei hmun thianghlim rawngbawlnak kha Jesui rundam khawkhannak hnatuannak le vanah puithiam bawibik hna a tuannak a thlamih a langtertu simsung thu a si.

**Hebru 8:6; Heb. 9:11,12, 23-28 le 1 John 1:9-22
siar aw. Hipawl hin vanah Jesui hnatuannak ziang thu
saw an sim.**

Jesuh kha vanah a kai ihsin van hmun thianghlim ah kan rundamnak ding hrang puithiam hna a tuan (Heb. 7:25). Cui ruangah Pathian Bawi tohkham cu raltha zetin pan uhsyi, cutawk ah zangfahnak a um, bawm kan tul tik canah a ngil neihnak kan ngah theinak dingah zangfahnak a um (Heb. 4:16 NKJV).

Lei ih puan biakinn ah puithiam hnatuannak hmun hniih a um. (1) Hmun Thianghlim nitin rawngbawlnak hmun le (2) kumkhat vei khat rawngbawlnak hmun thianghlim bik a si. Himi hi vanah Jesui rawngbawlnak hmun pahnih

a ummi Bible in a langter mi a si. Van hmun thianghlim ah palai hna a tuan ih, sual ngaithiamnak, remawk salnak le dinthar salnak hnatuannak a si. Sual sirtupawl hrangah Pai hnenah palai hna a tuan ih, ngaithiamnak a dil sak (1 John 2:1). Kum khat vei khat puithiam Bawi bik in hmun thianghlim bik sungah tlengfainak hna a tuan. Cumi cu 1844 kum ihsin Jesuh kha thuthennak hnatuuan dingin hmun thianghlim bikah a luhnak hmuhtertu a si (Pui. 16). Puan biakkinn ih hmun thianghlim tlengfainak an tuah mi kha Jesui thisen sirhsan ih tuahmi a si. Kum khat veikhat remawknak an tuah mi ih a langter duhmi cu Pathian uknak tangah a uk mi an sinak thawn a remaw zet. Mi thianghlim sinak dingah lei le van huap sualnak a hmai ih a ummi hmuahmuah Jesui dingfel thianghlimnak in a thianfai theh ih remawksalnak famkim a tuah theh mi a langter. Himi rawngbawlnak hmun pahnih umdan hi Adventist-pawl ih thurin rundamnak famkim an theih mi le an phuansuah mi a si.

**TLAWNGKAI NITHUM
SABAT (ZARHNI)**

Seventh-day Adventist-pawl in a thupi zet tiih an kaih hnget mi le an zirh theu mi cu ni sarah ni sabat thu kha a si. Himi thurin ih a suahpi mi cu lungruanlak le pawlkomnak a si. Khrihfa ramah midang thawn kan bangawk lonak kha himi a si ih, kanmah lawngih kan thlun mi a si.

Sabat ni hi kan suah ni ihsin kan thih ni tiang kan ngah mi covo (human right) a si. Amah ah zarh khat sungih sersiamnak le thlawsuah peknak a tel ih Pathian laksawng pekmi a si (Sem. 2:1-3). Sersiamnak ihsin Pathian in nidang hmuahmuah hnakin sabat ni kha a urh sunnak

phun thumin a lang. (1) Pathian a hnatuuan in a cawl, (2) cui ni cu thlawsuah a pek, (3) cui ni cu a thianghlimter. Himi thil pathum ih a langter mi cu Sabat ni hi Pathian laksawng a si ti in zirh. Van Pathian in lei le van a sersiamnak ah niruk sung can a hmang tinak minungpawl ih hmuhton ihsin theihthiam dingih tuahmi a si. Saya tiah an theih cio mi Abraham, Joshua, Heschel in Sabat ni kha ni thianghlim Pathian in a minungpawl thawn tonawknak ni ah a tuah mi a si (a palace time) A sunglawi mi thlawsuah phunkim thlarau lam le taksa lamah kan ngah ni le Pathian thawn umtlangnak ni sunglawi le lungawi za ni ti nak a si.

A tanglam ih Bible cangpawl in minung hrangah sabat in sullam a neih mi ziangvek in zirh? Suah. 20:8-11; Danp. 5:12-15; Ezek. 20:12,20).

Seventh-day Adventist-pawl in Jesuh thluntu sinak nei in Jesui tuahdan kel nisarih ni sabat kan ulhnak a si (Luke 4:16). Sabat ni ih Jesuh in khawmnak ih a tel theunak san kha Pathian biakih khawmnak ni a si timi a nemhnget a si. Sabat ni ih mina damternak le thilmak a tuah mi tla taksa le thlarau lamah damnak duhin mi tampi ra sehla sabat ulhdan zirh a duh ruangah a si (Luke 13:10-17). Tirhthlahpawl le Khrihfa hmaisapawl in Sabat kha Jesuh in a thiatbal loih a hlon hlo lo ti an thei. Anmah khalin Sabat ni ah Pathian biakkinn ah an khawm ringring (Tirh. 13:14; 42,44; Tirh. 16:13; Tirh. 17:2; Tirh. 18:4).

Sabat hminsinnak duhnung zet mi pakhat cu kan sualnak ihsin miluat kan sinak hminsinnak a si. Sabat hi Pathian in Israel-pawl kha Izipt ram sal sinak ihsin a luatter ih ramtiem Kanaan ah a colhernak hngilhlonak khal a si (Danp. 5:12-15). Cui colhnak ah Israel-pawl in a famkim colhnak an ngah lonak kha Pathian thu an thlun lonak le milem an biak ruangah a si ih cui thukam cu tui nitiang a

um ringring. Pathian minungpawl hrangah cun colhnak a um lai tiah a ti (Heb. 4:9 NKJV). Jesui rundamnak in tuahsak mi sungih colhnak ah mi hmuahmuah in luh an duh. Sabat ni zarth hmannah kha Khrih sungah thlarau lam colhnak kan ngah mi zohternak a si. Rundam kan si theih kumkhaw nunnak in pek mi ngahtu cun mai tuahmi rinsan loin Jesui thatnak le thiaghlimnak rinsannak ruangah a si (Heb. 4:10; Matt. 11:28-30).

**Bawi Khrih in a minungpawl hrangah a duhthu-
sam cu lungualten pawlkomawknak nun nei thei dingin
sabat ulhnak in ziangti vekin a lo bawm?**

**TLAWNGKAI NILI
THIHNAK LE THAWSALNAK**

November 22

Sersiam lai ah “Pathian in leivut in milai a tuah ih, a hnay ah nunnak thaw a thaw lut. Cule milai cu minungah a cang” (Sem. 2:7 NKJV). Himi sersiamnak umdan ah minungih a ummi nunnak hi Pathian pekmi sinak a lang. Himi nunnak hin kumkhaw nunnak a sinak a suahpi a si lo sawm? Kumkhua a nungmi cu Pathian pakhat lawng a um tiah Bible in a sim fawn (1 Tim. 6:16). Kumkhaw nunnak hi minungin a suahpit sinak ah a nei lo. Pathian thawn zohthim ahcun minung hi thi thei mi sinak a nei. Bible in kan nunnak kha “can malte sung a langih, a hloral mi tikhu vek fang a si” tiah a tahthim (James 4:14 NKJV). Kan itthat tikah theih mi zianghman nei loih kan um vekin kan thih tikah kan um (Thus. 9:5,6,10; Saam 146:4; Saam 115:17; John 11:11-15).

Minung hi suahthlak in thi thei mi a si ih, thihnak hmabak a si. Bible in kumkhaw nunnak hrampi cu Jesuh a si tiah a ti. A tuah mi rundamnak cu a zumtu hmuahmuah kumkhaw nunnak pek dingin thu a kam. “Pathian

pekmi laksawng cu kan Bawipa Jesui zarah kumkhaw nunnak a si” (Rom 6:23 NKJV). Jesuh in thihnak kha a siatsuah theh ih, nunnak le thih thei lonak kha thuthangtha tleunak in a run keng zo (2 Tim. 1:10 NKJV). Pathian in leitlun a duhdawt tuk ruangah a Fapa neihsun a pek. Zokhal amah a zumtu hmuahmuah cu hloral loin kumkhaw nunnak an nei (John 3:16 NKJV). Curuangah thih hnuah nun theisalnak ruahsannak kan nei thei.

**1 Korin 15:51-54 le 1 Thess. 4:13-18 siar aw. Hi
cangpawl in minung hnenah thi thei lo sinak pek a si
tikah thih hnuih nunnak thu ziangvek in a rel.**

Paul in minung hnenah thi thei lo sinak Pathian in a pek thu fiangten a sim. Cui thil cu minung a thih veten a pekmi a si lo ih a netabik nunnak mumek a tum tikih thawsalnak canah pek dingmi a si. Kumkhaw nunnak thukam mi kha zumtupawl in Jesuh kha rundamtu Bawi ih an pom veten an ngah. Thi thei lo sinak kha thawsal canah an ngah lai ding. Thlung thar in thih veten minungih thlarau kha vanah a fehso tiah a simmi hmuh ding a um lo. Himi thu zirhnak hi milem bepawl ih pomdan sirhsan mi ihsin a ra. Hlanlai Grik mifimpawl ih an suangtuahnak a si. Himi zirhdan hi thlung hlun khalah hmuh ding a um lo.

**Jesui ratsalnak thukam ah beiseinak tampi kan
neihnak in thihnak thu theithiam dingin ziangvek in in
bawm? Seventh-day Adventist kan si vekin himi zumnak
in ziangvek in hmual nei zetin lungualnak in tuahsak.**

TLAWNGKAI NINGA

November 23

RUAH BET DING: Seventh-day Adventist kan si vekin kawhhran dangpawl thawn a bangaw mi thurin a thupi zet mi kan sim. A thupibik mi cu kan ai-awh in Jesui a thihnak

thawngin remnak in tuahsak mi kan zumnak lawng in rundamnak kan ngah ti mi thu a si. Khrihfa kawhhran dangpawl thawn kan bangawknak cu kan phu lo laksawng zangfahnak ruangih kan ngah mi Jesui dingfel thianglimnak ruangah thiam coter mi kan si. Kan tuah thatnak a um lo timi kha a si. E.G. White ih a ngan mi cu: kan tuar dingmi Khrih in a tuar ih Khrih tuarmi kha kan tuar ding mi a si. Kan sualnak ruangah hremnak a tuarih hremnak tuartlak sualnak a nei lo. Amai zarah nunnak kan ngah theinak dingah kan ai-awh in thihnak a tuar. The Desire of Ages. Pp. 25. Himi hi kan thurin sirhsan a si. Khapawl kan zum ruangah nitin kan ziaza in a lang. Cule himi in Khrihfa khawvel ah cungcuang le danglam ah in tuah. Seventh-day Adventist pakhat dinhmun ihsin hivek in a um taktak ding a si ih, cuti ih a um lo le ziangah saw hi kawhhran ih a um. Jesuh kan duhdawtnak le a zirhmi thupawl kan phuang. Cumi cu lungrial zetih an pawlkomtertu bik a si.

REL TLANG DING:

- (1) **Faith and Work, p. 103 ah E.G. White in thiam coternak le sual thlahnak kha an bangaw tiah a ngan. Sual ngaithiamnak kan ngah mi le thiam conak, Khrih zarah unau za kan sinak kha ziangtluk in kan sunloih?**
- (2) **Kawhhran lungrialnak ah kan thurin hi ziangtluk in a thupi timi ruat aw. Mi tampi le miphun danglam zet, sakhanak a phunphun, uknak bangaw lo mi le nunphung danglannak ihsin thurin bangaw mi phuang tlang dingah ziangin saw in finkhawm. Kawhhran lungrialnak dingah thucah le a rawngbawlnak lawng si loin kan thurin hrimhrim in a thupitnak ziangvek in sim.**

(3) *Seventh-day Adventist tiih kan kawhhran hmin in a thupi zetmi thu nisarih ni sabat le Jesui ratsalnak kha in zirh. Pakhat in lei le van sersiamnak a sawh ih, a dang pakhat in rundamnak a sawh. Himi thu pahnih an pehzomawknak ziang a si? Himi in mipi lakah zo saw kan si ti mi tawi fel famkimin ziang saw a langter.*

THUTLANGKAWM: Seventh-day Adventist-pawl in midang thawn a bangaw mi thurin tampi an pom ve ko. Khrihfa kawhhran dangpawl thurin pom mi bangawknak tam hman sehla an pom thei ve lo mi a dang tla a um. Himi a zaten Jesuh ah kan pumkhatnak hrampi le kan kawhhran sinak hmuahhmuah a tarlangnak in zirh mi a si.

ZIRLAI 9**November 24-30****A FIANG THEI BIKIH LANGTERNAK****SABAT TLAI LAM:****November 24**

TUZARH SIAR DING: John 11:51,52; Efe. 2:13-16; 2 Kor. 5:17-21; Efe. 4:25-5:2; Rom 14:1-6; Tirh. 1:14.

BIBLE CANG KEN: “Cun, hihi amai palung suakih a simmi a si lo. Cui kumih puithiam sang a si vequin cui miphun hrangih Jesuh a thih ding thu a rak phuannak sawn a si. Cui miphun hrang lawng si loin, a vak darh mi Pathian fatepawl hmun khatih a hruaikhawmnak ding khalah a si” (John 11:51,52 NKJV).

KAN dung zarhah ni neta ah Jesuh kha rundamtu Bawi ah Bible in a thupibik ah a langter. Kan aupi cio mi cui thuthangtha zarah mithmuh ih lungualnak a tuah thu kan zir. In pekmi thuthangtha ruangah kawh mi kan si ih, cui thuthangtha kha leitlun ah phuang darhtu ding kan si.

Tui zarh ah a thupibik ih kan zir dingmi cu tuisan ih a nungmi Khrihfa nunah le kawhhran hnatuannak ah mithmuh ih lungualnak an fehpi mi a si ding. Kawhhran in a tlangpi ih thuthangtha a sim mi cu rundamnak le remnak tuahtarsalnak thu a si. Lungual zetih a ummi kawhhran in remnak tuahtarsalnak kha a thupi bikin an sim. Sualnak ih a khat mi leitlun ah Jesuh Khrih ih thiltitheinak zarah rundamnak hnatuuan kha kawhhran in mithmuh in a dinpi. Tuisan leitlun ah Cross zarah rundamnak thiltitheinak ih hnatuannak kha kawhhran

lungualnak le pumkhatnak um loin a cang thei lo mi a si. Khrih sungih pumkhat sinak in midang thawn pumpak ih lungualnak ah in funkhwam. Himi lungualnak in Jesui sunlawinak le a thiaghlimnak le thatnak kha leitlun ah a langtertubik a si. Cumi cun sualnak a thai hlo ih, hnawl fai theitu thiltitheinak a si (E.G. White, Comment the SDA Bible Commentary Vol. 5. Pp. 1148).

**THAWHSAL NI
JESUI CROSS HNUAI AH**

November 25

Kawhhran lungualnak hi thlarau laksawng Pathian pekmi a si ve. Lungualnak hi minung sinak in thil tha taimak zetih tuahnak le taimak suahih zuam rero ruangah a ummi a si lo. Himi lungualnak hi Jesui thihnak le thawhsalnak thawngin a um mi a si. A thihnak le thawhsalnak kan zumnak ruangah sual ngaihthiamnak kan ngahih tipilnak a ngah mi kan si. Cumi in zatlang pawlkomnak in neihter in leitlun ah vancung mi pathum thuah phuangdarh dingah Jesuh thawn pumkhat kan si ih, pakhat le pakhat lungualten in tuah.

John 11:51,52 le Efe. 1:7-10 siar aw. Seventh-day Adventist kan si vequin Jesui nun rinsan in kan karlak ih lungualnak ding thil thlengmi ziang a um?

Cun, hihi (Kaiafa) in amai palungih a sim mi a si lo, cui kumah puithiam sang a si vequin cui miphun hrangah Jesui thih ding thu a rak phuannak thu a si. Cuih miphun hrang lawng si loin a vak darh mi Pathian fatepawl hmunkhat ih a hruaikhawmnak ding khalah a si (John 11:51,52 NKJV). Pathian in Jesui thihnak san simfiang dingah Kaiafa kha phundang zetin a hmang. Jesuh thihnak dingah sual puhnak an tuah mi ah Kaiafa in ziang ka tuah

ti mi a thei aw lo. Cuti a si lo hmanah puithiam a si ih thu a sim mi ah ruahnak thuk le fel zet a nei ding. Kaiafa cun uknak le hruainak lawng a tuah. Pathian ih mi rinumpawl ai-awh in Jesui a thihnak thu ih a hrampi John in a langter tikah hipawl in nikhat ni ah lungreal zetin an um tlang ding ti a langter.

Seventh-day Adventist kan si vekin kau zetin thucah ziangkim kan pom ih, a phuangtu khal kanmah lawng kan si. Kan ai-awh in Jesui thihnak kan pomdan a bangawk ruangah lungreal ten kan um thei.

Cule Khrih sungah tihnimnak hmun khat kan ngah ruangah lungrealnak nun kan nei thei. “Jesuh Khrih nan rinnak ruangah nan zaten Pathian fa nan si. Khrih sungah baptisma cotu nan zaten Khrih thawn nan thuamaw (Gal. 3:26,27 NKJV). Tihnimnak hi Khrih ah kan zumnak khiihmuhnak a si ih, pumkhat ah in tuahtu pakhat a si tiah Adventist-pawl in a tlangpi in kan sim. Pathian pakhat kan pa ih fa kan si ih rundamtu Bawi pakhat kan nei ih, a thihnak le a thawsalnak ah tihnim mi kan si.

Seventh-day Adventist kan si khalle nunphung, zatlang nun, hrinthlaknak le ci le kuang, uknak timi thleidannak a phunphun a um ve ko. Jesuh ah zumnak pakhat lawng kan nei mi in ziangah thleidannak um loin kan um thei?

**TLAWNGKAI NIKHAT
REMAWKSALNAK IH HNATUAN**

Kan leilungpi hi buainak, mangbang vansannak, do-awknak, remawk lonak in a khat theh ti fiangten kan thei. Himi thilpawl in pumpak nun, khawtlang nun ram le miphun tiangin a siatsuah. Himi thil kan parah a thlen

cun nun hi ninum ah a cang. Cui rem lonak le buainak in kumkhaw nehnak a ngah lo ding. Pathian in lei le van remnak leng dingah palai a thlah. Remawk lonak hi sualnak ih thaman a si. Kumkhua in remnak le daihnak leng dingah Pathian ih tumtah mi a si.

Efesa 2:13-16 ah Jesuh in zumtupawl lakah remnak leng dingin hna a tuan tiah Paul in a langter. Cross parah Jesui thihnak le thawsalnak in Judah le Zentail-pawl ih an thleidanawknak, sakhuannak, nunphung le miphun thleidannak ih thenawknak kha a siat theh. Khrih in kum zabi pakhat laiah Judah le Zentail-pawl remnak a tuah mi a hlawhtling ahcun tui sanah kawhhran sungih a um miphun le hnam le nunphungpawl in phar dawl vekih in khamtu kha ziangah kan umter lai?

Himi remnak hi a hramin thok sak zo mi ruangah leitlun hmuntin kan dap thei.

2 Korin 5:17-21 sungah Paul in Khrih sungah sersiam thar mi kan si ih Pathian thawn remaw sal zo mi kan si tiah a ti. Cusile leitlun ih kan hnatuuan mi ziangsaw a si? Kan kawhhran kha taksa pum pakhat sungah kom zo mi kan si ih, kawhhran zatlang nunah thleidannak ziangsaw kan tuah lai ding.

Pathian sersiam thar mi kan si vekin zumtupawl in remaw dingah a thupi zetmi tuanvo pathum kan nei. (1) Kan kawhhran hi vei khat laiah Pathian thawn thenaw in theih dah lo mi vekih a um zo mi, zumtupawl pungkhawm mi kan si. Asinan Khrih thawinak ih zangfahnak zarah runmi kan si. Cule Thiang Thlarau hnatuannak zarah Pathian thawn lungrealnak kan ngah zo. Pathian fate a tang mi umsun kan si ih, can neta ih thucah phuangtu dingah kawh mi kan si. Kan tuanvo cu Pathian thawn

thenaw ih mikhual vekih a um mipawl kha Pathian thawn remaw sal dingah sawmtu dingih tuanvo pekmi kan si. (2) Kawhhran hi Pathian fa kan si ih, pakhat le pakhat remaw ding kan si. Khrih ah kan pawlkom theinak dingah rualrem zetin kan um tlang ding. Himi hi a thupi zet tiih suangtuahnak men a si lo. Mithmuh rori ih a lang dingmi a si. Jesuh Khrih kha in runtu Bawi le tlentu a si ruangah bulpak cio ah rualremnak, u le nau karlakah rualremnak le daihnak um dingin theihpitu ah leitlun ih thlah mi kan si. "Pakhat le pakhat nan duhdawtaw a sile mi hmuahmuah in ka dunghluntu nan si hi mi in an thei ding" (John 13:35 NKJV). (3) Remaw sal dingih hnatuannak ruangah kawhhran in leitlun ah tlennak thudik le Pathian khawkhan hmual a nei zet mi kha an phuang. Leilungpi in Pathian ih kumkhua saduhthah a neih mi lei le van mithmuh ah kawhhran in remnak le lungualnak kha tampi in kan neih a tul.

**TLAWNGKAI NIHNIH
NUNAH A LANGMI LUNGUALNAK**

1902 kumah E.G. White ih a ngan mi cu: Jesui leitlun nun hmandan vekin Khrihfha hmuahmuah kan um ding. Soikop loih a thiaghlimnak lawng si loin zawi theinak, nunnemnak, a suahpit mi thinlung putah duhnung mi a sinak pawl kha kan zohthim ding mi a si. E.G. White. Signs of the Times. July 16, 1902. Himi thu hi Paul in (Fillp. 2:5 NKJV) sungah "Himi thinlung putdan Khrih Jesuh ih a ummi kha nanmah ah um seh" tiih a ngan mi in vun mangter saltu a si.

Efesa 4:25-5:2 le Kol. 3:1-17 siar aw. Thusuhnak pahnih a um mi kha sawn aw. Khrih lamtang a sinak langter dingih sawmnak kha phundang zetin ziangvek

in kan nunin tuam khat? Mipi vantlang hnenih kan nun in Jesui thuthangtha ziangvek in kan simfiang?

Midang hnenah Pathian zangfahnak kan ngah mi kan nunih langternak le Jesui nun kha Khrihfapawl in zohthim ih nunpi ve dingah Bible cang tampi ah sawm mi kan si. Midang zawn ruat dingah in sawm (Matt. 7:12), midang phurrit sawng dingah (Gal. 6:2) sawm mi kan si. Tlaitluang nun nei dingah le thinlung sung ihsin a tho mi thlarau nun kha a langih tuahsuak dingah kawh kan si (Matt. 16:24-26; 1 Pet. 3:3,4). Cui tlunah harhdam teih nun hmang dingin ei le in ah le umtu khawsakdan thiammi nun nei ding kan si (1 Kor. 10:31).

Duhdawt zet mi tla mikhual le khual tlawng nan si bangin kan nun siatsuahtu tisa cakhiarnak tuah lo dingah ka lo dil. Zentail-pawl lakah nundan mawi nei uh, cuti cun thil tha lo tuahtu ah an lo puh lai ah, an hmuuh thiltha nan tuah mipawl an hmu dingih Pathian a rat ni ah amah cu an thangthat ding (1 Pet. 2:11,12 NKJV). Khrihfapawl ih nungcang hi a hmutupawl hrangah niam zetah kan lanter theu. Kan thin aithoknak can tawite kha zawi theinak kan langter ding. Dodalnak a um canah sup theinak nei ding. Thinheng canah thin nemnak cuhin tongkam mawite hmang ding. Hipawl hi Jesui thinlung put langtertu an si. Seventh-day Adventist-pawl cun Pathian nun ziazza ah theihsualnak an neih mipawl parah lungualten a dikanak theihpitu an si. Aiawhtu kha Khrih a si vekin zumtupawl in thinlung dingfelnak hrang lawng si loin, midang hrang thathnemnak hawlin nuncan ih langter ding kha an tumtah bik ding. Kan sakhuanaik ih nuncan kha a taktak a si ih, amahten a langsuan fawnih leilungpi hrangah thathnemnak a nei. Zumtupawl lungual ih pumkhatnak kha leitlun ah Khrih nuncan langter dingah saduhthah mi a si ih, hmual nei zetih langternak a si.

Midang hnenah ziangvekih theihternak saw na tuah? Miin Jesuh dung an thlun duh theinak dingah ziang hmuhami an nei?

**TLAWNGKAI NITHUM
BUMNAK LAKAH LUNGRUALNAK**

Paul in Rome 14 le 15 sungah Rome khua ih kawhhran an thenawnak ih a veinak kha a ngan. Hi thu hi Rome kawhhran ih a um mipawl in pakhat le pakhat tuar theinak le zawi theinak neiin kawhhran then lonak ding thu ruat in a sawmnak a si. Himi ruahnak pekmi ihsin ziangso kan zir thei mi a um?

Rome 14:1-6 siar aw. Rome khua ih member-pawl in pakhat le pakhat remaw loin le soislaw ih an um mi ah ziang vek ruahnak an nei?

Himi thu hi Judah-pawlih an ulh mi puai an thianhlimter lonak thu a si hmang. Paul ih a simdan ahcun ‘ringhlel ih thu elawknak’ (Rom 14:1 NKJV) thu a si. Kha mi kha an rundamnak thawn pehtlaihaw loih bulpak ngaihdan a si ih ret tha men dingah a sim (Rom 14:5).

Himi thu elawknak kha a hmaisa ahcun ei le in thu a si. Asinan puithiam 11 sungih sa ei thiango rannung thu a sim lo. Peter in ‘ka kaa sungah a lut dah lo’ (Tirh. 10:14) ah a ti mi kan hmu ih, Khrihfa hmaisapawl in voksa le a thiango lomi rannung sa einak an thok tinak thu a um lo. Zumnak derdaipawl in thlaihing an einak a um (Rom 14:2). Cule sasen (namcansa) einak thuthawn pehaw ih thu elawknak a ummi a lang (Rom 14:7,21). Himi thuuh a langdan ahcun ei thiango rannung sa raithawinak ih an hman mipawl an sim ih Grik in (Koinos) tiah (Rom 14:14) ah a ngan. Himi cafang hi thlung hlunih a thiango rannungpawl simnak ah hlanlai Grik-pawl ih lehlin miah

an rak hmang. Asinan puithiam 11 sungih a thiango rannung thuhla a si lo. A langdan ahcun kawhhran zatlang nunah mi hrekkhatpawl in milem biaknak ih thawiawknak sa kha rawl eitlangnak an tuahnak hmunah an hmang le hmang lo felten an theih lo ruangah khavek rawl eitlangnak hmunah an tel duh nawn lo.

Kha mi thu vek kha can reipi buaipi rero in an um. Cui thu cu zarhtin sabat ulh thu a simmi a si lo. Ziangahtile Paul in zarh tinten a ulh kelin Sabat a ulhnak kan hmu (Tirh. 13:14; Tirh. 16:13; Tirh. 17:2). Himi thuuh a langdan ahcun Judah-pawl ih puai ni an ulh mi pakhat khat asilole rawl ulh ni tivek a bang. Paul in himi thu ah a thiango rannung tiah an ruahdan vekin a ul duhtu cun rimumten ul ko seh, rundamnak thu thawn a pehtlaihaw lo tiah a sim. Kan zumnak ah an hmin taktak lo ahcun kan lungkim pit lem lo mi thuhla an sim mi ah zawiawk theinak le kan thin kan supawk thei tikah Khrihfa lakah lungrualnak amahten a lang ding.

Seventh-day Adventist pawlih tuahmi hmuah-hmuah kha Adventist si dingah zum ngaingai le tuah ngaingai a tul lo mi a si an ti mipawl ah kan zummi le kan tuah mi ziangpawl so a um, nan zircanah rel tlang uh.

**TLAWNGKAI NILI
RAWNGBAWLNAK AH LUNGRUALNAK**

November 29

Tirhthlah-pawl Bawipa Zanriaah an hil zikte ih an thinlung put (Luke 22:24) ih nganmi le Pentecost thlen hlan teih an thinlung put (Tirh. 1:14; Tirh. 2:1) ih ngan mipawl zohthim aw. An nun danglamtertu ziang a si?

Tirhthlah 1:14 le Tirhthlah 2:46 sungih tongkau sehdan ah ruahnak hmunkhat in an um timi a hmang. Himi hi Jesui thukam mi hnemtu thlarau thlah dingmi

thleng famkimter dingah hmunkhat ah um tlangin le thlacamnak neih tlangnak ihsin a um mi a si.

An hngak lai canah tawhawk a olte. Peter ih Jesuh a rak phatsannak (John 18:15-18; 25-27) le Jesuh thawsalnak ringhleltu Thomas tivek soiselnak neih a ol zet (John 20:25). Cui tlunah John le Jame ih Jesui uknak sungah an unau in thuneihnak nei dingah an dilnakpawl tla an hngilh lo ding (Mark 10:35-41). Cule tuan deuhah Matthai tla kha a beidon ruangah ngunkhuai khawlnak ah a tosal tivek thu tla an famkimlonak a um hnuaikhni (Matt. 9:9).

Ziangkhal sisehla an timtuahnak ni reilote sung kha thinlung ih hmuhsuahawknak ah an hmang. Tirhthlahpawl cun an thlarau tulsam mi cu thin bang le awloksong in an um ih, Bawipai hnenah mitthli thawn an tap. Thlarau runsuah hnatuan dingah hriak culh tlak si dingin cakhiarnak an nei. Anmai bulpak hrang nei le siah neih duhnak an nei lo. Thlarau runsuahnak hna ah lung rethei le awloksong in an um. Thuthangtha hi leitlun hmuahmuah ah thlenpi ding a si timi kha an theifiang. Cu tikah Bawi Khrih ih thutiamkam mi thiltitheinak an tulmi kha an thinlung takten an dil (E.G. White, The Acts of Apostles. Pp. 37).

Tirhthlah-pawl in thinlung takte ih an thlacamnak ruangah Pentecost ni can rei lote sung hrangah anmai lakah timtuahnak a um. Cu tikah Pathian thawn an naihaw sinsin ih thleidannak thinlung a hlo theh. Cule Jesui thawsalnak kha tihnak nei lo raltha zetih an sim theinak dingah Thiang Thlarau in Tirhthlahpawl ih nun a luahkhat. Jesuh in an santlaih lonak hmuahmuah a ngaithiam theh timi an theih tikah raltha in hmaiah an nor sinsin. An nunah Jesuh in an hrangih a tuahsak mipawl an theisuak ih Jesui ruangah rundamnak thukam an ngahnak kha an thei.

Jesui lalram thangso theinak dingah zumtupawl cun thinlung takte ih hnatuannak le Jesui nungcang vekih nun ding kha duhhichernak an nei. Cui hnu cun Bawipa in anmah hmangin a thiltitheinak huham a langter. Himi ah tuisan kan kawhhran in ziangvek zirlai zir ding saw kan neih?

Midang an palhnak soisel ding kan hmu ringring ding. Midang palhnak hmu lo dingin ziangtin kan zir ding? Pathian duhdan vekih kawhhran lungualnak a sang sinsin theinak dingah midang sualnak hmu loin ziangtin kan um thei ding?

TLAWNGKAI NINGA

November 30

RUAH BET DING: Leitlun ah thuthangtha hmual nei zetih an sim theinak dingah le an lungualnak tunghmun ringring theinak dingah an danglamnak ngaihsak loin an um. Cumi ihsin kawhhran ding hmaisapawl in Jesuh sungah an pumkhatnak kha hmuh thei dingin a tanglam ih thupawl in an langter. "Kawhhran hmaisapawl ih thuthen catnak an tuah mi ah siseh, Thiang Thlarau ih khurhawmnak le lamhruainak kha kawhhran sungah a um ringring tiah Bible in a langter. Himi hi a mal bik pathum naihaw zetih pehaw miphun a si. (1) Langnak thuphuan (e.g. Thiang Thlarau in minung hnenah an tuah dingmi a sim. (a) Kornelias, (b) Ananias, (c) Fillip). (2) Camcawh fung Zuknak tlain an hmang. Kawhhran ih thutluknak a tuah mi kha Bible sungih thu vekein an tuah. (3) Ruahdan bangrepnak (Zatlang nun ihsin thiang thlarau hnatuannak ihsin ruahdan bangawklonak le pakhat le pakhat biakawknak ah a thupten thiang thlarau hna a tuan ti theihnak a um. Cui langnak cu nunphung sinak danglam zet an ton tikah pomdan thurin zumtu vantlang nunah zirhawknak ih thuhla cuhawknak ah Thiang Thlarau ih hnatuannak zarah

ruahnak pakhat ah thutluknak tuah dingah a hruai. Hivek tuahdan hi hruaitupawl hnen lawngah si loin zumtupawl ih nundan ah kan hmu thei. A thupibik mi cu a sia le a tha thleidang theinak dingih thlacamnakpawl a si. Thlarau ih hruainak zarah Pathian thu theihtheinak kha zatlang nun ihsin kan thei thei ih, hruaitupawl le rawngbawltupawl hnen khalin kan thei thei. Hmun tampi ah kawhhran ih thubuai an neih mi ah Bible sung thu vekih thlacamnak hmang in siseh, Thiang thlarau lamhruainak in siseh an relfel theu. (Danisfortin, "The Holy Spirit and the Church" in Angel Manuel Rodriguez, ed. Message, Mission and Unity of the Church. Pp. 321,322).

REL TLANG DING:

- (1) **Tlawngkai nithum ni ih thusuhnak Seventh-day Adventist-pawl ih thuzirhnak ah tuah tul rori a thupi zet ti ih kan timi kha a thupi zet cuang lo tiih an timi ah na hmuhdan nan zir canah rel tlang uh.**
- (2) **Jesui thihnak le thawsalnak kan zummi ah kawhhran dangpawl thawn kan pehzomdan ziangvek a si.**

THUTLANGKAWM: Lungual zetih an umnak a langtertubik cu Jesui duhdawt vekih pakhat le pakhat duhdawtnak kha a si. Adventist-pawl pumkhat ah in funkhwatu cu kan sual ngaidamnak le rundamnak kha bangrep in kan phuannak ah khan a si. Khrih sungah zumnak kan neih mi kha lungualnak nun in leitlun mi hmuah kan langter. Hi mi pakhat tuah dingih kawh kan si.

ZIRLAI 10

December 1-7

REMAWKLONAK LE RUALREMAWKNAK

SABAT TLAI LAM:

December 1

TUZARH SIAR DING: 2 Tim. 4:11; Filimon 1-25; 2 Kor. 10:12-15; Rom 5:8-11; Efe. 4:26; Matt. 18:15-17.

BIBLE CANG KEN: **"Ziangahtile ral kan si lai hmanah a Fapa thihnak ruangah Pathian thawn kan remaw sal a si ahcun remaw ih kan um hnu ahcun a nunnak in in rundam sinsin ding."** (Rom. 5:10, NKJV).

KAN hmuh vekin Pentecost hnun ahcun zumtupawl an pehzomnak kha nungcang le thinlung put bangaw in an lang. Thlung thar cabu ngannak san kha kawhhran hruaitu le member tinten kha vek thinlung put le sinak nei dingih sawmnak a si. Hivek umdan hi tui san kawhhran hrang khalah a sunglawi mi a si. Rualrem lonak thubuai ti felnak dingah Bible ih tuahdan kan hman ahcun Khrih sungah rualremnak a tunghmun ringring ding ih a thalam a pan thei ding.

Tui zarh kan zirlai hi rualpawlak kilhimnak hmuitin in kan zir ding. Minung rualpawlak in Khrih sungh rualremnak ah thathnemnak ziangso a thlenpi. Thiang Thlarau cangvaihnak in minung hnenah le Pathian hnenah naihaw sinsinak a thlenpi. Himi ah Pathian thawn kan pawlkomnak dawnkhamtu kha a thiat bal. Cule minung pakhat le pakhat rualpawlak dankhamtu kha a

thiatbal theh. Thuthangtha ih thiltitheinak huham sunglawi zetih a lang theinak dingah kawhhran in ziangvek thuthangtha saw a phuan ti si loin kawhhran in ziangvek in nun a nei timi kha a thupi sawn.

“Himi ihsin mi hmuahhmuah in ka dungthluntu nan sizia an lo thei ding (John 13:35). Himi duhdawtnak tel loin lungruallnak thu kan simni hi thulolak ah a cang ding.

**THAWHSAI NI
RUALPAWLAWK THARSUAHSALNAK**

Paul le Barnabas kha Jesui hrangah thuthangtha sim hna an tuan tlang. Asinan, mi tihrutpa John Mark rinsannak thuah lungruallonak an nei (Tirh. 15:36-39). Thuthangtha simih an fehnak hmunah tihnung zetmi din-hmun ah an thlengih John Mark cun Paul le Barnabas a tlansan ih a tlung (Tirh. 13:13).

Hivek ih mi phatsan a hman ruangah Paul cun a soisel ih tawkfang sung John Mark kha nasa zetin a hua. Barnabas cun a ton zomi a si ruangah a ngaithiam ih fehpi ringring a duh. Barnabas cun rawngbawlnak thu ah John Mark kha thin bang zetih umter a duh lo. Ziangahtile Jesui hrang hnatuantu dingah mi tangkai zet mi le hnataun tlak sinak dinhmun nei mi a si ti a thei. (E.G. White, The Acts of Apostles, Pp. 170).

Hi mipawl hi an zaten a tulnak hmunah Pathian in a hmang theu. Tirthlah cu zangfahnak thuthangtha simtu a si ih, beidong zetih a um mi thuthangtha simtu pa hnenaah zangfahnak a neih ve a tul. John Mark hi Barnabas ih zirhmi le lamhruaimi ih pitling a si (Tirh. 15:39). Asinan Paul ih thinlung kha mitih hmuh rori in a thlengaw ko.

Paul in Timote hnenah le Kolosa kawhhranpawl hnenah John Mark thawn an remawksalnak le thuthang-tha simtu a rinsannak thu cakuat ah ziangvek in a ngan (Kol. 4:10,11; 2 Tim. 4:11).

Paul le John Mark an remawksalnak Bible ah fiangten a lang lo ih, an ngan mi vial kha a famkim mi a si ko. John Mark kha tirthlahpawl ih rinsan mi pakhat ah a cang. Paul in Kolosa khua kawhhranpawl hnenah ka hnatuunpi John Mark tiah a sim. Cule Paul ih a can neta lamah Timote hnenah lo thei loih a cah mi cu rawngbawlnak ah ka hrangih mi tangkai zet “John Mark kha Rome ah ratpi tengteng aw” tiah a cah (2 Tim. 4:11). Paul ih rawngbawlnak kha himi thuthangtha simtu a sualnak a rak ngai thiam zo mi pai ruangah hlawhtlinnak a um. An karlak ih dawnkhamtu kha a hlon theh. Cule thuthangtha sim rawngbawlnak hmun khatah hna an tuan tlang thei. An karlak ah thuhla ziangvek rak um khal sehla John Mark parah Paul in amahte thiam coawk ih a rak umdan a thinlung putpawl tla a hlon theh.

Kan beidonnak a thlenpitupawl ngaidamnak ziangtin kan zir thei ding? A hlan vekih remawk salnak ngaingai um thei dingah sual ngaithiamnak tel loin ziangah saw a famkim thei lo.

**TLAWNGKAI NIKHAT
SAL SINAK IHSIN FA SINAK AH**

Paul kha Rome thawnginn sungih a um lai ah Kolosa khua ihsin Rome ah a tlansuaktu sal a hmin Onesimus timi kha a tong. Paul in Onesimus ih thu kha felten a thei. Filimon cakuat kha Paul in a tlan suakmi sal pa le a bawipa thawn remaww sal dingah zangfah dilnak le sawmnak cakuat a si.

Paul hnena pehtlaihnak thu: Pehtlaihnak cat kha thlarau lam thansonak dingah le kawhhran lungualnak dawnkhamtu a si tiah a thei. Filimon kha Kolosa khua ih kawhhran hruaitu a si. Amah kha Onesmus umnak le beunak a Sinan a parah a rak sia kha zet. Cumi in Khrihfapawl le kawhhranpawl in zumlotu vantlang nunah Khrih theihpitu sinak ah zoh mawi lonak a thlenter.

Filimon 1-25 siar aw. Hitawk ih remawk salnak thu ah a thupi zet mi dan ziangvek kan sar suak thei. Cumi danih a cafang kha hminsin aw. Vun zoh hruak cun sal tha lo kha Paul in kawkih nun simnak a tuah lo mi kha a mak tuk ti dingin a um. Asinan Paul ih khawkhan mi kha thathnemnak tampi a um sawn. Thuthangtha sunlawinak hloralter dingmi buainak kha a daioter (Gal. 3:28; Kol. 3:10,11). Tirhthlah in Onesimus kha Filimon hnena a kuatsal ih Jesuh ahcun ka fapa vekah ka ruatih sal vekin ka zoh lo. Filimon na hrang khalah Bawipa ah na duhdawt zetmi na unau vek a si (Filimon 16).

Paul in a tlan hlo mi salpa hrangah cun a hmailam ruahsan ding a nei lo theu a thei. Ziang tik can khalah kaih theih ringring a si. A dinhmun a sia zetih beunak hmun a nei lo, neih mi tla zianghman a nei lo. Onesimus ih a tui a dinhmun cu a hlan hnakin a tha sawn mi dinhmun sinak Filimon ih unau pa le thinlung takte ih hnatuantu ah a cang. A ei le in ding, umnak ding inn le hnatuuan dingmi ah Filimon ih thuneihnak tangah himte ih um dingin a tuahsak. Remaw lo mi remawk sal tikah nundan danglamnak a tuahsak. Amah kha rinsan tlak a naupa ah a cangih Paul ih thuthangtha sim rawngbawlnak ah bawmtu a si (Kol. 4:9). An pahnih karlak ah remawk theinak dingah tangka thu ah a buai pang ding ti a phang ih, amai neih mi thawn Jesuh zumtu mi pahnih remaw salnak dingah tha tho zetin a bawm ih, thubuai a cingfel.

Hitawk thuthangtha ih dan hrampi ah in luhpi ih retheih harsatnak le zokzetenak ruangah midang thawn pehtlaihnak a cat zo mi kha remsal dingah lo bawm thei dingin khui mi bik ha na hman ding? Himi dan in tual sung na kawhhran lungualnak siat lo dingin ziangvek in na kilhim ding?

TLAWNGKAI NIHNIH

LUNGRUALNAK DING HRANGAH THLARAU LAKSAWNG

December 4

Zirlai hmaisa ah kan hmuh zo mi vekin Korin kawhhranpawl in buainak nasa zet an nei. Kawhhran lungual ngaingai theinak dingah remaw lo mi rualremaw sal theinak dingah (1 Kor. 3:5-11; 1 Kor. 12:1-11; 2 Kor. 10:12-15) sungah Paul in a tlangpi in a fehpidan ziangso a ngan?

Himi cangpawl ah tirhthlah in kawhhran lungualnak dingah a thupi zetmi danpawl a tlangpi in a ngan. Pathian ram dinnak dingah bulpak cio ih tanrualnak kha Khrih in a kawhhran sungah hnatuandan a phunphun in famkim zetih an tuannak kha a langter.

Pathian in hnatuuan bawmaw ton dingah in ko ih elawk (erawk) dingah in ko lo. Zumtu hmuahmuah hnena Khrih taksa pumih hnatuuan dingah le zatlangnun cawmtu si dingah Pathian in laksawng a pek (1 Kor. 12:11). Pathian ih in pekmi laksawng hmuahmuah kha mai taksa nun nawmnak dingah pek mi a si lo. Thuthangtha hnatuannak dingah thlarau ih pekmi a si.

Midang thawn tahthimnak pawl kha aat hna a si ih, cupawl in beidonnak (or) porhawknak ah in thlen. Kanmah hnakin midangpawl kha ropi tukah kan ruat ahcun anmah thawn kan thimaw can sung hmuahmuah ah beidongnak kan nei ding. Cule rawngbawlnak ah kan

beidong ol ding. Khat lamah kan hnatuan mi kha midang hnaki sang le hlawhtling ah kan ruatawk ahcun porhawknak kan nei ding. Cumi cu a netnak ah Khrihfa tampipawl ih ngainat mi le beunak kan si ding.

Khavek thinlung put le nungcangpawl cu khawtlang hrang le Khrihfa hrangah santlai lo le thathnemnak nei lo kan si ding. Khrih hna kan tuannak ah mi thinlung neh ih midang thunun thei si dingah thuneihnak in pek. Cumi ihsin Khrih hrangih theihpitu kan sinak ah diriam zetih lungawi mi kan si ding. Kan hnatuan midang ih in bawm ruangah hlawhtlinnak a um tikah Khrih kawhhran in Khrih lal ram hrangih mi ropi ah in tuah ding.

Rawngbawlnak ah midang ih an ngah mi laksawng ruangah na thinlung in dawtnak a lo neither in na ruat maw? Kha mi kha a har tukmi cu a si lem lo. Laksawng na ngah mi midang ngah mi thawn na thim tikah lunghmuinak (uarawknak) na nei theu maw? Paul in a tluse mi milai sinak kha ziangtik lai can khalah a um ringring tiah a ruat. Khrih ah pumkhat kan sinak tunghmun ringring theinak dingah a tlusia mi kan sinak thu ngaihsak loten a poimawh zet mi mai zawnruah lonak thinlung put le nungcang ziangtin saw kan zir thei ding?

TLAWNGKAI NITHUM SUAL THLAHNAK

Sual thlahnak (or) ngaihthiamnak timi ziang a si? Tuksuzza in kan parah sualnak tuahtupawl kan ngaithiam tikah an nungcang felnak dingah thathnemnak a um maw? Kan parah sualnak a tuahtu ih sirawknak parah kan ngaithiamnak a thumaw maw? Ka ngaithiamnak ngah tlak lomi in ka thin na dingah in tuah sehla ziangtin saw a si ding?

A tanglam ih Bible cangpawl in sual ngaithiamnak umdan theithiam dingah ziangvek in in bawm? Rom 5:8-11; Luke 23:31-34; 2 Kor. 5:20,21; Efe. 4:26.

Bawi Khrih kha amah thawn rualrem sal theinak dingah lam hmuhsaktu a si. Himi thil a umnak hi "Pathian thatnak in sual sirnak ah a lo hruai (Rom 2:4 NKJV). Misual kan si laiah Bawi Khrih in Pathian thawn remnak in tuahsak. Kan sual sirnak le phuanawknak in remnak in tuahsak lo. Kan tuah mi thil co hlan tlakih a umtertu cu Cross parih Khrih a thihnak kha a si. Kan sualnak kan phuang lo ahcun sual ngaihthiam lungawinak kan ngah lo ding timi hi thudik a si. Cutiuh kan ti tikah Pathian thinlung sungah sual ngaithiamnak a umtertu kha sual sirnak a si ti duhnak a si lo. Pathian thinlung sungah cat loin sual ngaithiamnak a um. Cohlan tlak kan si theinak dingah kan sual sirnak in a tuah thei lo (I John 1:9). Sual sirnak hi a thupi zet nan, cumi in kan parah Pathian thinlung putdan a danglam dingin a tuah thei loih Pathian parih kan thinlung putdan ah danglamnak a tuah sAWN. Thiang Thlarau hnenah pumpeknak kan nei ih a thilttheinak in kan nun a luah khat tikah sual sir dingah kan nun in hruai. Cule sual kan hoisin ih kan nunah danglamnak a um.

Kan thlarau nun lam a tluan theinak dingah sual ngaihthiamnak hi a thupi zet. Kan parih thilti sualtu kha ngaithiamnak cotlak lo an si khalle kan ngaithiam lo ahcun a tuartu ding cu kanmah sAWN kan si. Na parah sual an tuah ih thin lo nattertupawl na ngaidam lo ahcun na thin natter sinsin na duh lai tinak a si. Kawhhran sungah khavek thin natnak kha ruahdan dang, hmuhdan dang kan neih tikah rem lonak a um ruangah a suak theu. Kawhhran member lakah rem theih lomi thin natnak a um tikah Khrih ih taksa ruangpi kawhhran thennak a um ih, Khrih taksa ah natnak a thlen.

Sual ngaihthiam timi hi mawh kan puhnak luatter mi a si. Cumi a hung suahnak cu Khrih in kan sual in ngaidamnak ruangah a si. A sual kan ngaithiam mi kha a nuncan dang tla kha mi in a rem theh tinak a si lo. Khrih in a parih kan sualnak in ngaithiam vekin kan parah sualnak a tuahtu kha kan ngaithiam ve ding. Ngaidam ih kan um vekin midang kan ngaidam ve ding. Midang duhdawt thei dingah duhdawt mi kan si zo. Sual ngaithiamnak hi duhhrilnak ih tuah mi a si. Midang nunzia le lung put ngaihsak loin ngaithiam dingah duh kan hril thei. Cucu Jesui neih mi a dikmi thinlung put a si.

Khrih ih a neih mi ngaihdam nun in kan nun a luah khatah cun midang mawhnak ngaidam dingah ziangvek in in bawm thei? Khrihfa nunah himi ngaidamnak hi ziangah a poimawh.

**TLAWNGKAI NILI
LUNGRUALNAK LE DINTHARSALNAK**

December 6

Matthai 18:15-17 siar aw. Kawhhran sungih mi pakhat in na thin lo natter tikah cuih remawk lonak tuahtha dingah Jesui in pekmi tuahdan phun thum in ziangtin so in bawm thei? A tu san than kan dinhmun ah himi thupawl ziangtin kan hmang thei ding?

Matthai 18 sungah Jesui nun simnak thu ih a duhmi kha kawhhran sung pakhat le pakhat rem lonak um tikah kilkhawiawkdan a si. A tumtah mi cu remawlotupawl in an thubuai kha lung thoten an relfel ding tinak a si. Himi thu Jesuh in a sim tikah “na unau in na parah sualnak a tuah ahcun va feh awla amah le nangmah lawngih theihah a sualnak cu va sim aw” (Matt. 18:15 NKJV). Mi tampi thawn rel fel ahcun thubuai a karh sinsin

thei ih, a porhaw sinsin ding. Cule zumtu midangpawl hnenah thu a darh theh ding. Minung in tan lam nei lo kan um lo ruangah thubuai a bese deuhdeuh ding. Khrihfa dan in remnak tuah tikah duhdawtnak nei Khrihfa thinlung thawn le theihthiamnak thawn a cang thei bikin remnak tuah ding a si. An remawk lonak relfel rori tumah cun an hnenah thiang thlarau a cangvaih theinak dingah pumap thlacamnak thawn tuah a tul.

A cancan ahcun bulpak rem lonak a um mi mahte ih relfel tikah hlawhtlin can a um theu. Jesuh in khavek ah mi pahnih (or) pathum sawm dingah a fial. Himi hi a pahnihnak remnak tuahdan a si. A tumtah mi cu remaw lotupawl an remawknak a si. Thenawter sinsin ih dawi hlonak ding a si lo. Hivek remnak tuahtu in khatlam mawhsiatnak nei ding a si lo. Khrihfa thinlung thawn duhdawtnak le zawnruahnak nei ih thlacamnak thawn remaw sal dingah ruahnak pektu kan si ding.

Thubuai rem tum tikah tuahdan kel a si ko ti in in tuah hlah. Jesui in zirh mi cu hivek thubuai hi kawhhran ih mawhphurh lak dingah in fial. Sabat colh ni zingah khawmnak thulh ding thu a sim lo. Pumpak remlonak thu a simmi a si. Remnak tuah mi ah a hmaisa pahnih ah nan hlawhtling lo ahcun Church board ko awla an thuhla rem relnak khua khang uh. Jesui tumtah mi remnak tuahdan phunkhat a um sal cu thiam coter mi le mawhpuh mi neiih rorel lo ding timi a si.

Thinlung tha lo nei dingah an thin hengter hlah. Na tongmi theitupawl ih thinlung ah hngilh thei lo dingih a um thei mi tongkam tha lo hmang hlah. An thin na in lo huat ringring dingin um hlah. Na unau pai hnenah feh awla an thuhla kha zangfahnak le zawnruahnak thawn relpi aw. E.G. White, Gospel worker. Pp. 499.

TLAWNGKAI NINGA**December 7**

RUAH BET DING: Rawngbawltu cun Khrih ah a thumaw dingih an thlarau hrang a tuan ding. Mai zawnruahnak a um lo, entgatinak a um lo ding. Uarawknak a um lo tikah anmah ah pumkhat sinak nun a um dingih nun thiaghlim an nei ding. Cu tikah an duhdawtnak kha tep thei le hmuh thei in a um dingih an parah zangfahnak thiang thlarau ruah kha a sur rori ding. Pathian ih thukam zo mi veikin pakhat hman a pelh lo ding. E.G. White, Selected Messages Book (1). Pp. 175.

Bawipa ih ni tihnung zet mi ah kan ding suak theinak dingah Bawi Khrih kha kan beunak a si dingih kan kulh a si ding. Cui canah nahnak le uarawknak a hlo theh ding. A thiaghlim lo mi ah anmai hnen ihsin a hlo dingih a umsal nawn lo ding. Kan Bawipai lamah kan um dingih a hnenah kanapaw pumhlum ding. E.G. White, Last Day Events. Pp. 190.

REL TLANG DING

- (1) Kolose 3:12-17 siar aw. Kolosa Khrihfa-pawl hnenah Paul in Khrihfa nundan dik nei dingah forhnak thu a sim mipawl rel tleng uh. Himi Khrihfa nundan dik hi ziangah saw buainak hmuahhmuah rel felnak hrampi a si thei. Jesuh in Matthai 18:15-18 ah Jesui thubuai tifeldan in pekmi in ziangvek in lam in hruai.
- (2) Kolosa 3:12-17 ih zirhnak kan hmuahmi zoh salaw. Kawhhran lungualnak dingah hipawl hi ziangah a poimawh.
- (3) Seventh-day Adventist zate huap ih kan zoh ahcun leitlun hmuahhmuah ah pumkhat ih an um theinak

dingah a thupi bikih an kaih mi ziang a si? Cumi cu kan zirhawknak le kan doctrine thu fehpidan a si maw (or) Pathian in phuang uh tiah thu in pek ruangah saw thuthangtha hi kan sim. Kan duuhannak, a thupi lo a tuktak thu elawknak, mai tanghma sialnak, thuneih duhnak le thildang tampi tiangin kawhhran sungah pumpak kan rualpawlak ah thubuai a um maw? Kawhhran lungual ih um kan hmuh hlanah Thiang Thlarau lam hruainak in na thinlung sung ihsin thokin a lenglam mi na nun thleng rori dingah thlacamnak ziangah a poimawh.

THUTLANGKAWM: Jesui thuthangtha hi tidam hnatuannak le nun thlengnak thu a si. Himi nun a thleng tikah midang thawn kan rualpawlak ah hnaihnoknak a um nawn lo ding. Leitlun sualnak ram kan um khalah mi tha si theinak dingah le nelaw zetin kan um theinak dingah zohthim ding tlak le hmual nei zet nundanpawl Bible ah kan hmu.

ZIRLAI 11**December 8-14****PATHIAN BIAKNAK AH PUMKHAT SINAK****SABAT TLAI LAM:****December 8**

TUZARH SIAR DING: Thup. 4:8,11; Matt. 4:8,9; Dan. 3:8-18; Thup. 14:9; Thup. 14:6,7; Tirh. 4: 23-31.

BIBLE CANG KEN: “**Van laifang ah a zam mi a dang vancung mi ka hmu. Amah cu leilung tlunih um, miphun kip, hrin kip, tong kip le ram kip le mikip hnenah kumkhua a hmunmi thuthangtha thantu a si. Aw ring zetin Pathian tihzah uhla, a hnenah sunlawinak pe uh. Ziangahtile a thuthen can a thleng a si. Cun van le lei, tifinriat le cirhtipawl a tuahtu cu biak uh tiin a au**” (Thup. 14:6,7 NKJV).

PENTECOST hnu can rei lote sung Khrihfa hmaisapawl in an can tam sawn kha Pathian biakkhawmnak ah an hmang. Tirhthlahpawl in thuzirhnak, pawlkomawknak le thlacamnak le sang phelawknak in can an hmangih hnget zetin an um (Tirh. 2:42 NKJV). Jesuh kha Messiah a si tiih an theihnak ihsin lungawinak an ngah ih thlung hlun ih simsung thu a thleng famkimnak an theihnak ruangah Pathian hnenah lungawinak thilpek duhnak, lungawi thusim duhnak in an nun an khat. A sunglawi zetmi thutak theih hi ziangtluk in so cotha an ngah. Jesui nunnak, thihnak le thawhsalnak ih a phuanawknak ruangah le anmai nunah Pathian cangvaihnak ruangih thil

thleng a um mipawl ah lungawi thusimnak nei thei dingah Khrihfa hmaisapawl in hmun khatah an um tlangih pawlkomawknak Bible zir tlangin le thlacamnak ih can hman hi a tul rori tiah an ruat.

Khrih ih kawhhran thusim fiangnak tuah ahcun zatlang nunih Pathian biakkhawmnak hmun, “Thlarau lamih innpi, puithiam thianghlim,” a si. Jesui zarah Pathian santlak thlarau lam thawinak hlantu dingah Pathian ih kawhmi an si (1 Pet. 2:5 NKJV). Zatlang pumkhawmnak nei in Pathian hnenih lungawi thusimnak kan tuah mi minung thinlung ruahnak kha Pathian nunzia le ruahnak ah a thlenpter ih rawngbawlnak ding hrangah a rem thatheh.

Tuzarh kan zirlai hi Pathian biakih pumkhawmnak le Jesui sungah zumnak neitupawl lungruanlak kilhimdan dingpawl a sullam simfian tumnak a si ding?

**THAWHSAL NI
IN RUNTU LE IN SERSIAMTU BIAKNAK**

December 9

Khawmnak thu rel ahcun khawm tuahdan ziangtin so tuah a si ih ziangpawl so an tel ti mipawl in theihter. Khawmnak timi ih a sullam ngaingai ziang a si? Pathian biak timi ih a sullam ziangso a si? Ziang ruangah kan tuah? David in Saam 29:2 ah a langter mi cu “Bawipai hnenah a hmin sunlawinak pe uh, thianghlimnak ih mawinak thawn Bawipa cu bia uh” (Saam 29:2 NKJV). Biak timi ih a sullam theithiam dingah Saam in in sim. Bawipa ih a ngahtlak mi sunlawinak le upatnak peknak hi biak kan ti.

Thuphuan 4 le 5 ah Jesui van a kai ah khan sunglawi zetih hnatuuan a thoknak a lang. Van ih a um mipawl in Pathian ih tuufa Jesuh le Pathian kha ziang thuhla ah so an biak? (Thup. 4:8,11; Thup. 5:9,10,12,13).

Pathian Bawi tohkham umnak van hmun thianghlim sungah Jesuh kha leitlun rundamtu Pathian ih tuufa tiah mak tinak thinlung thawn upat tihzahnak an pekih an biaknak a lang. Thil sersiamnak thuhla ah upat sunloihnak le a thil tuahmi ruangah a hnenih lungawi thu simnak tuah tikah Pathian biak timi a um. Pathian ih sersiamnak parah le a tuah mi rundamnak ruangah lungawinak neitupawl in an sunloih ih tihzah upatnak an pekmi kha biak timi a si. Can neta a thlen tik khalah rundam mi ah a teltupawl in a tuah mi rundamnak ruangah Pathian kha sunloih upat peknak phun a si thotho ding. "Bawipa Pathian ziangkim ti thein a thil tuah mipawl cu an ropi in an maksak, nang mi thianghlimpawl ih siangpahrang na lamzinpawl cu an felih an dik. Maw Bawipa, zoso lo tihzah loin an um dingih na hmin an sunloih lo ding. Ziangahtile nangmah lawng na thianghlim: na thuthen-nakpawl langter an si ruangah miphun hmuah-hmuah na hmaiah an ra dingih an lo be ding a si (Thup. 15:3,4 NKJV).

Curuangah biak timi hi a maksak mi Pathian ih thil tuahmi (1) A kut suak kan si ruangah, (2) in rundam ruangah a hnenah kan zumnak kan rinsannak kan langternak a si. Pathian kan biak tikah tihzah upatnak kan pek a ropi thei bikih sunloih peknak, thangthatnak, kan duhdawtnak le a thu ah zawnlung ih kan umnak pek tlak a si tiah kan zum ruangah a si. Bible sungah kan theihthiam dingin a phuangaw ih in sersiamtu le in rundamtu Pathian a si tiah kan thei. Khrihfapawl ih Pathian thu theihdan ahcun Jesui rawngbawlnak le a phuanawknak ah an thei (John 14:8-14). Jesuh kha rundamtu le tlentu Bawi si dingah thawiawknak ah a pekaw ih a thihnak le a thawhsalnak-pawl kha Khrihfapawl in Jesuh an biaknak san a si.

Khrihfapawl ih Pathian biak fehpidan cu: Mak tiih upat peknak le a hnenah lungawi thu sim duhnak pomdan ihsin Pathian be mi kan si.

In sersiamtu le runtu Bawi sinak in kan hnenah Bawi Khrih ih in pek mi, sual ngaithiamnak ih in zuahnak thu, amai lungtho teih kan aiawh in a thi ih, a nunnak in peknak thupawl ruat aw. Himi thutak hi Pathian kan biaknak hrampi ah ziangah so a cang thei?

**TLAWNGKAI NIKHAT
A DIK LOMI BIAKNAK**

December 10

Matthai 4:8,9 siar aw. Jesuh in ramthing ah tuk-forhnak a tonmi a pathumnak kha ziangso a si?

Setan in leilungpi uktu ka si tiah hngal zet le porhaw zetin a phuangaw. Leilungpi sersiamtu, lennak le sunlawinak hmuahmuah neitu a si ruangah leitlun mi hmuahmuah ih tihzah le upat mi siah a phuangaw. Sersiamtu Pathian Jesui pa a hmuhsuamnak a si. Biak timi sullam kha lei le van neitu ngaingai hnenah tihzah upatnak ih pek ding mi kha setan in fel zetih a theihnak a langter.

Dan 3 sungah Hebru tlangval pathum ih tonnun (A hleice in cang 8-18) le can cemnak ih Thup. 13:4 le Thup. 14:9-11 pawl thawn zohthim aw. Can cemnak ah a tumtah mi ziangso a si? Himi thil tleng pahnih ih a tumtah mi thu ziangso a si?

Kaina le Abel ihsin thokin Babulon ih Hebru tlangval pathum ihsin ni neta ih a um dingmi sahrang hminsinnak thu ih tleng mipawl hmangin Setan in biaknak dik lomi din hngetnak a hawl. Setan in Pathian biakdan dik ihsin lam hlapi ah minungpawl hruaihlo in amah biak dingah thei har zetmi thil tuahdan a hmang. Cuih tlunah sualih a

tluk hlan ihsin Pathan thawn bangaw dingah a duh (Isai. 14:14). Hebru tlangvalpawl in milem an biak duh lo ruangah thihsdan pek ih hronak an ton mi le ni neta ah Pathian mi rinumpawl in milem an biak lo ruangih that dingih an hronak ah pehparawknak zianghman a um lo. A dik mi Pathian be dingih kawh kan si laiah ziangah so milem kan biak ding.

Dura phairawn ah Hebru tlangvalpawl ih ton nun ihsin kan zirlai ih a thupitnak kan zir ding. Pathian minungpawl in an hmajih an ton dingmi ah tluk loin rinum teih an um theinak dingah a si.

Pathian minungpawl hmaiah harnak a tleng mi kha zumnak ah tihrut ih an um lonak dingah a si. Biak ding mi cu amah lawng a si kha Pathian a falepawl theihter a duh. Kumkhua hmunmi Pathian thu hnong mi le sualnak ih uk zo mipawl in Pathian hnenah rinumnak an neih theinak dingah a si. Thi dingih temtawn an si hnu khalah zawnlung ih an um theinak dingah a si. E.G. White, Prophets and Kings. Pp. 512,513.

Biaktlak Pathian lawng kan biak laiah Pathian dang be dingin tukforhnak kan tong thei ko. Cupawl ih an danglamnak ziangpawl so an si? Kan ruahnak hnakin ziangtluk in so biaknak dik lo theih a har. Biaknak lamah tukforhnak a tu ih kan ton thei mi ziangpawl so an si?

**TLAWNGKAI NIHNIH
VANCUNGMI PAKHATNAK IH THUCAH**

Seventh-day Adventist-pawl in Jesui ratsal hlanih an rawngbawlnak ah a thupi bik thucah an langter mi cu vancungmi pathum thucah a si (Thup. 14:6-12; Thup. 14:14-20). Himi thucah hi leitlun ah a thupibik ih aupi dingmi a si.

Thuphuan 14:6,7 siar aw. Vancung mi pakhatnak ih thucah ziangso a si? Pathian ih thuhla ziangso a sim? Pathian biaknak thucah ziangah so a langter?

Vancungmi pathum thucah ah a pakhatnak vancungmi in leitlun mi hmuahmuah hrangah thucah a phuang. Himi hi Matt. 24:14 ah Jesui a simsung mi tleng famkimtertu a si. Vancungmi pathum thucah kha Seventh-day Adventist-pawl in an rawngbawlnak ah zamrang bikih an tuah dingmi le a thupibik mi a si tiah an ruat. A pakhatnak vancungmi in Pathian kha a thupibik ah a ret. Ziangah tile "Thuthennak can a tleng zo" (Thup. 14:7 NKJV). Jesui ratsalnak kha thuthennak hrangah thil a danglamtertu a si.

Vancungmi in "Pathian kha tih uh tiah a sim" (Thup. 14:7). Thinlung takte ih Pathian ruat lotupawl hrangah an thinlung sungah le an thil tuahmi le an ziaza ah Pathian tihzahnak a takih langter dingih kawhnak a si. Pathian an thlir tikah a thukam mi a tleng famkim ti an hmuh theinak a si. Pathian kilvennak an ngah mipawl an thei ih, lungawinak in Pathian tihzahnak an peknak a si.

Van le lei, tifinriat le cirhtipawl tuahtu biak uh (Thup. 14:7 NKJV). Himi tongkam hmanmi hi sabat ni zarth ulhnak thupek hngilh lo dingin le sersiamnak hngilh lo dingah a si (Suah. 28:8-11). Pathian in sersiam theinak huham a neih mi hngilh lonak ah Sabat ni zarth ulh ding thu in zirh. Tihzah upatnak thawn amah kan biak ding a si.

Biaknak in a suahpi mi can netnak ih doawknak mak hrangah himi hi hminsintlak zet mi thil a si. Minungpawl in Pathian hnenah rinumnak thu an tiam mi langtertu a si. Sersiamtu Pathian kha leitlun mi hmuahmuah in biak dingah kawhnak a si.

Doawknak makah a neta bik le a thupibik thu suah dingmi cu Pathian biaknak thu a si ding. Thuphuan ih a langter mi cu biaknak hnisksaknak a si lo. Kan biak mi zo a

si ti a langter. Pathian dik tihzah upatnak thawn a betupawl le (Thup. 11:1,18; Thup. 14:7) thutak dodalin rulhreng le sahrang a betupawl ti nak a si (Thup. 13:4-8; Thup. 14:9-11). Can netanak ah leitlun mi hmuahmuah kha mibur pahnih ah kan thenaw ding.

A netabik doawknak ah himi thu hi a thupi bik mi thubuai a si ding. Pathian in leitlun khuaza kipah Pathian dik sersiamtu be dingih sawmnanak a si. Curuangah thuthangtha simtupawl a thlahnak hi mangbang ding a um lo (Ranko Stefanovic, *Revelation of Jesus Christ : Commentary on the Book of Revelation*: Berrien Springs, Mich: Andrews University Press, 2002) pp. 444,445.

TLAWNGKAI NITHUM **PAWLKOMAWKNAK LE BIBLE ZIRNAK** **December 12**

Tirhthlah 2:42 siar aw. Khrihfa hmaisapawl ih khawmnak an tuah tikah ziangpawl so a tel?

Tirhthlahpawl ih zirhnak ah le pawlkomawknak ah khoh zetin an um vivo (Tirh. 2:42 NKJV). Kawhhran hmaisapawl in biakinn ah khawmnak an tuah theu ih tirhthlahpawl in Pathian thu an zirh. Jesuh Messiah ih a simmi thu kha a sullam ziangso a si tiah kawhhran ding hmaisapawl cun taima zetin an zir. Pawlkomawknak an tuahnak ah Pathian hnenih an don mi an neih thilpawl an tawmaw ih thlarau lamah Pathian thawn an lentlangnak ah pakhat le pakhat an forhaw ringring. An thinlung ah Bible thutak an kaihnget ih, cumi cu leitlun hmuntin ah an simmi thucah hrampi ah a cang.

Kan zum vek a zum lotupawl thawn Pathian thu
zir tlang tikah a tangih Bible cangpawl in ziangso a sim?

Tirhthlah 17:10,11 _____
2 Timote 3:14-17

Thuthangtha ih thutak hmuitin ih sim a si tikah rinum ih nun duhnak a neither. Cule thinlung takten Bible in ziang a sim timi hawl duhnak an nei. Lei can netnak lam thil umdan kan zoh ahcun Berean khua Khrihfapawl veikin an phuan mi thu kha thutak a si maw si lo thei duhin Bible kha mi hmuahhmuah in zingzoi hai sehla tuini ah mi tampipawl in Pathian thukham rinum zetih pomtu an tam zet ding nan, a tu ahcun malte lawngin an pom (E.G. White, The Acts of Apostles, 232).

Kan phuan mi thutak ruangah a komkhawmaw mi kan si ih, cuih thutak cu Pathian thu, Bible sungah kan hmu. Himi hi Pathian kawhhran dik hlanlai Khrihfapawl ih umdan a si. Himi thu hi tui san khalah a dik thotho. Bible ih Pathian thu zirhnak in leitlun ah vancungmi pathum thucuh phuang dingin sawmnak ngahtupawl lungrualte ih an um theinak le a nung Pathian biaknak a umtertu hrampi a si. Pathian innsang sung telah le Biakkhawnak ih kan um tlang tikah Bible ih um Pathian thu in Jesui ratsalnak ding hrangah thuthangtha phuang dingah timtuahawknak nun nei dingin kan nun in hruaj.

Bible sungah ziang tlukih khoh in so a um?
Khuitawk khal thleng awla thihnak ton khalih hnin lotu
Hebru tlangvalpawl vekin kha mi thu ah na hngetkhoh
ngaingai maw?

TLAWNGKAI NILI SANG PHELAWSNAK LE THLACAMNAK

December 13

Ding hmaisa kawhhranpawl in ziang thil an ton
hmanah Jesuh an zumnak le hmuntin ih thuthangtha

**phuan ding rinsan zetih pekmi ah lungualten an um.
Kha mi kha Peter in a tlaitluan thutak (Present truth)
tiah (2 Pet. 1:12) ah a ti. Tam zetin hmuntin ah an karh
nan thutak ah pumkhat ten an um.**

Sang phelawknak le thlacannak ah ... khoh zetin an um (Tirh. 2:42). Himi sang phelawknak hi an pawlkomawknak ih rawl ei tlangnak ah sang an phelawk mi a rel duhnak a si. A cancan ah kha vekih rawl an ei tlang tikah Jesui ratsalnak an hngakhlap vekin a thihnak le thawsalnak hngilh lonak dingah an tuah can tla a um. Kha ti vekih rawl an eitlang canah Jesui rawngbawlnak le a nunnak le amah an ngainat thu rel phahin sunglawi zetin can an hmang theu. Cuih rawl an zemawk canah canserh tawiten an hmang theu. Cule lungual in biakinn sungah nitin ten an um theu ih, innkhat hnu innkhat sang phelaw in le lungawinak thawn lungual ten rawl an ei tlang theu. Pathian an thangthat ih mi hmuahmuah hnenih mithmai tha an ngah. Cule Bawipa in kawhhran ah rundam mipawl nitin ten a pek bet vivo (Tirh. 2:46,47 NKJV). Himi san laiah Jesuh ah lungual ih an um theinak dingah pawlkomawknak in nasa zetin a bawm timi hmuh thei in a um.

**Tirhthlah cabu sungah hlanlai Khrihfapawl ih
thla an cam tlangnak ihsin zothim ding ziangso kan
neih? Ziang hrangah thla an cam a si ding.**

Tirhthlah 1:14 _____

Tirhthlah 4:23-31 _____

Tirhthlah 12:12 _____

Hlanlai kawhhranpawl in Pathian thawn hmaiton ih pehzomawknak co tha an ngah mi kha an thinlung in an hlam ringring. Hmunkhat ah Pathian biakkhawnnak an neih tinten ei ding a petu um thei ringring dingin Pathian

hnenah thla an cam. Khrihfapawl in thlacam ih an umtlangnak a thupitnak kha Paul in Timote cakuat hmaisa ah a langter (1 Tim. 2:1). Efesa cakuat sung khalah thlacannak a poimawhnak thu a tarlang. "Thlacannak le dilnak hmuahmuah thawn thinlung takten thlacam ringring uh, Mi thianghlimpawl zate hrangah thahnem ngainak le dilsaknak hmuahmuah thawn thla cam uh, ka hrang khal in dilsak ve uh" (Efe. 6:18,19 NKJV).

**Pakhat le pakhat hrang thla kan camsakawk
tikah lungualnak a khoh sinsin mi ziangpawl ah so kan
ngah thei? Kawhhran lungualnak ah thlacannak in
ziangvek in so in bawm thei?**

TLAWNGKAI NINGA

December 14

RUAH BET DING: Pathian kha ziangkim sersiamtu le kanmah in sersiamtu a si. Sersiamnak hngilh lonak ah sunglawi zetin sabat kan ulhnak hi ziangruangah Pathian kan biak timi thu a rak suahnak a si. Pathian kan biaknak thuhla a suahnak hrampi hi sabat a si. Kan lung hmui zetmi zohman ih in zirh lo mi thutak kha himi in in zirh. Seventh-day Adventist pawl lawng a si lo, amah a betu hmuahmuah hrang khalah Pathian biaknak hrampi a si. Sersiamtu biaknak le sersiam mi biaknak karlak ah himi in danglumnak a neither.

Himi thu sunglawi hi theih hngilh mi le ngaihsak lomi a si dah lo ding (J.N. Andrews History of the Sabbath, Chapter 27). Eden ah Pathian in a zirh hlanah milai thinlung sungah ulh ding le thutak a sinak a um lo. Pathian hi in sersiamtu a si tiah pom in a tlaitluan ih kan biak dingmi le cuih biaknak hminsinnak dingah sabat hi a um ringring. Leitlun mi hmuahmuah in Sabat ni ul in um hai sehla sersiamtu kha tihzah tlak le biak tlak a sinak in an

thinlung a luah khat dingih milem biak, khawse biak, biaknak nei loih um an um lo ding. Sabat ni zarth ulh hi Pathian hnenah rinumnak hminsinnak a si. Ziangahtile amah in van le lei tifinriat le tiva le tiput sersiamtu a si. Himi thuthawn pehaw in Pathian be dingih thucah ah thukham sungih a palinak sabat kha ulh rori dingah sawmnak a si (E.G. White, The Great Controversy. Pp. 437,438).

REL TLANG DING

- (1) **Hlanlai ihsin Bible pomdan (1) Pathian biaknak, (2) sersiamnak le rundamnakpawl hi hrihrual vekih ngerhaw mi an si. A dik lo mi Pathian biakdan um lo dingah sabat kha a tuah. Thuphuau 14:6,7 ih can netnak thucah simsung thuah sabat hi ziangvek dinhmun ah a um. Vancung mi pakhatnak ih thucah ah ziangah so sabat thu a sawhter.**
- (2) **Khawm canih tuah ding le tuah lo dingmi kan rel can a um theu. Cuih thil an tha theh maw? Biakkhawmnak timi ngaingai ziangso a si? Tualsung kawhhran in biakkhawmnak nan tuahdan ziangtluk ih san nei so a si?**
- (3) **Khrihfa hrekkhat ih zatlang nunah biakkhawmnak hi theih lo karah hngilh mi le hnawl mi ah a cang. Cuih thil cu Adventist tla a suan ve. Himi thil umdan tualsung na kawhhran ih ruahdan ziangvek so an neih?**

THUTLANGKAWM: Pathian biakkhawm timi hi Khrih zumtupawl in Pathian ih pekmi laksawng rundamnak
F-9

ruangah lungawi thu simnak thil tuahdan a si. Khrihfa zatlang nun pawlkomnak ah lungrualnak nun nei dingin himi hi a thupi zet. Pathian thutak thei duhiah zingzoinak le thlacamnak a um lo ahcun Khrih sungih pumkhat sinak nun kan neih miah hlawhtlinnak a um lo ding.

ZIRLAI 12**December 15-21****KAWHHRAN HOHANAK LE PUMKHAT SINAK****SABAT TLAI LAM:****December 15**

TUZARH SIAR DING: Efe. 5:23-27; Matt. 20:25-28; Titas 1:9; Matt. 16:19; Gal. 6:1,2; Matt. 28:18-20.

BIBLE CANG KEN: “**Nan lakah cun cuti vek si hlah seh, zokhal nan lakah ropit a duhtu cun nanmah lo riantu si sawn seh. Zokhal nan lakih lubik si a duhtu cun nan siahhlawh ah cang seh**” (Matt. 20:26,27 NKJV).

SEVENTH-DAY ADVENTIST kan si ih Protestant Khrihfa zumnak neitu Jesuh in minung hrangih a tuahsak theh mi rundamnak kha zumnak ruangah kan ngah timi zumnak neitu kan si. Jesui in tuahsak mi ngah theinak dingah kawhhran le puithiawpawl ih in tuahsak mi kan tul lo. Khrih hnen ihsin kan ngah mi a si ih, van hmun thianghlim ah kan hrang puithiam sang hna a tuan mi khi an ruah bik mi a si.

Pathian ih sersiam mipawl kan hrangah kawhhran din a si. Rundamnak hrangah a si lo leitlun ah rundamnak thuthangtha phuannak bawmtu dingah a si. Kawhhran hi leitlun ah thuthangtha thantu dingah Jesui dinmi a si. Kawhhran hnatiuan thuthangtha rawngbawl tuah suak theinak dingah dinmi thucah simawknak ah a hlawhtling thei lo ding. Cule Kawhhran hruaitupawl an thupi zet, ziangahtile Jesui nun zia le thinlung put cawngih lungualnak kilhimitu an si.

Tuzarh kan zir dingmi cu kawhhran dinnak hi rawngbawlnak dingah le lungualnak kilhimitu dingah a thupi zetih din a si.

THAWSAL NI**JESUH KHRIH KAWHHRAN LU****December 16**

Kan zir zo mi zirlai ah kan hmuhmi vekin Thlung thar sungah kawhhran kha ruangpum thawn tahthim a si. Kawhhran kha Bawi Khrih le a minungpawl an pehzomawkdan a langter mi a si. Kawhhran hi Khrih ih ruangpum a si vekin Khrih ah a zaten a hngataw top. Khrih kha kawhhran lu a si (Kol. 1:18; Efe. 1:22) vekin kawhhran nunnak hrampi a si. Amah tel loin kawhhran a ding hnget thei lo.

Kawhhran in a sinak hmuahmuah Khrih hnenih a lakmi a si. Khrih kha a zumnak le zirhawknak ih hrampi a si. Kawhhran in himi hnakin a sinak langtertu tampi a um lai. Khrih le a thu sim mipawl Bible sungih a um mi in Kawhhran kha ziang a si ti a langter. Kawhhran in a sinak le a sullam kha Khrih hnen ihsin lakmi a si.

Efesa 5:23-27 sungah Paul in Khrih le a kawhhran pehzomawknak a langternak ah nupi le pasal pehzomawknak in hrilhfiahnak a tuah. Himi in Khrih le a kawhhran ih pehzomawknak ziangpawl so a sim duh mi a si.

Kawhhran hruaitupawl in kum za tampi ngaihsak loih an bawhsiatnak ruangah himi pomdan hi kan laklawh mai thei. Khrih kha kawhhran lu a si lo ahcun a thuneihnak tangah kan um thei lo. Khrih kha kawhhran lu a sinak felten kan theih ahcun zo lamah so kan tang timi le zo ih ta so kan si ti kan thei dingah in bawmtu a si. Kawhhran lu ah kan Bawipa lo midang a um thei lo timi in theihter.

Kawhhran hruaitu dik Jesui thuneihnak tangah thuneitu dingin kawhhran din a si.

Kawhhran cu a hram lungphum Jesui tlunah dinmi a si. Khrih kha kawhhran lu a si vekin Jesui thu vekih um a tul. Minung thuneihnak ih uknak tangah kawhhran hi a um lo. Mi tampilawl ih an sim mi cu kawhhran ih rinsan ruangah thuneitu dinhmun in pek tiah an zumaw ih thuneihnak an hmang theu. Hivek tuah thei dingah Pathian in thuneihnak a pe lo. Runtu Bawipa in nan zaten unau za nan si tiah a ti. Nan zaten sualnak tuah dingih tukforh thei mi nan si tiah a ti. Tawp cin nei minungih hruainak rinsan a tlak lo. Kan zumnak lungphum Jesuh Khrih hmai ah a kilven mi kawhhran lawng a um. Mi tawntai bik tla in amah parah rinsannak an nei thei. Kan hlawhtlinnak (or) nehnak kha Khrih a si a ti lo ih, amai cahnak a rinsantu cu a tawntaihnak a phuangawtu a si. E.G. White, The Desire of Ages. Pp. 414.

A tawntai ih a hloral thei mi lai parah thumaw loin Jesuh Khrih rinsandan ziangvek in so kan zir ding?

**TLAWNGKAI NIKHAT
HRUAITU TLAWMNGAI (Servant Leader)**

Jesuh in a dungthluntupawl thawn rawng an bawl laiah thiltithe le huham nei ah an ruataw. An iksikawknak a thei theu ih, thinheng in tu le tu nun a sim theu. Jesui uknak sungah hruaitu si an duhnak kha an langter (Matt. 9:33,34; Luke 9:46). Zanriah neta bik an hil can khalah uktu le cungnung bik si duhnak kha an lakah theih fahran in a um (Luke 22:24).

Hmun khatih an um laiah Jesuh in a thluntupawl kha thlarau lamih hruaitu si dingah duhsaknak a neih mi kha a sim. Matthai 20:25-28 sungah Jesuh in hruaitupawl ih umdan ding forhnak a tuah mi ihsin zir thei mi ziangso

kan neih? Kanmai nunah himi umdan ding ziangtin so kan langter thei ding? Kawhhran mipipawl hnenah ziangtin so kan langter thei ding?

Himi cangah Jesuh in thuneihnak pahnih umdan tawi felten a sim. (1) Rome-pawl ih thuneihnak umdan a si. Himi fehdan hi midang parih thuneihnak cithlah ih fehdan a si. A uk sung mipipawl ih thu an tlunnak le thuneihnak nei thei dingah thuthen catnak an neihsak. Jesuh in thuneihnak a hnongnak thu an hnenah a sim. Nan hnenah cuvek cu um hlah seh. Cumi hnakih thuneihnak maksak zet mi umdan thar kha a tirhthlahpawl hnenah a sim. An rak theihmi cithlah ukawknak dan thawn cun a ling letaw ih a hnong rori a si. Darius Jankiewicz, Servinglik Jesus: Authority in Gods Church. Adventist Review, March 13,2014. Pp. 18.

Himi thuanthu ah Jesuh in thuneihnak pomdan tongfang phun hniih in a hmang: Servant (diakonos) riantu siahhlawh le slave (doulos) sal timi a hmang. Lehlin hrekkhhat ahcun servant kha ‘minister’ orden ngah zo mi pastor tiah an letling. Cuih tlunah ‘servent’ (or) ‘bondservant’ timi midang hrangah nunpek hnatuantu tiah an letling. Thuneihnak thawn thupek ih fialmi a si loih thinlung ih duh hrimnakih tuahnak kha himi tongfang pahnihpawl ih sullam a si. Hihi Jesuh in thuneihnak ih uknak a siatbalnak a si lo. A sim duhmi cu hruaitupawl in Pathian minungpawl kha hnenum vekin an rian ding timi kha a sim duh. An dinhmun ihsin thuneihnak hmang ding an si lo. Upat hmaizahnak le hminthatnak ngah dingah anmah uktu an si lo. Khrih in a lamdang zetmi ukdan hmangin ram a din ding. Thuneihnak nei dingah mi a ko lo, mi riantu dingah a si. Tawntaipawl hrangah thazang an si ding. Huham, dinhmun sang, suahpi mithiamnak,

fimnakpawl hi anmah hnakin dinhmun sang thuneihnak tangah an milaipipawl riantu ding an si. E.G. White, The Desire of Ages. Pp. 550.

John 13:1-20 siar aw. Jesuh in a dungthluntupawl in hruaitupawl ih umdan zohthim ding ziangso a sim? Jesuh in himi cang ihsin ziangso zirh in tum. Kawhhran um lonak hmunah midang thawn kan tlangleng tikah himi nundan ziangtin so kan langter ding?

**TLAWNGKAI NIHNIH
KAWHHRAN LUNGRUALNAK HUMHALHNNAK**

2 Timote 2:15 le Tita 1:9 siar aw. Timote le Titas hnenah Paul ih ruahnak pekmi vekin rinsan tlak kawhhran hruaitu le eldarpawl ih a thupibik tuanvo kha ziangpawl so an si.

Zirhnak thianghlim le zumnak kilhimnak ah Paul in ziangtluk tamin so a tarlang timi hminsin aw. Thu kan zirhnak ah kawhhran pumkhatnak a tuah mi hnakin midang ih in elnak ruangih tawhawknak kha pumkhat sinak hrangah tihnung mi ral a si ih, a poi zetmi a si. Adventist-pawl hi nunphung le nundan a phunphun ihsin kan raih, dinhmun bangaw lo zetzet mi kan si. Khrih ih in pekmi thutak kan theih fel ruangah Khrih sungah lungrualnak kan ngah. Can neta lam kan naih zo ih, himi thu zirhnak ah buainak kan tonah cun buainak le thenawknak lawng a ra ding.

Minung le mithi thuthentu hmaiah thu ka lo pe a tikcu ah siseh tikcu lo ah siseh Pathian thu kha simaw, taima aw, an dik lonak langter aw, kawk awla, thinsau zetin zirh awla forh aw. Ziangahtile zirhnak dik an thlun lo can a ra thleng ding, an hna a zat ruangah anmai cakhiarnak thlunih zirhtupawl an hnenah an kokhawm

sawn ding. Cule thutak an hoisan ding, phuahcop thuanthu ah a feh peng ding (2 Tim. 4:1-4 NKJV).

Jesui ratsalnak thu le thuthennak thu in Paul ih nun a luah khat theh. Tirhthlah in a tuahmi hmuahhmua ah Pathian thupeknak ih tuah a si (1 Tim. 1:1) ih Timote hnenah a thupi zetmi ruahnak peknak a sim. Ni neta thawn pehaw in zirhnak sual tampi a suak ding, thlarau thi thei lo mi zirhnak a suak ding. Timote kha Pathian thu zirh dingah a forh. Cuih hnatiuan dingah kawhmi a si.

Thuzirhnak in rawng a bawlnak ah Timote kha zirhaw, an dik lonak langter aw, tha peaw tiah a ti. Himi ah tuahnak langtertu tongfangpawl in Bible ih lamhruainak kha theisal dingah a si (2 Tim. 3:16). Timote ih a tuah dingmi cu Bible ih a hmuh mipawl thlunih thin saunak le zawi theinak thawn zirhnak tuah ding a si. Hronak, tongkam mawi loih nun simnakpawl in misual kha Bawi Khrih hnenah a fehpi thei lo. Thiang thlarau ih hruainak tangah um in Paul ih a ngan mi vekin thlunnak le tlwmngai thei zet hruaitu thinlung put le ziaza thawn hmual nei zetin kawhhran lungrual theinak dingah Timote in taimak suahin a tuah.

Kan kawhhran lungrualnak a tunghmun theinak dingah kawhhran hruaitupawl kha ziangvek nundan kan neih mi in so a bawm thei? Remawklonak, dodalawknak a um cingin lungrualnak um dingah ziangvek in so taimak suah in kan tuan ding?

**TLAWNGKAI NITHUM
KAWHHRAN HRUAIAWKDAN**

December 19

Kawhhran dinnak ah a thupi zetmi pakhat cu hruaiawkdan a si. A cancan ah olte ih theih sualawk a ol zet. Thinsia le then teu pawl an um tikah hruaiawknak

daan in kawhhran lungualnak kilhim dingah a bawm. Asinan Bible thlirdan ihsi cun kawhhran hruaiawknak daan hman ding a thupi pahnih thlur ding mi a nei. (1) Thurin zirhawkdan thianghlim teih kilhimnak, (2) kawhhran nun ziaza thianghlim teih kilhimnakpawl a si.

A hleice in can neta lamah Bible thu zirhnak dodalnak le zirhnak sual zirhtupawl an suak ding. Curuangah Bible ih thianghlimnak nun zirhmi kha tunghmun dingih kilhimnak dingah a thupi zet tiah tlung tharin a sim mi kan hmu zo. Hurnak, depdetnak le nun rawng tuksumza ih umnakpawl dodal in zatlang nun mawi zet mi kilhim theinak dingah a si. Hivek thu hrangah Bible ih a simmi cu zirhawknak ah siseh, kawknak ah siseh, nun ziaza remthatter awknak ah siseh, dingfelnak hrangah zirhnak ah siseh a tha tiah (2 Tim. 3:16 NKJV) ah a ti.

Matthai 16:19 le Matthai 18:15-20 siar aw.
Sualnak tuahtupawl nunsimnak le kawhhran hruainak
dingah Jesuh in ziangvek dan hrampi so a pek.

Hruaiawkdan kha Bible sirhsan mi a si, pumpak thlarau nunah tuanvo nei ti theiaw ih mawhphurh lakawknak le ziaza tha in nun khawsaknak a si. Kawhhran ih thianghlimnak nun kha a lamdang zetmi hminsintlak pakhat a si ih, lei tisa nun ihsin an then felawknak tla a si. Kawhhran in nun borhhlawh hurnakpawl ah buainak an ton tikah a netnak thuthen catdan ding Bible in zohthim ding in pek. Kawhhran sung ihsin nun ziaza thatnak ding kan kilhimaw ding a si.

Kawhhran sungah thubuai cinfel har a um tikah a tang lamih Bible cangpawl in hruaiawkdan ziangpawl so in zirh (Matt. 7:1-5; Gal. 6:1,2).

Kawhhran hruaiawknak danah Bible lanin kan feh thei lo. Bible thu tel loin rinumpnak a um thei lo ding. Himi

nunsimnakpawl in thukam mi vekih nun nei famkimnak in thlen. Hruaiawknak danpawl in a cang thei sungin thukam vekih nun neih famkimnak in tuahsak thei. Kan theih tul mi cu misual kan sitheh ih zangfahnak tul mi kan si. Hruaiawkdan kan hman tikah tangdornak le mi famkim lo kan si ti theiauw in fimkhurten kan hmang ding.

Dan tatnak hnakin an sualnak sungin runsuahnak
hi sualnak tuahtupawl ih thuro kan rel tikah anmaha
runsuahdan ziangtin so kan zir ding?

TLAWNGKAI NILI De
MISSION HNATUAN DINGIH PAWL DINNAK

December 20

Thu kuata sungih kan theih rero mi cu mission hnatauan dingah lungralu zetih kawhhran din a si vekin thuthangtha simih fehsuak ding a si. Kannih pakhat le pakhat kan pawlkomawknak hi midangpawl in zatlang nunih pawlkomawknak dingih zumtu pawlkom an neih men mi vek a si lo. A thupi zetih a poimawh zet. Kan ngahi mi thutak kha leitlun ah phuang suak dingih hruaikhawm mi kan si. Kanmah kan duhdawtawk vekin duhdawtnak ah kan komaw.

Matthai 28:18-20 sungah leitlun ih thuthangtha sim dingah tirhthlahpawl kha Jesuh in a neta bik thu a zirh. Jesuh in thu ka lo pek timi tongfang a hman mi kha hminsin aw. Tuisan kawhhran hrangah teh himi in ziangso a langter?

Jesuh in a tirhthlahpawl thu a pekih a fialnak ah tuahnak langtertu tongkam pali a um. (1) Feh uh, (2) ka dungthluntu ah va tuah uh, (3) tihnimnak va pek uh, (4) va zirh uh ti mipawl tla an si. Grik tong fehdan dikah hi mi tuahnak langtertu a thupi bik mi cu tirhthlah ih tuahnak a si ih, a dang pathum cu ziangtin so kan tuah thei ding?

Tirhthlahpawl in zumtupawl ih an tuah tikah thuthangtha miphun hmuahhmuah hnenah a sim. Cun, tihnimnak an pekij Jesui thu zirh mipawl tlun dingah an zirh.

Himi hna ah kawhhran in tuanvo a nei. Pathian lalram cu a kau deuhdeuh ih cuih uknak ah miphun hmuahhmuah tam sinsin in an karh ih, Jesuh kha runtu Bawi ah an pom. Jesui thupek mi an tlunih tihnimnak pek dingah thupek vekin thu an zirh mi tla an ngai pawimawh ih, lei le van innsang thar an din. Tirhthlah tharpawl in Jesui hmai ah an thinlung takte ih an simmi cu anmah vek dungtluntu thar tampi nitin ih suahter dingah an tiam aw. Jesui hmaiah le Pathian hmai ah thutiam tuah mi a si. Jesui suahnak thu ah Pathian kan hnenah a um tiah Matthai in a phuang (Matt. 1:23). Cule a cem netnak ah Jesui thukam mi cu a ratsal tiang kan hnenah a um ding.

Khrih in a dungtluntupawl hnenah an tuanvo hi a olte tiah a sim dah lo ... an hnenah thu a tiam mi cu anmah thawn umtlang dingah a si. Cule zumnak in ziangkim tithei thilazar hnuai ah rawngbawl ih hmai nor ding an si. Thu a pek zo vekin vancung mipawl hnakin raltha le cak ding dinhmun ah van ralkap Bawi in a ret. An hnatiuan ih sual an puhnak ah amah in mawhphurhnak famkim a lakah an hlawhtlin theinak dingah amai tuanvo ah a ret. A thusim mi kha zawnlung ten an tlun ringring ih amah thawn kut kaiin an tuan tlang. Curuangah an hlawhsam dah lo. E.G. White, The Acts of Apostles, pp. 29.

Jesuh in a rat ni tiang a minungpawl thawn umtlang dingah thu a kam mi kha a takin a langter. Jesui in fialmi tuah famkim dingih kan hawl lai ah a takin himi thukam ziangvek in so a thathnemnak kan hnenah a um thei ding?

TLAWNGKAI NINGA

December 21

RUAH BET DING: Pawlkomnak hmuahhmuah ah hruaitu tha ih umdan a lang dingih kawhhran sung khalah a lang ding. Kawhhran hruaitu cu hruaitu dangpawl hnakin tlawmngai sawn ding a si.

Hruaitu umdan le siahhlawh (hnenum) umdan hi nasa zetih danglam mi a si. Ziangtin so veikhat ah hruaitu dinhmun le hnenum dinhmun ah a um thei ding? Thu nei zetih thupeknaum loin a thu mi in an ngai ding maw? Hruaitu in mi upat mi dinhmun a ding lo ding maw? Hnenum dinhmun ih a din ahcun mi ih fialmi a si dingih an fialmi tuah famkim ding a tul fawn ding. Ziangtin so cutin a tuan thei ding?

"Himi hi a mak ih a dik mi a si. Jesuh zohthim phahih cingfel dingmi a si. Cungnung bik sinak hmun ihsin himi hruaitu umdan hi a tuah. A nun sung hmuahhmuah kha midang hrangah a hmang. Leitlun hruaitu hminthangpawl ih zohthim mi a si (G. Aurthar Keough, our Church today What It Is and can be, (Washington DC and Weshville: Review and Herald 1980). Pp. 106.

REL TLANG DING:

- (1) **Hruaitu tlawm ngai umdan kha ruat aw. A tu leitlun thil umdanah zohthim ding ziangso kan hmu thei?**
- (2) **Matthai 20:25-28 siar sal aw. Hruaitu hminthang thu Pathian ih theihdan ziangvek a si tiah a sim? Matthai 20:26 zohthim in leitlun ih an hmuhdan teh ziangvek so a si?**
- (3) **Kawhhran hruaitu in lungrualnak hi a kilven dingah cun kawhhran hruaitu in zohthim ding um**

**lo, bah rero phah in a um tikah zohthim ding tlak
a sinak kha ngil nei zetin ziangtin so a kilhim thei
ding?**

- (4) **Sualnak tuahtupawl parah kawhhran hruainak dan
kan hman tikah ziangvek in so zangfahnak thinlung
le duhdawtnak le zawnruahnak thinlung thawn
ziang tin so kan hruai ding?**

THUTLANG KAWM: Zumtupawl lungrualnak dingah le kawhhran rawngbawlnak dingah kawhhran tha mi kha din a si. Khrih kha kawhhran lu a si ih, Pathian minung-pawl an hruainak ah Jesuh zohthim in an tuahdan veikin an tuah ding. Bible ih zirhdan veikin rinum teih umnak ah le a thu ah rinum nun neinak in lungrualnak a kilhim thei.

ZIRLAI 13

December 22-28

LUNGRUAL DINGAH A NETABIK REMTHATNAK

SABAT TLAI LAM

December 22

TUZARH SIAR DING: John 14:1-3; Isai. 11:1-10; Thup. 21:1-5; I Thess. 4:13-18; Thup. 22:1-5; Isai. 35:4-10.

BIBLE CANG KEN: “**Asina in a thu tiam veikin a sungih
dinfelnak a umnak hmun van tharpawl le
lei thar cu kan hngak a si**” (2 Pet. 3:13
NKJV).

BIBLE sungih thu tiam sunglawi bik cu ka ra sal ding tiah Jesui thu tiam kha a si. Kha mi thu tiannak le kan hrang in tuahsak mi kha kan ruahsan bik mi si hlah sehla thu lolak men kan si ding. Van ihsin mero thawn Jesuh a rat tikah minung thil tuahmi le a langte ih thil ummi hmuahmuah cu an hlo theh ding. Van ah kum thawngkhat rorel kan theh tikah leilungpi ah ral donak a um ding, harsat mangbangnak, natnak hri le rai sia le tuksunza harnak a um ding. Cuih thil thlengpawl in thil thar a hrin suak ding, a netnak ah cuih hmun cu rundam fapawl le an Bawipa le rundampawl pakhat le pakhat pumkhat sinak hmun ah kumkhua an umnak hmunah a cang ding.

Thlung tharih a tumtah mi bik cu Jesui ratsalnak ah ruahsannak neihnak ding thu a si. Khrihfapawl in cuih thukam a ra thleng famkim can kha kum za tampi hngak hlap zetih an thlir mi a si. Seventh-day Adventist pawl khalin cumi cu hngak hlap zetin kan thlir. Curuangah kan kawhhran hmin khal kan ruahsannak phuangtu a si.

Tu kuata ih a netabik zirlai sungah himi thu tiam hngakhlap zetih kan thlirnak le cumi in Khrihfa pumkhat ah in tuahnak sanpawl kan zoh ding. A tawntai ih a thi thei milai in kha mi pumkhat sinak kha taimak suahih zuam rero mi a si. Cuih hmun cu kan thenthekawknak cingfel dingah thuhla hawlsuah le tum rero a tul nawn lo ding. Ziangatile cuih hmunah thenthekawknak a um lo ding. Jesuh kan Bawipa a rat tikah amah thawn pumkhat in kan um ding. Cumi cu Eden ih kan sinak dintharsalnak a si dingih vanram innsang dinnak a si ding.

**THAWHSAL NI
KHRIH A RA TENGTENG DING**

December 23

John 14:1-3 kan theih lar bik mi Jesui a ratsalnak thu kam a si. Rundam fapawl in lei tharah ziangvek phunin so a nung ding timi thu ziangso a sim?

Khrihfa hmaisapawl in Khrih ratsalnak kha ruahsannak sunglawi ah an ruat (Tita 2:13 NKJV). Khrihfa fehpidan ih tumtah a si ruangah simsung thu hmuah-hmuah le Bible ih thukam hmuahhmuaah kha Jesui ratsal tikah a famkim ding tiah an ruat. Jesuh duhdawttu hmuahhmuaah in hmaiton in amah thawn thunuam reltlang thei ding kha an hngakhlap zet. Kha mi bung le cangah thu a simmi cu nelaw zetih pawlawknak le naih niamaw zetnak kha kan simaw ding. Jesuh thawn lawng si loin pakhat le pakhat kan kom nelawknak tla kan rel tlang ding.

Himi thukampawl hi a thleng rori ding tiah Bible in a sim ruangah Khrihfapawl in kan zum. Jesuh in ka ra sal ding tiah a sim ruangah himi thukam hmuahhmuaah kan thei fiang ih, kan zum (John 14:3 NKJV). Thlung hlun

sungah Jesui a veikhatnak naute ih a rat ding thu simsung vekin a ratsalnak ding thu khal a sim. Sual thu netkharnak ah Messiah Jesuh kha sunlawi ropitnak thawn a ra ding tiah kan pupa in thlahtu Enok hnenah tilik a tlun hlanah Pathian in a sim zo. A rak sim mi cu, “ngai hnik uh, Bawipa cu a mithianghlim thawnghra thawn an ra ding. Mi hmuahhmuaah parah thuthennak a tuah ding. Kan lakah Pathian ngaihsak lo tupawl hmuahhmuaah cu an tuah mi sualnak thu ah Pathian dokalh ih an tongmi tongkam siapawl thuhla ah mawhpuh dingah a ra ding” (Juda 14,15 NKJV).

Pathian minungpawl kha hmunkhat ah a hruai-khawm ding tiah David siangpahrang khalin leitlun ah naute in Jesuh a rat hlan kum thawng tampi rei laiah a rak sim zo. “Kan Pathian cu a ra dingih daiten a um lo ding, a hmai ah meisa a alh ding, a kimvel ah thlipi nasa zet a hrang ding. A minungpawl thuthennak dingah tlunlam ih vanpawl a ko dingih leilung tla a ko ding. Thawinak in keimah thawn thukamnak a tuahtu ka mithianghlimpawl cu ka hnenah karak finkhawm ding (Saam 50:3-5 NKJV).

Jesui a vei hnih ratnak kha veikhatnak naute ih a ratnak thawn naiaw zetin an zomaw. A suahnak ding simsung thupawl a thleng famkimnak a ratsalnak ding thukam kan rinsan ih kan zummi le kan ruahsannak hrampi a si. Raithawinak ah Jesui a pekawk zonak ruangah sual dawi hlo dingah a ra ding ... Khrih cu mi tampi sualnak phur dingah vei khat a hlanaw. Cun, amah hngaktupawl rundam dingah a ra dingih sualnak thu ah a si lo ding (Heb. 9:26,28 NKJV).

A ratsalnak thukamnak ihsin ruahsannak le hnangamnak ziangvek in so a lo neihter sinsin.

**TLAWNGKAI NIKHAT
SIAMTHATSALNAK THUKAM**

December 24

Isaiah 11:1-10 siar aw. Israel-pawl hnenah thukamnak ziangso a pek? Rundam fapawl kumkhua ih an umnak hmun thuhla ziangso a sim?

Kan Bible hi leilung sersiamnak thawn a hram a thok (Sem. 1,2). Adam kha tlaksam mi um lo run inn nuam Pathian in a tuahsak. Kan Bible ih bung netabik pahnih khalin a sim mi cu tlaksamnak um loih famkim le rualremnak ih a khat mi leilungpi kha Pathian in rundam fapawl hrangah a tuahsaknak a sim (Thup. 21,22). Himi can hi sualih a siatsuah theh zo mi leilungpi a tharih siamthatnak le dinthar salnak a si tiah fiangten a sim.

Rundam fapawl ih kumkhaw nunnak ding inn khi thinlung ih suangtuahnak men a si lo ih, a taktak a si tiah Bible in a sim. Rundam fapawl cun sinak thar an ngah ding, tonnun thar, ruahnak thar, theih mi rim, tham mi thil, hna ih theih mi aw tla a thar mi a si ding ih, a danglam mi thil thar cu an mitin an hmu ding. Santhar a sualsuaktu Messiah ratnak simsung thu duhnung zet mi kha Isaiah 11 sungah a um. Nun rawng zet mi sualnak kha a cemter dingih kumkhaw daihnak le hnangamnak a thlenpi ding. Leithar ah uktu cu Pathian a si dingih lei le van rualremnak le lungruanak a dingsuak ding.

Thuphuan 21:1-5 siar aw. Himi a tharih remnak um mi in kumkhua in ziangso a hloralter ding?

E.G. White in rundam fapawl ih an hngakhlap zetmi thu a ngan mi cu, "himi kumkhaw hmunah cun Pathian le Jesui sunlawinak ropi sinsin in an thlenpi ding. An theihnak a karh vekin thinlung takte ih duhdawtnak, tihzah upatnak le nunhlimnak kha a nasa sinsin ding. Pathian thu kha an zir sinsin ding ih, Pathian ziaza kha an tihzah

upat sinsin ding. Jesuh in setan thawn an doawknak ih a hlawhtlinnak le a mankhung mi kha an mithmuh in an hmai ah a phuan ruangah rundam fapawl ih thinlung kha Pathian upat pek duhnak le an tum mi sui tingtang cu an ringter sinsin ih minung thawng za tampi ih thangthatnak hla aw thangkhawk in a khuh theh. E.G. White, The story of Redemption. Pp. 432,433.

Tui sanah Pathian ziaza ziangtin so kan thei thei ding? Midang thawn remaw le lungrualte ih kan nunnak in Pathian sinak ziangtin so kan langter?

**TLAWNGKAI NIHNIH
PEHZOMAWKNAK DINTHARNAK LE THAWHSALNAK**

December 25

Khrih ratsalnak thukam hi hlan lai kawhhran Pathian hnenih rinumtupawl thinlung sungah harsatnak an tuar lai khalah thildang hnakin an ngaisang sawn. Harsatnak rapthlak an tuar lai le natnak tuar riahsia ih an um lai khalah hnemnak zianghman a um lo cing in Jesui ratsalnak thukam an kai hnget ringring.

1 Thess. 4:13-18 siar aw. Thukam mi ziangpawl so a um? Pehzomawsalnak dinthar ding ruahsannak thu a simmi a um maw?

Mi hmuahhmuah hrangah Jesui ratsalnak hi sullam a nei zet. Pathian lalnak ram din mi ih a tumta cu hril mipawl umkhawmnak hmun dingah a si.

Van mipawl cu tawtawrawt aw nasa zet thawn a run thlah dingih a hril mipawl cu van khat lam deng ihsin khatlam deng tiang lei killi ih ta a lawrkhawm ding (Matt. 24:31 NKJV). Himi lawrnak can tawite sungah mi thiangular a thi mipawl an tho ding, thi theilonun an ngah ding (1 Kor. 15:52,53). Jesuh zumih a thi mipawl an tho

hmaisa ding (1 Thess. 4:16 NKJV). Cuih can sunglawi cu hngakhlap zetih kan thlir mi can tawite a si. An nunlai ih an duhdawt mipawl thawn a thosal mipawl cu an tongaw ding. Himi thil thleng hi Paul in lungawinak nasa zet a neih mi a si. Maw thihnak na tur khui ah a um. Maw thlan na nehnak khui ah so a um (1 Kor. 15:55 NKJV)ti ah a ti.

Natnak, tarnak, famkim lo piangsual le mithi thlanmual ih vuiliam a um lo ding. Thawhsal ni ahcun sinak thar, thi thei lo, taksa famkim, sual ruangih toihralnak hma neh tla a hlo theh ding. Mi thiaghlim a thosalpawl in Khrih ih dinthar salnak a tuah mi kha a famkim in an ngah ding. Sersiam lai ih Pathian hmel sun a sinak kha a famkim in an keng ding (Sem. 1:26; 1 Kor. 15:46-49).

Jesui a ratsalnak can tawite ah rundamnak ngah a thi mipawl an thosal ding. Mi thiaghlim nungdampawl kha an taksa a tharih thlengsak an si dingih a thi thei lo mi taksa famkim an keng ding. A toih theiin toih thei lo a hrush ding, a thi thei in thi thei lo a hrush ding (1 Kor. 15:53 NKJV). Rundam ngah mithiaghlim thosal mi le taksa thi thei lo in thlengsak mipawl cu vanah mero lakah an Bawipa tong dingih lakso an si ding Cule Bawipa hnenah kumkhua in kan um ding (1 Thess. 4:17 NKJV).

Fimthiamnak a sang zet mi kan sanah ziangkim hi kokek (Nature) rori ih hrifiahnak an hawlih Jesui thilmak a tuah mipawl tiangin hawsuak kan tum. Thawhsalnak thutiam in kan rundamnak Pathian thiltitheinak ih hnataun a sinak ziangso in zirh?

**TLAWNGKAI NITHUM
LEI THAR RUNDAMPAWL HRANG**

“Ngai hnik, van thar le leithar ka sersiam, a hlanih lei le van cu theih a sin awn lo ding, na thinlung khalah a

lut nawn lo ding (Isai. 65:17 NKJV). Isaiah ih a hmuh vekin John khalin (Thup. 21:1) ah leithar tuahsal ding thukamnak a hmu ve.

Thuphuan 21:2,9-27 sungah rundam fapawl umnak khawlipi Jerusalem thar kha Tirhthlah John in khawruah har za mak zetin a ngan. Himi cangin lungrualnak le remawknak a um mi khawlipi thu ziangtin so a ngan?

Thuphuan 22:1-5 siar aw. Khawlipi thar ah a langsar bik mi cu Pathian Bawi tohkham laifang ih a luang suak mi nunnak tiva le nunnak thingkung tiva kapih a kho mi kha a si. Lei thar ah kha mi in tumtahnak ziangso a neih?

Nunnak thingkung kha Adam in a sualnak ruangah a hloralter mi a si (Sem. 3:22-24). Cuih thingkung cu Jerusalem thar ah Jesuh in a dinthar sal ding. Nehtu a simi cun nunnak thingrah ei theinak ding Pathian thukam pekmi a si (Thup. 2:7). Cuih thing cu rah phun hleihnih a nei ih, thlakhat phun khatih rah mi a si. Lei thar ah nthila siarnak ding a si men thei. Thla thar ihsin a dang thla tharah le Sabat ni ihsin a dang sabat ni ah mi hmuahhmuah cu keimah be dingin ka hmaiah an ra ding. Bawipa in a ti (Isai. 66:23 NKJV). Minung pakhat le pakhat karlak ih khamtu thleidanawknak hlotertu dingah Pathian tlangtlaknak langtertu a si. Milai hramthok ihsin thilummi dintharsalnak a si. Mi hmuahhmuah, citin hnamtin, sungkhar tin thleidannak um loin remnak le daihnak nun nei ih Pathian sunlawinak kha lungrual teih pek dingah a si.

Tong le miphun thleidanawknak ih dawnkhamnakpawl hlon hlo thehnak kha ram le miphun damternak in a langter. Nunnak thinghnah in dan bawhsiatnak ih rem lonak a suak mi buainakpawl kha a damter. Cutik ah Zentail miphun ti a um lo ih Pathian ih minung lungrual zet mi innsang khatah a funkhwam (Thup. 21:24-26)

zohthim aw. Mikah in kum za tampi a rak thlir lawk mi kha a tu ah a thleng famkim. "Miphun khatin miphun khat parah ralnam an len nawn lo ding, raldo zirhnak khal a um lo ding. Mikip in mai sabit kung hnuai ah le mai theipi kung hnuai ah an to ding. Zohman in an thinphanger lo ding (Mikah 4:3-4 le Isai. 2:4) zohthim aw. Nunnak tiva kiangih a kho mi nunnak thing tangah rundamnak a ngahtupawl in pakhat le pakhat an sawmaw ding ih an to ding (Zekh. 3:10 cangantui ngandan). Kum reipi milai innsang thenawtertu tong phun, miphun niam le phunsang, hrin thlak le cithlahpawl ih theidanawknak kha nunnak thinghnah in dam fel famkim in a damter ding (Ranko Stefanovic, Revolution of Jesus Christ: Commentary on the Book of Revelation, pp. 593).

**TLAWNGKAI NILI
LEITHAR IH KHAWSAK DAN**

December 27

Isaiah 35:4-10; Isaiah 65:21-25. A tu ih kan nundan thawn a danglumnak ziangso a um?

Isaiah cabu sungah kan siar theu mi ah 'thar' timi kan hmu theu. 'Thil tharpawl ka phuang ding' (Isai. 42:6; Isai. 48:6) hla thar sak uh (Isai. 42:10), thil thar ka tuah ding (Isai. 43:19), hmin tharin kawh na si ding (Isai. 62:2). Isaiah 65 sungah thil thar timi kha a ra um ding mi thil thar ti a si. Pathian sersiam mi hmuahmuah lakah remnak le daihnak a um dingih an ti na aw nawn lo ding. Sual a um nawn lo ruangah zawnlun lo ruangih doawknak kha kumkhua in a cemral ding, Pathian thupek vekin ram cu damter a si ding (Lev. 26:14-17; Danp. 28:30). Cuih hmunah anmai innte ah an um ding; an neih mi ti le rawl an lungawi pit dingih cuih hmun cu nasazetih lungawinak hmun a si ding.

Cuih a nuam zet mi hmunah ziangvek in so an khawsa ding? Mi hrekkhaptawl in kan taksa in thi thei lo sinak a hruk ih, Pathian hmuihmel famkim ih kan kennak peksal kan si tikah kan sungkhat le rualpipawl kan thei theisal ding timi an ringhlel. Mary in a Bawipa aw a hminsin thei (John 20:11-16). Thomas khalin Jesuh a langawk canah a ruang pum umdan in Jesuh a thei (John 20:27,28). Emmaus lamzin ih tirhthlah pahnih khalin Jesui umdan zanriah netabik sabuai parih an hil lai ih a umdan kha an hngilh lo (Luke 24:30,31,35). Kan taksa kha thawhsal a si tikah Jesui thawhsal hnu ih a taksa thawn an bangaw ding. Cuih canah pakhat le pakhat kan theithiamaw rori ding. Cuih canah kan pehzomawknak kha a cat nawn lo dingih kumkhua in a hmun ding ti kan theithiam ding. Kan duhdawt zetmi kan sungkhatpawl thawn kan pawlkomawknak a siat lo dingih a him ringring ding.

"Hlanlh an theihthiamawk vekin an theiaw ding. An nunah Pathian ih thawkkhum mi duhdawtnak le lainatnak kha duhnung zet le rinum zetin an nunpi ding. Nun thianghlim an neih mi thawn thlarau pawlkomawknak thianghlim an nei ding. Tuufa thisen sungah an puan faite ih soptu, hlanlai ih mirin umpawl le lungawi zetih a ummi vancung mipawl thawn zatlang nunah lungrual le rualrem zetin an nung ding. Cuih lei le van innsang kha a thianghlim mi hri in hmunkhat ah temkhawm mi an si (Efe. 3:15). Himi hi rundam fapawl ih lungawinak dinsuahnak bawmtu a si. E.G. White, The Great Controversy. Pp. 677.

Cuih thu ruangah kan cau lo ... can tawite retheih kan tuar mi kha titham ah kan ruat lo. Cumi in kan hrangah kumkhua daih sunlawinak in tuahsak. Hmuu thei thilpawl zoh loin, hmuu thei lo thilpawl kan zoh,

ziangahtile hmuh thei thilpawl cu rei lote sung hrang lawng a si. Hmuh theih lo mi thilpawl cu catuan hrang a si (2 Kor. 4:16-18 NKJV). Leilungpi a langte ih a ummi a si ih, kan hmuh thei lo mi kumkhua a hmun mi ram thleng dingah ziangvek ih zir so kan tul?

TLAWNGKAI NINGA

December 28

RUAH BET DING: Kan Bawipai thawhsalnak le van kainak kha Pathian mi thianghlimpawl hrangah thihnak le thlanmual parah nehnak an ngahnak hminsinnak a si. Tuufa thisen sungah a puan (or) nun ziaza thianghlim teih a kholh faiupawl hrangah vanram ngahnak ding thukamnak kha onsa a si. Jesuh kha vanah Pai hnен a kainak kha milai aiawhnak Pathian in amah hmuihmel kengtupawl in amai thatnak kilhim ih a sunloihnak a lanter theinak dingah a si.

Leitlun ih khualtlawng mipawl hrangah inn nuam zet a um. Mi dingfel hrangah rundamnak korfual le sunlawinak lukhum le nehnak hlasak dingmi thawn a um. Pathian duhdan in rem le daiten leilung tlunah sersiam a si mi hmuahhmuah kha kan hrangah khawruah harza an si. A san kan theih ban lo mi phun tampi kan hmu ding. A mak zet mi zangfahnak kha kan hmaiah phuan a si ding. Tawpcin nei milai kan ruahnak in a thutiam mipawl kha a hrekkhat lawng buaithlak zetin kan thei ih, cuih can a thlen tikah a mawinak thawn cawih awin a famkim in kan hmu ding. Cem ni nei loin kan parah duhdawtnak a neih mi kan tonnunpawl kan theifiang thlang ding. Kan thatnak dingah ziangkim in tuahsak ih, kan zawn in ruahnak le in ngaihsaknakpawl kha famkim in kan thei ding. Kaa ih sim thei lo mi lungawinak le sunlawi thangthatnak thawn kan khat ding.

REL TLANG DING:

- (1) **Khrihfa kan zate si lo hmanah Jesuh a ra rori ding ti zumtupawl in Jesui veihnih a ratsalnak dingah ruahsannak kan neih mi ah a bangaw mi ziangso a um?**
- (2) **Ngate pahnih ti sungah an um ih (1) tidai ziangvek so a si tiah a sut ? a sawn mi cu (2) tidai hi ziangso a si tiah a ti. A langsar zetmi si hman sehla hman rero mi thil zianghman an thei ngaingai lo tinak a si. (Mai rang to mi a nu maw si, a pa ti mi thei lo) tivek dan a si. Thuthimnak ah sualih hrin mi le sualih khat theh mi kan si ih, sual umnak leitlun ah kan khawsa. Van thar le leithar ah sinak thar thawn kan um ding timi kha khoh zetih kan pom ding mi a si. Ziang tluk mangbangza so a si. Tawpcin nei milai ruahnak hmanin ziang bangtuk a si ding timi mitthlam ih hmuh tumnak ziangah so kan neih a tul?**
- (3) **Lei tharih kan umdan ding suh thei ding a um lo. Lungualten kan um cio ding ti a si ko. Kha vek dinhmun thleng thei dingah pumpak cio in kan tuah tul mi ziangso a um?**

THUTLANG KAWM: A kumkhua in sual hmabiah mi hriam hma hlo dingin leilungpi hi a thar in tuah a si ding timi Bible in raltha zetin a sim. Milai sersiam tirih a tumtahnak thlengter sal dingin mi hmuahhmuah rualremten an um ding. Jesuh ah pumkhat sinak kha kan tunghmunter ringring ding. A tu ah famkim lo khal sehla, khi hmunah cun a taktak in kumkhua kan nung dingih kan leng tlang ding.

MORNING WATCH
October 2018

1. Tlawngkai Nikhat Thuphuan 1:7
2. Tlawngkai nihnih 2 Piter 3:10
3. Tlawngkai nthum Job 38:22, 23
4. Tlawngkai nili Isaiah 13:13, 14
5. Tlawngkai ninga Saam 50:6
6. Sabat Matthiaia 24:28

7. Thawhsal Ni Matthai 24:27
8. Tlawngkai Nikhat Saam 50:3, 4
9. Tlawngkai nihnih Isaiah 2:19
10. Tlawngkai nthum Filipi 3:21
11. Tlawngkai nili 2 Timote 4:1
12. Tlawngkai ninga Marka 14:62
13. Sabat Ezekiel 38:21

14. Thawhsal Ni Thuphuan 6:15, 16
15. Tlawngkai Nikhat Jeremiah 25:31
16. Tlawngkai nihnih Jeremiah 50:25
17. Tlawngkai nthum Matthai 24:44
18. Tlawngkai nili Isaiah 26:19
19. Tlawngkai ninga Johan 5:28, 29
20. Sabat Job 19:25 - 27

21. Thawhsal Ni 1 Johan 5:11
22. Tlawngkai Nikhat 1 Korin 13:12
23. Tlawngkai nihnih Titas 2:13
24. Tlawngkai nthum 1 Thesalon 4:16
25. Tlawngkai nili Jeremiah 4:23-25
26. Tlawngkai ninga Thuphuan 20:1, 2
27. Sabat Jeremiah 31:16, 17

28. Thawhsal Ni 2 Timote 4:7, 8
29. Tlawngkai Nikhat Jeim 1:12
30. Tlawngkai nihnih Luka 21:28
31. Tlawngkai nthum Thuphuan 22:12

153

154

MORNING WATCH
November 2018

1. Tlawngkai nili Juda 6
2. Zirtawpni Saam 91:11
3. Sabat Matthai 25:23

4. Thawhsal Ni Hebru 12:2
5. Tlawngkai Nikhat Matthai 25:40
6. Tlawngkai nihnih Isaiah 53:11
7. Tlawngkai nthum Matthai 25:21
8. Tlawngkai nili 1 Samuel 16:7
9. Tlawngkai ninga Isaiah 55:9
10. Sabat Kolose 3:2

11. Thawhsal Ni 1 Korin 3:14
12. Tlawngkai Nikhat 1 Korin 2:9
13. Tlawngkai nihnih Thuphuan 22:2
14. Tlawngkai nthum Thuphuan 4:2, 3
15. Tlawngkai nili Isaiah 33:17
16. Tlawngkai ninga Thuphuan 14:1
17. Sabat Thuphuan 7:9

18. Thawhsal Ni Daniel 12:3
19. Tlawngkai Nikhat Thuphuan 7:14
20. Tlawngkai nihnih Isaiah 64:4
21. Tlawngkai nthum 1 Korin 4:18
22. Tlawngkai nili Thuphuan 22:14
23. Tlawngkai ninga 1 Korin 6:3
24. Sabat Juda 14, 15

25. Thawhsal Ni Thuphuan 20:7, 8
26. Tlawngkai Nikhat Thuphuan 20:7
27. Tlawngkai nihnih Thuphuan 20:12
28. Tlawngkai nthum Thuphuan 12:14
29. Tlawngkai nili Johan 5:22
30. Tlawngkai ninga Matthai 25:34

MORNING WATCH
December 2018

- | | |
|----------------------|------------------|
| 1. Sabat | 2 Korin 5:10 |
| 2. Thawhsal Ni | Isaiah 45:23, 24 |
| 3. Tlawngkai Nikhat | Rom 14:11 |
| 4. Tlawngkai nihnih | Thuphuan 15:3 |
| 5. Tlawngkai nthum | Marka 4:1 |
| 6. Tlawngkai nili | Thufim 31:31 |
| 7. Tlawngkai ninga | 1 Johan 3:2 |
| 8. Sabat | Johan 5:17 |
| 9. Thawhsal Ni | 2 Piter 3:11-13 |
| 10. Tlawngkai Nikhat | Thuphuan 21:4 |
| 11. Tlawngkai nihnih | Isaiah 23:18 |
| 12. Tlawngkai nthum | Thuphuan 2:7 |
| 13. Tlawngkai nili | Saam 16:11 |
| 14. Tlawngkai ninga | Isaiah 65:18 |
| 15. Sabat | Kolose 1:12 |
| 16. Thawhsal Ni | Thuphuan 15:2 |
| 17. Tlawngkai Nikhat | Efesa 6:8 |
| 18. Tlawngkai nihnih | Isaia 65:21, 22 |
| 19. Tlawngkai nthum | Isaiah 35:10 |
| 20. Tlawngkai nili | Zekhariah 13:6 |
| 21. Tlawngkai ninga | Thuphuan 21:3 |
| 22. Sabat | Isaiah 52:6 |
| 23. Thawhsal Ni | Efesa 2:7 |
| 24. Tlawngkai Nikhat | 1 Piter 1:10-12 |
| 25. Tlawngkai nihnih | Saam 104:24 |
| 26. Tlawngkai nthum | Isaiah 45:12 |
| 27. Tlawngkai nili | Marka 12:25 |
| 28. Tlawngkai ninga | Daniel 2:27 |
| 29. Sabat | Isaiah 66:22, 23 |
| 30. Thawhsal Ni | Zekhariah 14:9 |
| 31. Tlawngkai Nikhat | Saam 91:16 |